

HOUSE OF CONJURING

مأخوذة عن |
وقائع حقيقية |



رواية

منزل التعويد

مروى جوهر

دار دؤن





منزل التعويذة

للمزيد من الروايات والكتب الحصرية
انضموا لجروب سائر الكتب

sa7eralkutub.com

او زيارة موقعنا

مروى جوهر: منزل التعويذة، رواية

الطبعة العربية الأولى: يناير ٢٠١٩

رقم الإيداع: ٢٥٤١١/ ٢٠١٨ - التقييم الدولي: 0 - 126 - 806 - 977 - 978

جميع حقوق الطبع والنشر محفوظة للناشر

لا يجوز استخدام أو إعادة طباعة أي جزء من هذا الكتاب بأي طريقة

بدون الحصول على الموافقة الخطية من الناشر.

© دار دَوْن

عضو اتحاد الناشرين المصريين.

عضو اتحاد الناشرين العرب.

القاهرة مصر

Mob +2 - 01020220053

info@dardaween.com

www.Dardaween.com



لتحويلك إلى الجروب أضغط هنا



لتحويلك إلى الموقع أضغط هنا

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

مروى جوهري

منزل التعويذة

رواية



للمزيد من الروايات والكتب الحصرية
انضموا لجروب ساجر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساهر الكتب

sa7eralkutub.com

او زيارة موقعنا

إهداء

إلى كل الأرواح الجميلة التي أثرت حياتي وأثَّرت فيها...
إلى هذا الخط الرفيع الفاصل بين روعي والجنون..
أشكركم وأرجوكم الصمود.



للمزيد من الروايات والكتب الحصرية
انضموا لجروب ساجر الكتب

sa7eralkutub.com

او زيارة موقعنا

(١)

«آدم»

في الثالثة فجراً شعرت بتلك اليد تدفني برفق سرّة أخرى،
قمت مسرعاً وأضأت الغرفة بالكامل لكنني لم أجد أحداً، خرجت
إلى غرفة المعيشة وإلى بقية الغرف، لم أجد أحداً، بقيت متيقظاً
في انتظاره ربما يظهر في أية لحظة حتى أشرقت الشمس، لكنه لم
يأت، عدت إلى النوم محاولاً سرقة ما بقي لي من ساعات قليلة
حتى موعد الاستيقاظ الإجباري صباحاً، لكن طار من عيني
النوم وبقيت أتذكر رغماً عني تلك الأيام الرهيبة والأحداث
التي دارت في منزل الباسوس^(١)، في أوائل صيف ١٩٩٩.

كان قرار أبي بالرجوع إلى «مصر» قراراً صادماً، خاصة أنه
لم يُمهّد الأمر، أخبرني بالقرار أثناء احتفالي وسط أصدقائي بعيد
ميلادي الثالث عشر، لم يبالي بي ولا بأصدقائي الذين قضيت
معهم معظم أيام حياتي، ولا بحياتي كلها هنا في دولة الإمارات
التي ولدت بها، قضيت سنوات قليلة جداً من عمري بمصر، إلا
أن المعظم كان هنا في الإمارات، وبقيت أتساءل: ماذا سأفعل في

(١) باسوس إحدى قرى مركز القناطر الخيرية التابع لمحافظة القليوبية بجمهورية
مصر العربية.

مصر؟ لا أتذكر حتى أقراني هناك، كما أننا لن نستقر في القاهرة،
إنما في منطقة تسمى «الباسوس» تبعد عن القاهرة نصف ساعة
تقريبًا، قالها أبي بحماس وكأننا سننتقل إلى «ديزني»!

زُرت مصر مرتين على مدار السنوات التي تركناها فيها ولم
أنسجم في تلك الزيارات، لا أذكر من بيتنا في «باسوس» إلا
ضخامة الفيلا التي يتحدث أبي عن تاريخها القديم جدًا بكل
فخر أمام أصدقاءنا في الإمارات، وعمرها الذي تجاوز مائة
وخسين سنة، وعلى الرغم من ذلك كانت بالنسبة لي مكانًا لا
يغري إطلاقًا بنعيش، ولم أكن أعلم لذلك سببًا حتى عدنا إليها
ذلك الصيف.

من يُصدق أن الكهرباء لا تزال تنقطع ونحن في نهاية
التسعينيات ونُوشك أن نبدأ الألفية؟! لا أعلم هل تغير الأمر
أم أنني سأعاني؟

في كل الأحوال لا أملك إلا الطاعة، خاصة عند صدور
قرار السيد «إبراهيم الخولي»؛ أبي رجل الأعمال المشهور في مصر
و«باسوس»، فهو فرد من أكبر عائلات البلدة، وفي الإمارات
أيضًا؛ لما حققه من نجاح كبير في عمله، لم أجرؤ على التحدث
بما يدور في نفسي من خوف وقلق لأبي، كانت شخصيته صارمة
يصعب التعامل معها، وأمي لم تكن تملك من أمرها شيئًا، أو رُبما

لا تهتم كثيرًا أين تعيش، فأني مكان ستعيش فيه سيكون مُرفهًا كما تعودت، فهي أيضًا تنتمي لإحدى أكبر عائلات «باسوس»، ثم إنها تتأقلم بسرعة غريبة على أي شيء جديد، لم أستطع البوح بأنني لا أحب الفيلا التي يتحاكى عنها أهل البلدة، حتى إنها أصبحت علامة مُميزة للغرباء ليهدتوا إلى وجهتهم.

بسرعة كبيرة تمت إجراءات النقل وتصفية غالبية أعمال أبي، هكذا ببساطة تتبدل حياتك وأحوالك ولا تملك من أمرك شيئًا، لمجرد أنك قاصر وتحت السن القانونية التي تؤهلك أن تتولى مصيرك بنفسك، وحتى لو كان عمري عشرين عامًا، ما كنت لأفعل شيئًا دون موافقة أبي ومباركته، ثم شحن أشياءنا الكثيرة وحقائبنا إلى مصر قبل يومين من السفر ولم يتبقَّ إلا أشياء بسيطة شخصية، سألت نفسي لماذا نبني آمالًا ونخطط لمستقبل لا ندري ولا نضمن منه شيئًا؟ حتى نحن نتغير وغير باقين! إذن لماذا كل هذا التعب والشقاء والأحلام؟ ولم كان السفر من البداية؟ وما السر في العودة الآن؟ بعد هذه الأسئلة التي لم أستطع الإجابة عنها، استسلمت في هدوء أو لامبالاة وودعت المنزل الأنيق الذي شهد على أحلام كثيرة وطفولة أحببتها كثيرًا، ثم غادرت معهم إلى المطار، إلى بلدنا «مصر».

عند إقلاع الطائرة أحسست أنني أترك ورائي سنوات

أحببتها، تذكرت أقرباءنا الذين كانوا دومًا يقولون إن العمر مهما طال قصير، وإن الذكي من يستمتع باللحظة الحالية، فقررت أن أستغل كل الفرص المتاحة لأستمتع بوقتي كما أريد، نظرت إلى الخليج بالأسفل ووعدته بزيارات أخرى قريبة، هذا ما أستطيع أن أطلبه من أبي، لم أشعر بالهبوط الذي بدا سلسًا لأنه لم يوقظني من نومي، ابتسمت أُمي الجالسة بجواري وعيناها تلمعان وقالت: «حمد الله على السلامة يا آدم».. وصلنا «مصر».

كانت سيارة فارهة تقف في استقبالنا لتُقلنا إلى باسوس، لم أشعر بالطريق من كثرة التفكير، توقفت السيارة أمام فيلا فخمة تطل على النيل مباشرة، شعرت للحظة أنني أراها لأول مرة، فيلا الباسوس.

فتح الخفير «أبو محمد» البوابة الحديدية السوداء الضخمة، عبرت السيارة محمًا مُهدًا وسط الحديقة الكبيرة، تنتشر فيها مقاعد خشبية بنية اللون، ثم توقفت أمام باب الفيلا الرئيسي، بسرعة فتحت «أم محمد» زوجة الخفير الباب قبل وصولنا ووقفت وراءه مُبتسمة، كانت تنطق بمئات الكلمات المرحة والمهنتة في الدقيقة الواحدة، بادٍ عليها الفرح الشديد الذي شككت في صدقه، ثم أطلقت زغرودة عالية احتفاءً بدخولنا، دخل وراءنا «أبو محمد» وابنه «مروان» الذي كان في مثل سني تقريبًا حاملين حقائبنا،

سألتُ أمي: لماذا يطلقون عليها «أم محمد» وابنها الكبير يُدعى «مروان»؟ أليس لهم أسماء تخصهم؟ فأجابت أن ابنها البكري «محمد» توفي صغيراً في نفس يوم مولده إثر حادث، لذلك يُجبدان هذه الكُنية تخليداً للذكراه.

تأملت بهو الفيلا الواسع المطلي باللون الأبيض، يقابل الباب الخشبي الرئيسي مباشرة منضدة مستديرة خشبية عتيقة تستقبلك في وداعة عليها زهرية بها ورد صناعي ومفرش أبيض كبير وأنيق، عبرت هذه المساحة الودودة، ثم رأيت على اليمين مطبخاً هائل المساحة، بداخله باب يُفتح على درجات قليلة للأسفل تصله بالحديقة.

كان أبي قد حرص على إعادة تأسيس الفيلا من الداخل على أحدث النماذج في الخليج، فبجانب المطبخ حمام واسع أنيق، ثم سُلم خشبي عتيق بعده مباشرة ليصلك بالدور الثاني.

التفت بعيني قبل أن أتحرك فلمحت سلماً صغيراً موازياً يهبط للأسفل، إلى قبة الفيلا، فلم أعره انتباهاً، على جهة اليسار من مدخل البيت نزلت بضع درجات من الرُخام فوجدت صالة استقبال فخمة، كل رُكن بها يوحى بالأصالة والراقي، كانت الفيلا فخمة حقاً، لكنني لم أعلم ما سر هذا الثقل الذي جثم فوق صدري فور دخولها، وكانت الأحداث التي دارت في الأيام

اللاحقة دليلاً على صدق قلبي فيما أحسن.

كانت غرفتي تقع مباشرة إلى جوار السلم الخشبي، والحقيقة أنها كانت غرفة مريحة وواسعة، بها فراش كبير في المنتصف تماماً، يحده من جهة اليسار دولا ب كبير وعتيق يسمح باختفاء شخص بالغ داخله بالكامل وبأريحية كبيرة، وأمام الدولا ب منضدة تحمل تليفزيوناً صغيراً، ثم يقع بجانبه مكتب وكروسي صغير في أحد الأركان، بجانب المكتب كان باب البلكونة المطلة على الحديقة.

خرجت لأنظر منها وكأني أستكشف البيت الذي لم يُهمل أبي ترميمه وتأثيثه أبداً، ثم سعدت أمي وأبي على الدرج فأصدر صرياً عنيفاً ما زلت أتذكره، وقبل أن يصلا لغرفتهما قاطعت أمي شرودي وألقت تعليماتها الهامة - بالنسبة إليها - ثم اختفت في غرفتهما بالطابق العلوي.

الطابق الثاني لا يضم سوى غرفتي نوم: غرفة للضيوف والأخرى لأبي وأمي، وحمام صغير وتراس به بعض الكنب الصغير والكراسي وقليل من أصص الزرع بها نباتات ظل مهملة.

حاولت في بداية أيامي أن أحب البيت ولم أفجح، كنت شخصاً عملياً وأفضل الراحة ووسائل الترفيه الحديثة، ماذا

سوف أفعل وسط النيل والزرع والذباب نهارًا والبعوض ليلاً؟
لا أعلم ما الجميل والمُبهر في ذلك!
أما الشيء المقزز حقًا فكانت رائحة العفن التي تسيطر على
البيت ولا تذهب، رائحة أشبه برائحة الموت، في بادئ الأمر
ظننته أمي فأرًا أو ثعبانًا ميتًا، وارتعبت من كلمة ثعبان هذه عندما
سمعتها أول مرة، أيمن حقًا أن يوجد بالمنزل ثعابين؟ وقالت
أمي دون مبالاة:

- جازي، ما تنساش إننا في بلد زراعة.

وقد روت «أم محمد» أنهم يخرجون فتران وثعابين من البيت
كلما قاموا بتنظيفه، طلبت أمي منها إعادة تنظيفه مرة أخرى
ف فعلت، إلا أن رائحة العفن ظلت مُسيطرًا، فرجَّح أبي أن
مصدر الرائحة في الأغلب هو حيوان ميت ومتحلل في الحديقة،
فكلما هب نسيم جلبها إلينا.

لم أرتح لتفسيره هذا، وظل الثقل الجاثم فوق صدري يزيد
مع كل ليلة، حتى الليلة الأولى التي سمعت فيها صوت أنين
طفل صغير آتياً من القبو.

(٢)

«نوح»

«لكل باب مفتاح، وقيل إن مفتاح باب العلم حُسن السؤال
وحُسن الإصغاء».

عبارة سمعتها أثناء مروري بجانب أحد المساجد أثناء خطبة
صلاة الجمعة ذات مرة، سألت والدي من قائلها فهز رأسه نافيًا
علمه بها، كان شديد الحرص على تعليمي كل العادات والتقاليد
في سن صغيرة، كما حرص على أن أظل داخل جدران البيت
لفترة كبيرة من عمري؛ لخوفه الشديد والمبالغ فيه عليّ.

خُضت عدة محاولات بائسة للتحرر، استعنت فيها بأمي
بعير رجاء، كانت تُشدد في كل مرة على ضرورة الانصياع
لأوامر أبي دون مناقشة، تتبع منهجه بدقة في تربيته عدا بعض
الأمور، تنفذ أوامره بحذافيرها على الرغم من كونها شخصية
قوية وعنيدة، إلا أنها تتبعه اتباع المسحور وكأنه قد سيطر عليها
تمامًا، لم أعلم أهي طاعة تنبع من حُب أم خوف أم لإرضاء الله؟
لذلك لم يكن لي أصدقاء إلا أقل القليل من العائلة، العائلة فقط

لمزيد من الأمان كما يقول أبي، لم أعص له أمراً قط حتى كبرت
وبدأ يتقبل ضروريات الحياة التي تفرض علي أن أخرج وأعيش
كأقراني حياة طبيعية.

تحترم عائلتي كل الموروثات والقوانين وتطبقها وإن أصبح
بعضها بائناً، المستجدات مشكوك في أمرها، كنت أسمع أقراني
وقد ملأهم الشغف نحو كل جديد، لكنني لم أملك رفاهية هذا
الشغف إلا بعد أن أستاذن أبي، وفي الغالب لا يأذن؛ لذلك لم
أستطع أن أدع موروثاتي وشأنها، ولم أستطع أيضاً أن أظهر غير
الاحترام لكل من يُحِبُّها ويداوم عليها، لكنني حافظت على
تجنب كل ما يُغضب الله. هُنا في عائلتنا لا مجال للمزاح، يجب
أن تشغل بها يفيدك، يجب أن تُساعد العائلة فيما يقومون به
مهما بدا لك هذا العمل غير مُفيد، دائماً يُذكرني أبي أننا من عليّة
القوم وأشرفهم، وأن أجدادي كان لهم من الخير الوفير في مصر
والشام، وأثر فضلهم معروف في دول الخليج؛ لذلك لا بد من
اختيار صحبتي بدقة شديدة، والأهم أن تكون من العائلة.

في فيلا كبيرة بمنطقة «باسوس» تتوسط مزرعة ضخمة تطل
على النيل مباشرة، نشأت أنا «نوح عبدالله».. زُرعتُ بالحديقة
الكثير من أشجار الفاكهة حتى أصبحت وكأنها غابة استوائية،
سور ضخمة من الحجارة الكبيرة تدور مُتراسة حول الفيلا،

يعلوه عدد كبير من المصابيح الكهربائية التي تُنار ليلاً، يربط السور ببعضه باب كبير من الحديد في مدخل الفيلا الرئيسي من جهة النيل، وباب حديدي آخر أصغر في خلفية الفيلا يصلك بطريق إلى قلب باسوس.

الفيلا قديمة المعمار، تقع في منتصف الزراعة تقريباً، لتشكل منظرًا لن تنساه من روعة جماله، خاصة إذا كنت في وقت الفجر. «كُل الأشياء الجديدة مثيرة، إلى أن تُجرّبها، نرتشف رحيق مُتعتها الأولى، ثم نشرب منه بنهم، فيقل الشغف تدريجيًا، ثم نعتاد عليها فتُصبح عادية، ثم مُملة لأنها أصبحت مُتاحة أو في حيازتنا، تنطفئ شرارة الفضول وينخفت الضوء عنها شيئًا فشيئًا، فتهجرها في ضجر لنبحث عن تجربة جديدة، هكذا حال الدنيا فلا تبتس».. هكذا كان يردد أبي عندما أتحدث عن أمنية تجربة أي شيء جديد، دون أن يعطى للتجربة حقها من قيمة وعلم وخبرة.

في شبابه قرر أبي الاختلاط بعائلات مرموقة تناسب مكانة عائلته ونسبه الذي ينحدر منه، كان أبي «عبدالله» رجلًا بهي الطلعة، طويلًا وضحيمًا، له شعر بني أملس، وعينان واسعتان زرقاوان كالبحر العميق تعطيان نظرتيه عمقًا وحادّة وصلابة، تقول جدتي لأمي إنه يشبه جدي إلى حد كبير، كما أشبهها

أيضاً.. وكان أبي لا ينخرط في مجتمع إلا وأحبوه، نجح في تكوين صداقات عديدة، ثم تعرف إلى أمي «سارة» في إحدى الحفلات الصاخبة الشبابية، وكما تبدأ دائماً العلاقات، انجذاب.. فضول.. شغف.. اهتمام.. تعود.. تعلق.. تردد ثم حب، ثم حدث ما حدث من تسلسل مُكرر عبر الأزمنة لا ابتكار فيه فجئت أنا إلى الدنيا دون مشورتي.

كنا نعيش في باسوس، وكنت أحب هذا المكان دون غيره رغم قلة تنقلاتي خارجه، ورغم أنني لم أتنقل بباسوس كثيراً رغم أنها ليست شاسعة المساحة، لكنني أحببت البيت وارتحت إلى هدوئه المريح كثيراً.

المنزل دائماً هادئ وكذلك كانت عائلتنا. لم يُعكر صفو الهدوء إلا بُكاء أطفال خفير الفيلا وعلو صوت زوجته في بعض الأحيان، رجل طيب مُطيع لأوامر أبي وكذلك كانت زوجته مُطبعة، تُذكرني بأمي في خنوعها.

وكان أكثر ما أهواه هو النيل وصفحته الرائقة المريحة للعين، أدمنت سحر النيل، سكونه ومكره، دواماته الصغيرة التي لا تأتي تباغاً، حاولت أن أتعلم منه الصبر والتأمل، تمنيت أن أتجول كثيراً فيه عبر مركب بمفردي ليلاً على ضوء القمر، لكن رفض أبي القاطع جعلني لا أحدث نفسي بالفكرة مرة أخرى.

كانت الأحداث رتيبة إلا من بعض المشاحنات بين أبي وأمي أحياناً، والتي ينتصر فيها أبي على الدوام، تنقضي الأيام على مهل في روتين يومي، أحياناً يقطع بعض الزيارات المعلومة مسبقاً من أصدقاء أبي ومعارفه من العائلات المرموقة، أو بعض الزيارات المفاجئة من أصدقاء أمي والتي لم يكن أبي يجيئها على الإطلاق، ومع الوقت وتكرار المشاحنات بسبب عدم رغبته في الاختلاط انقطعت الصلات تدريجياً حتى أصبحت أعيش أنا وأمي في عزلة تامة عن عالمنا تقريباً.

أقبل الليل أثناء انشغالي بالتفكير وسمعت صوت ضحككات بعيدة، سألت بعض الخدم فأجمعوا على عدم سماعهم شيئاً، خرجت خلسة لأعرف مصدرها؛ فأنا أحب أن أستمع لأصوات الساهرين والجميع في سكون. فعرفت بأمر الجيران الجدد. فابتهجت وقلت: ربما يكون لي نصيب في صحبة قريبة. ولم أكن أعلم أنها بداية جديدة لأيام صعبة وقاسية.

(٣)

«آدم»

تشجعت ليلاً وخرجت أتجول في الحديقة بمفردي بعد أن تملكني الملل، أنا شخص مباشر وأكره الفصول الانتقالية، أحب الشتاء أو الصيف، الأبيض أو الأسود، أحب الشيء أو نقيضه، لكنني أحب صراحتها، لا أحب مياعة الأشياء حتى ولو كانت فصولاً كالربيع والخريف، كُنت أحاول جاهداً استقبال فصل الربيع، لكن الهدوء في الحديقة يجعلني أسمع أصواتاً كثيرة، حفيف الزرع وأصوات الضفادع، وقلت لنفسي: «أنحن في الأحراش أم ماذا؟ ما كل هذه الأصوات؟».

كانت أشياء لم أعتد عليها أثناء فترة إقامتي في الإمارات، ومنذ أن انتقلنا إلى «باسوس» وأنا أشعر كأنني في غابة، أتمنى حدوث أي شيء يذهب ذلك الملل بعيداً، صرت أحلم بمغامرة مثيرة تمحو هذا الملل بأي طريقة.

صوت ضحكات أبي وأمي يأتيني مُتتابعاً على فترات قصيرة من الدور العلوي، فهنيئنا ولان العشاء في التراس على النيل كما

يُجبان، أو بالأحرى يهربان من رائحة العفن في البيت، في بادئ الأمر كانت تنتشر في البيت كله، لكن الغريب أنها بدأت تنتقل معنا في أماكن تواجدنا في البيت! تتحدى في ثبات جميع روائح المنظفات النفاذة، تقف صامدة أمام كل محاولات النظافة الممكنة. أنهى والداي عشاءهما ثم دخلا الغرفة فخفت أصواتها وخفت كذلك أغلب أنوار البيت، الهدوء هنا يجعلني أسمع ديب النمل، كنت قد سرقت من سجائر أبي دون أن يشعر سيجارة أو اثنتين لن يشعر بهما، أمسكتها بيدي دون أن أشعلها، وواصلت السير في الحديقة فوجدت الباب الحديدي مُواربًا، ناديت الخفير فلم ألاحظه في مكانه، في طريقي إلي غرفته رأيت شخصًا يدخل من الباب الحديدي لكنه لم يرني، أخيرًا أرى أشخاصًا آخرين، كان يبدو أكبر مني سنًا بقليل، ينم مظهره عن نفس مستواي الاجتماعي، وكان هذا مهتمًا بالنسبة لي، تعلمت من والدي تلك الأمور، فأصبحت أنظر إلى ما يرتديه الناس لأعلم مستواهم المادي والاجتماعي، ذهبت إليه وسألته:

- بتدور على حد؟

انتفض كما لو كان لصًا ينوي سرقة المكان، ولم يتوقع أحدًا، لكن هيئته لا تُوحى بذلك، نظر إليّ وحاول أن يبتسم ولم يُجيبني، أعدت سؤاله عليه:

- بتدور على حد؟ أساعدك؟

نظر إلى مرة أخرى سريعاً نظرة مُتفحصة ثم أجاب بتلقائية:

- كنت بدور على حد أولع منه، بس واضح إن الغفير مش

موجود..

نظرت إلى سيجارة بيده غير مُشتعلة ووجدتها من نفس

الماركة التي يدخنها أبي، نظرت إلى غرفة «عم محمد» فأردفت:

- هو شكله فعلاً مش موجود، مش عارف راح فين؟ بابا

منبه عليه ميسيش باب الفيلا مفتوح! كويس إنه مشافوش.

نظر إلى الحديقة وإلى الفيلا نظرة شاملة وتحدث في ود:

- معروف إن «إبراهيم الخولي» راجل دقيق جداً.

أعجبني ما سمعت منه فأردفت في غرور حاولت أن أخفيه:

- إنت تعرف بابا؟

- إنت «آدم».. مضبوط؟

أعجبت أكثر لمعرفته باسمي، وابتسمت في غرور واضح

مُردفاً:

- إنت عارف العيلة كلها بقي!

- مين في «باسوس» ميعرفش عيلة الخولي؟

مرت لحظات ارتسمت ملامح الفخر على وجهي وكأني

إقطاعي ابن إقطاعي أصيل، قاطع لحظاتي المُفضلة وأردف كأنه

نسي شيئاً ثم قال:

- أنا «نوح».. نوح عبدالله. جارك هنا مش بعيد.

- أهلا بيك.. وأنا «آدم الخوي» زي ما انت عارف.

ابتسم «نوح» ابتسامة عريضة في ود، فكان عرضي بالدخول

للبيت وقد ارتاحت نفسي إليه:

- طيب ما تدخل نقعد شوية.

- لا معلى دلوقتي صعب، الوقت اتأخر على إننا ندخل

البيت، وبعدين إحنا ممكن نتقابل أي وقت.. إيه رأيك؟

- يا ريت ده أنا قاعد هنا الملل هيقتلني.

ضحك «نوح» بصوت عالٍ وأكمل:

- أكيد هنا مش زي الإمارات.

اختفت بسمتي ونظرت له مُتوجساً:

- حتى دي عارفها كمان؟

نظر إلي في ثقة وأردف:

- يا «آدم» إحنا هنا في «باسوس»، كل حاجة بتعملها

هتتعرف، وبعدين ما البلد كلها عارفة خط سيركم، من قبل ما

تسيبوا مصر حتى.. كتوفين وجيتو إمتى وليه، متستغربش.

اندهشت مما قال وسألت:

- يا سلام.. وفين خصوصية الناس هنا؟

أطلق «نوح» ضحكة عالية أخرى ونظر إلى شرفة والدي فوق..

- لا أنت كده شكلك عشت بره كثير ومحتاج تفهم الدنيا هنا ماشية ازاي، عموماً خليني أشوفك تاني، بالنهار بقى.. كفاية كده بدل ما الناس تصحى.

- ما تخليك معايا شوية ولا انت وراك حاجة؟

غلبني الفضول لأتعرف على شخصيات جديدة، وكنت قد بدأت أعتقد أنا سنصبح أصدقاء سريعاً، طلبت منه أن يبقى على غير عادتي مع من أقابله لأول مرة، لكنتي كنت في أشد الحاجة إلى صديق في مثل سني أو سن مقاربة أتحدث معه ولو لوقت قصير؛ لذلك بينما كنت أتحدث مشيت نحو مقعد خشبي وسط الأشجار لتجلس، ليمشي معي ويجلس رغماً عنه وقد كان، سار «نوح» إلى حيث اتجهت، لكنه لم يجلس معي.

نظر «نوح» بقلق ناحية البيت والباب الحديدي الرئيسي للفيلا وأردف في تردد:

- معلىش.. أهلي ممكن يقلقوا.. وكان مش عايز أقلق أهلك.. الوقت اتأخر فعلاً.

- طيب، أنا مش هغصب عليك طبعاً، لكن بصراحة زهقان ومفيش حته هنا أروحها ولا أصحاب.

بدا عليه التعاطف وجلس على طرف المقعد الخشبي،
تفقدت المكان حولي لأتأكد من عدم وجود أحدٍ ثم أشعلت
سيجارتِي، نظر إليّ وابتسم فأشعلت سيجارته هو الآخر، وبدأنا
ننفض الدخان أمامنا، ثم سألتني في اهتمام:

- ملكش أصحاب في «باسوس» خالص؟

- واحد بس، اسمه «حسن».. بس هو مع أهله دلوقتي في
القاهرة، بيعجوا كل أسبوع ويمكن يقعد شوية، وعموماً آخر كام
سنة مكنتش بشوفه إلا في زيارات قليلة، بس أنا كلمته وعرفته
إننا استقرينا هنا خلاص وسبنا الإمارات، فأكيد هيعدي أول ما
يقدر.

- معلىش أنا حاسس بيك وفاهم انت تقصد إيه، بكرة تاخذ
على الجوهنا وتجبه.

نظر «نوح» للسماء وسرح للحظات كأنه يتذكر شيئاً ثم قام
من مجلسه فجأة وقال:

- معلىش بقى لازم أروح دلوقتي حالاً.. مبسوط إننا
اتقابلنا.. هتقابل تاني أكيد.

- مش هقولك خليك تاني بقى، ابقى عدي عليا.. عندي
بلاي ستيشن ممكن نلعب سوا، أو حتى نخرج.

- تمام. تمام.. أنا الصبح يبقى مش فاضي علشان الدراسة،

خلينا بعد الظهر.

- اتفقنا.. بس مش عايز أعطلك عن حاجة برضه.

ابتسم «نوح» وبدأ عليه الورد وأردف:

- لا أنا منظم الدنيا، هجيلك متخافش، إنت بتدرس فين

يا آدم؟

- بابا قدم ورقى في مدرسة في القاهرة.. لكن لسه بدري

على الدراسة.

- هتنسبط في القاهرة لو بتحب الدوشة..

- يا ريت.. طيب خذ رقم تليفون البيت واوعدني بقى انك

تيجي تاني.

أعطيته رقم الهاتف الأرضي شفهيًا، أتمنى لو أمتلك مثل هذا

الهاتف المحمول الذي يملكه أبي ولا يتحدث فيه إلا في حالات

الطوارئ! رحل «نوح» ودخلت إلى الفيلا وأغلقت الباب،

نظرت إلى الورد الصناعي على المنضدة أمامي ولاحظت أن «أم

محمد» قد بدلته بورد طبيعي، رن جرس الهاتف فأجبت، عندها

سمعت صوت «حسن» ففرحت بشدة.. يبدو أن الأصدقاء

سيجتمعون قريبًا وسيرحل الملل، قلت لحسن:

- جهاز نفسك لقعدات البلاي ستيشن بقى.

- أنا جاهز يا عم آدم.. أبويا وأمي خارجين بكرة تعال

نخليها عندي..

- مش مهم عندي عندك.. المهم ميشوقوناش علشان
الدوشة..

- اتفقنا.

أغلقت الهاتف وعند التفاتي خيل إلي أنني رأيت كلبًا
أسود ضخماً يصعد السلم الخشبي فكاد قلبي يتوقف! مشيت
على أطراف أصابعي كي لا أحدث صوتاً، ووجدت أنه لم يعد
موجوداً، تفقدت المكان فلم أجد شيئاً، ثم رأيت الورد وقد
تبدل إلى صناعي مرة أخرى! اقتربت منه لأتأكد فوجدت أنه
صناعي بالفعل، لا بد أن عيني خانتني أو أنه مصنوع بحرفية
شديدة، صعدت بضع درجات على السلم ونظرت لأعلى فإذا
بي أرى رأس الكلب يطل عليّ من فوق ويحدق بي! ارتعبت ولم
أدر ماذا أفعل. تماكنت نفسي وناديت أمي بصوت عالٍ، لكنها
لم تجبني، ناديت مرة ثانية بصوت أعلى فسمعت صوت غرفتها
يُفتح ورأيت النور يضيء الدور العلوي ثم اختفى وجه الكلب!
سألت أمي بصوت يفلبه النعاس:

- أيوة يا آدم.. كل ده صاحي؟

صَحْتُ بصوت عالٍ:

- ماما.. في كلب كبير عندكم فوق!!



(٤)

«فوح»

في يوم قريب كنت بصحبة «آدم» نجلس معًا في مكان لا أذكر منه إلا مياهًا جارية وأشجارًا كثيفة وطقسًا جميلًا، جلسنا بالقرب من المياه نتحدث، نضحك ونلعب، ثم جرى حديث طويل بيننا لا أتذكره، ثم رأيت ابتسامته تختفي تدريجيًا، نظرت إلي وقد تبدلت هيئته وفجأة وجدته وقد تحول إلى مسخ خفيف، صرخت بشدة بينما ضحك آدم ضحكة عالية وأوشك أن يؤذيني دون أن أفعل له أي شيء يستحق الأذى، بعدها رأيت أبي وبعض حراسه يأتون لحمايتي، طار «آدم» فجأة في الهواء إلى مكان عالٍ بالسما والختفى تمامًا.

هنا استيقظت فزعًا مما رأيت وقد خيل إلي أني لمحت خيال أبي بالغرفة! وأنت أمي مهرولة لتطمئن علي، لا بد أنني أحدثت صوتًا عاليًا أثناء الحلم المفزع هذا، استعدت توازني على مهل وطمأنتها علي وطلبت منها أن تذهب لتستريح.

جلست شاردًا أفكر فيما رأيت، ما سبب هذا الحلم، أم أنها

رؤيا؟ هل من الممكن أن يؤذيني «آدم» دون سبب؟ ولماذا رأيت
بهذه الهيئة الشريرة؟ لا يوحى منظره لي أنه شخص شرير.. لا
أعتقد هذا بل أعتقد أنه سيحميني إذا صرنا أصدقاء وتطلب
الأمر ذلك، علمت أن والديه اضطررا أن يتركاه وسيسافران لعام
كامل قريبا، وسيتركان آدم وحده بالمنزل مع البواب وزوجته!
أخذت أفكر فيما نستطيع أن نفعله معاً على سبيل المغامرة،
ثم توجه تفكيري لمنطقة أخرى.. لماذا لا يفعل أبي مثلما يفعل
أبو آدم؟ لماذا لا يثق في قدرتي على الاعتماد على نفسي؟ جزء مني
شعر بالغيرة لكونهم اعتبروه رجلاً وهو في الثالثة عشرة! أما أنا
فيعاملونني كطفل، متى سأصبح مسؤولاً في نظر أبي؟ على كل
حال، الجزء الآخر مني شعر بالفرحة لغيابهم، الآن أستطيع أن
أقابل «آدم» كثيراً دون عناء إزعاجهم، أثناء تأملي لحالي وحال
«آدم» لم أنتبه لدخول أبي الغرفة، قُمت واقفاً احتراماً وفرحاً فلم
أدر بوجوده.

نظر إلي أبي في شك وقال:

- محستش بيا خالص يا «نوح»! إيه اللي شاغلك كده؟

- أبداً مفيش حاجة.

- والدتك بتقول انك صحيت من التوم مفزوع..

- لا أبداً.

- بتقول شكله كابوس اللي خلاك تتفرع؟

- تقريبًا كابوس..

ازدادت نظرة الشك في عين أبي.. جلس واسترسل في

هدوء:

- عارف يا نوح.. أنا كان نفسي يبقى لك اخوات أكثر

علشان نبقى عزوة، لكن بعد ما جيت اكتشفت إني بخاف عليك

بشكل كبير، وده خلاني أستبعد الفكرة، عمومًا أنا بتحذرك

تتعرف على أي حد غريب عننا.. أي حد بره العيلة ممنوع إنك

تعرفه.

قاطعته مُتَعْجَبًا:

- ليه؟!

- أنا خايف عليك. خايف من فضولك لأنك ممكن تنخدع

في حد وتجه وتثق فيه. والمصيبة انك تفتكره صديق، وهو في

الحقيقة عدو ممكن يؤذيك.

- لو حيت حد ووثقت فيه تبقى مشكلة؟!

- تاني الحب.. بص يا نوح. الحب في العموم مجرد فكرة

إحنا اللي بنكبرها لحد ما تملأ علينا حياتنا، والفضول أكبر

عدو لينا، يكبر الفضول ويتحول لشغف وبعدين تتعود ويبقى

إدمان، والإدمان يبقى روتين يظمنك إنه باقي معاك والحقيقة إن

مفيش حاجة باقية، لحد ما تتوفر كل أركان الخدعة، الفخ اللي الكل بيقع فيه بمزاجه وهو مبسوط، لكن الجميل في الموضوع إن نفس الفكرة دي نقدر ندفننها في الأول ونسيطر عليها بدل ما تسيطر هي علينا، لأنها ببساطة بقت مُكررة وملهاش طعم، الحب مُحاطرة كبيرة، مهما تكسب فيها حاجات ممكن تخسر كل حاجة في الآخر، وتعافر علشان تقوم تاني، الحب خدعة كبيرة.

- ليه حضرتك بتقولي الكلام ده دلوقتي؟ وإيه علاقة كل ده

بسؤالك عن الكابوس!

- حبيت أنور لك طريقك لو مش عايز تحكي حاجة، علشان مستقش في حد، خاصة لو مش من عيلتك، أظن كلامي واضح؟

- يعني أفهم من كلامك إنك محبتش أمي؟

- يا ابني مش يقصد الحب ده.. حب أمك حاجة وحب الناس حاجة تانية، أنا بتكلم على الأصحاب يا نوح، أنا عارف إن الصاحب لما يحب صاحبه بيبقى وفي له قد إيه، أنا بفهمك إن بره حدود البيت ده واللي عايشين فيه القوانين تختلف، متآمنش لحد، إنت عمرك ما هتلق في حد إلا لو بتحبه، وأنا بحذرك من ده، أنا مقدرش أضمن نوايا حد لكن أقدر أحميك، ثقتك في أهلك.. في عيلتك، عيلتك وبس.

نظرت إليه وبدأت أستوعب مقصده، بالتأكيد علم أبي
بصداقتي مع آدم، وكالعادة لا يريدني أن أصادق أحداً خارج
نطاق العائلة، هل صحيح ما يقول أبي؟ أهذه الدرجة لا يُريدنا
أن نُصبح حتى أصدقاء؟ ألا يُمكن أن نُصبح حقاً أصدقاء نثق في
بعضنا البعض؟ يساند بعضنا البعض؟ لكن لماذا؟ هل نحن من
تزرع فكرة الحب في أنفسنا ونرويها كما تقول نظرية أبي؟
شردت ثم تذكرت نصيحة أمي ذات يوم عند الحيرة في أمر
«استفتِ قلبك»، قالها الرسول كما علمتني وشرحت لي معني
الحديث الشريف، أشعر وكأنني علي القيام بذلك الآن.. الآن يا
أبي سوف أستفتي قلبي.

(٥)

«آدم»

في الليلة التالية كان أبي يتحدث مع البواب قائلاً:

- حصل اللي مكنش في الحُسيان، مش عارف أعمل إيه؟
 مش معرف آخذ آدم معايا الإمارات، وكان مش هعرف أسيب
 أمه هنا، دورها مهم جداً في المكتب، ماسكة تفاصيل المشاريع
 كلها وصعب أسند الشغل لحد ثاني، والحمد لله إنها معايا
 ومسانداني ومش معترضة، المشكلة حالياً في آدم، هيقعد لوحده
 ازاي، في كل الأحوال لازم يتعود، آدم كبر وبقى راجل، وأنا
 في السن ده كنت شايل مسئولية، أعتقد أقدر أسيبه لوحده سنة
 وأنا مش قلقان، أما عيلة «السعدني» ولا تقدر تهوب ناحيته،
 هما عارفين كويس رد فعل ولاد «الخولي» هيكون إيه لو لمسوا
 شعرة من ابني، وبعدين في مصلحة بيننا دلوقتي بس لسه بفكر
 فيها، عارف يا عم محمد.. لو أعرف من الأول إني هرجع ثاني
 الإمارات كنت سبت آدم هناك أحسن له يكمل دراسة السنادي
 كمان، لكن القدر بقي.. هعمل إيه؟

أخزنتي ما سمعت جدًا، سأعيش هنا وحدي لعام كامل؟
حدثت نفسي بعد سماعي حديث أبي إلى «عم محمد» الخفير،
سيتركني بمفردي في «باسوس»، فقط ظرف مليء بالنقود
لمصاريف البيت كاملة، أما دون ذلك فمستوليتي وحدي.

ناداني أبي بوجه مُقتضب تحسبًا لرد فعلي، وتمت المواجهة،
استقبلت ما قاله ببرود ولم أدرِ ماذا أقول، كانت مُواجهته أشبه
بإلقاء محاضرة وإعطاء أوامر وتوجيهات كثيرة، «لا تُدخل
الغرباء البيت لأنك مطمع، لا تسهر خارج البيت، لا تثق
بأحد، لا.. لا.. لا..».. كثير من «لا»، قليل من «افعل»، أما «لا
تغضب» و«لا تحزن» و«اهتم بنفسك» أو «هتوحشنا» فليست في
قائمة أبي، لكن لا بأس لقد اعتدت على هذا وتأقلمت معه.

في المطار ودعتها في هدوء ووعدها بالالتزام بتعليماتها
الكثيرة التي لم أصغ إليها، عدت إلى فيلا الباسوس بصحبة
السائق، وكان الليل قد حل في طريق العودة، لم أفهم حقيقة
شعوري، هل أغضب منها؟ أم أفرح لأنني حُر الآن ولمدة سنة؟
لكن على ذكر الأعراب نسيت أن أخبره عن «نوح»، على أية حال
سوف يخبره «عم محمد» في نشرة أخباره، بالتأكيد يعرف عائلته،
لكن لا بأس فأنا أرتاح إليه ولا أبالي بتعاليم أبي.

وصلنا إلى الفيلا، وفتح «عم محمد» البوابة الحديدية الرئيسية

م اردت انك تبصره بى عرسى واحسنت اباب، هل رايت
راقصة الباليه في اللوحة التي كانت معلقة بالخارج تبكي؟! أم
أنها التهيؤات المريبة كالعادة؟ لا بد أنه إحساسي الداخلي الراغب
في البكاء من الوحدة القاتلة والكآبة الشديدة التي انتابتنى.

بدلت ملابسي وحاولت النوم فلم أستطع، كُنت أفكر فيما
حدث ولا أستطيع استيعابه.

كيف يستطيع أب طبعي وأم طبعية أن يتركا ابنهما الذي
لم يكمل الرابعة عشرة بعدُ بمفرده في هذا العمر! هل أصبحت
رجلاً كما يقول أبي؟ هل يَأْتَمنان الخفير وزوجته إلى هذا الحد
ليتركا ابنهما الوحيد معها؟ ما هي خبراتي في الحياة كي أعيش
عامًا كاملاً وحيدًا هكذا؟ وما العذر القهري الذي يسبب ذلك؟
جلست شاردًا لا أجد أية إجابات شافية وقد أيقنت أنني في
النهاية قد تُركت وحيدًا تفترسني هذه الفيلا الكئيبة.

بعد قليل جاءني صوت خبطات منتظمة متقطعة على باب الغرفة، أفاقتني من شرودي، ليس هناك في البيت إلا «أم محمد» وهذا ليس أسلوبها في الاستئذان، أيمن أن يكون أحد أفراد عائلة «السعدني»؟ ماذا سيفعلون بي وقد أصبحت وحيداً، سمعت الكثير عن المتجازر بين عائلات «باسوس» كل عدة سنوات، لم أسأل يوماً عن السبب لأنني لن أفهمه، فأنا لم أعش هنا بالقدر الكافي الذي يتيح لي فهم هذه الثقافات والموروثات الغريبة والعتيقة.. جاءت دقات الباب مرة ثانية في إصرار وانتظام، استجمعت قواي وسألت بصوت حاولت أن يبدو حسناً:

- مين بيخبط؟

جاءني صوت «أم محمد» من وراء الباب:

- أنا «أم محمد»..

تنفست الصعداء عندما سمعت صوتها، لا لم أصبح رجلاً بعد، أم أن الرجال تخاف كما تخاف الصبية والنساء؟ أجبتهما وقد رجعت نبرة صوتي الأصلية.

- ادخلي يا «أم محمد»..

دخلت «أم محمد» ورأيت في عينيها شفقة تحاول أن تخفيها

فتبسمت:

- لازم تاكل يا «آدم»، الست موصياني عليك، أنا صحيح
مش في مقامها لكن باعتبارك زي مروان رينا يعلم.
- شكراً يا «أم محمد» أنا كويس متقلقيش وفعلاً مش جعان،
بس انتي هتنزلي بدري ليه النهارده؟
- «أبو محمد» رايح مشوار على السريع كده ولازم أقعد
بالعيال.

- ومروان راح فين؟
- عيل فلتان.. تلاقيه هنا ولا هنا مع أصحابه.
- طيب روحي انتي ولو احتاجتك أنا هبقى أجيلك.
- عملتلك طبق جاهز بره على السفارة بس نخطه في
الميكرويف، وفي أكل في التلاجة لو جُعت تاني، ولو احتجت
حاجة بس نادي عليا من البلكونة هجيلك على طول.
أغلقت باب الغرفة وسمعت صوت خطواتها تُغادر، أردت
أن أشعل السيجارة المُتبقيّة لدي لكنني لم أجدها، أيمن أن تلقي
أم محمد بها في القمامة؟ كل شيء جائر.. المهم ألا تُخبر أمي..
بعد دقائق قليلة بدأت رائحة الموت العفنة التي اعتدت على
وجودها تظهر في المكان، تعلمت أن أتجاهل هذه الرائحة التي لا
حل لها، فقد أصبحت تتقل معي أينما ذهبت، ثم سمعت صوت
الباب الخشبي الكبير يُفتح ويُغلق بهدوء، لقد رحل الجميع إذاً

وأصبحت وحيدًا تمامًا للمرة الأولى في حياتي.

بدلت ملابسي وأغلقت نور الغرفة وحاولت النوم، بالفعل غفوت سريعًا لكنني سمعت صوتًا واضحًا لصرير السلم الخشبي.. وكان واضحًا ومزعجًا، استيقظت في حالة هذيان ما بين النوم والصحيان، وقد تهيأ لي أن والدي ووالدتي بالبيت وأحدهما ينزل أو يصعد على السلم.

بعد لحظات انتبهت إلى أنني في البيت وحيدًا الآن، فاضطربت دقات قلبي فجأة وأنا أنظر إلى باب الغرفة، وتساءلت عمّن يمكن أن يكون بالخارج يتحرك بهذه الحرية صعودًا وهبوطًا على السلم، وأخذت الأفكار المرعبة تدور في رأسي: ترى هل سأقتل مذبحًا أم سيكون قتلاً رحيمًا سريعًا؟ أم سيخطفونني لتسوية حسابات بين العائلات؟ بات واضحًا أن عائلة «السعدني» لن تتركني وشأني، أتمنى لو يفعل صديقي «حسن» شيئًا من أجلي، أم أن لقبه لن يشفع لي في تلك الأمور؟

بدلت ملابسي سريعًا تحسبًا لأي شيء، ثم فتحت الباب في ترقب ونظرت إلى صالة الاستقبال فوجدتها خالية تمامًا، نظرت إلى السلم وإلى أعلى في ترقب، لكن صوتًا غريبًا أتى من المطبخ وكان أناسًا كثيرين يتحدثون، أسمع أصواتًا خافتة غير واضحة، ذهبت إلى المطبخ ودخلت إليه في رعب وقدمائي ترتجفان..

تجولت في المطبخ ثم الحمام فلم أجد شيئاً، قررت أن أصعد لأعلى
ربما كان المتسلل قد قصد غرفة والدي، لكنني تجاهلت الأمر،
أو أنني خفت من المجهول الذي لا أعرفه، فدخلت غرفتي مرة
أخرى وأغلقت الباب من الداخل جيداً، بعد لحظات أصدر
السلم صوت الصرير الذي أزعجني منذ قليل، هذا دليل على
أنني لست وحيداً وأن أحدهم بالمنزل، بقي السؤال الأهم في
ذهني: ماذا أفعل حين يواجهني؟

أحسست للحظة بالجبن، هذا منزلي وهذه ممتلكاتي وقد
تركني والدي نائباً عنه، أخذتني نوبة مفاجئة من الشجاعة
وعزمت على إلقاء نظرة على الطابق العلوي، فتحت باب غرفتي
في هدوء، ومشيت على أطراف أصابعي حتى لا يُصدر السلم
صريره السخيف، بعد أن صعدت رأيت ستارة البلكونة في
التراس تطير في الهواء، واستقبلتني رائحة الموت التي تأقلمت
معها، شبك البلكونة الخشبي ترك مفتوحاً، رُبما للتهوية، فتحت
باب الحمام الصغير وكان شاغراً فأغلقتة، وجدت باب غرفة أبي
وأمي مفتوحاً أيضاً مما زاد من شكّي في أن المتسلل هذا كان يقصد
غرفة والدي، كانت الغرفة مظلمة، دخلت وأضأتها.. لا يوجد
أحد، لم يتبقَّ إلا غرفة الضيوف الشاغرة، اقتربت منها في حذر
وفتحتها فجأة وأضأت أنوارها في سرعة فلم أجد أحداً، وقفت

أفكر للمحطات ثم دخلت اليكونة أحاول أن أتنفس بعض الهواء المنعش وقد اقترب منتصف الليل، وهنا لمحت «نوح» يدخل من الباب الحديدي بينما يغلقه الخفير خلفه ويتجه إلى غرفته، تهلل وجهي فرحًا وقد أتى ونس أخيرًا.. ناديته بأعلى صوتي.
- «نوح».. تعال.. اطلع.

نظر إلى الأعلى وأجابني بصوت خافت سمعته:

- ما تنزل انت عشان منصحيش حد. أنا قلت أعدي عليك شوية.. هسناك في الجنية.

- لا اطلع مفيش حد، أنا نازل أفتح لك باب الفيلا.

- ماشي... بس مش هقعد كثير..

هرعت فرحًا وكأنني أستنجد به، يا ليته يبقى معي الليل كله، فتحت الباب فوجدته واقفًا في ترقب..

- تعال يا نوح.. ادخل.

نظر «نوح» إلى الداخل نظرة سريعة..

- متأكد مفيش مشاكل؟ أصل الوقت متأخر برضه.

- يا ابني بقولك مفيش حد.. كلهم سافروا..

دخل نوح يمشي ببطء، أغلقت الباب ثم سبقته وجلسنا في

صالة الاستقبال، استرسل «نوح» مُعلقًا:

- يعني الكلام اللي سمعته صح؟ إنت قاعد لوحدك؟

أقلقتني كلامه جدًا، الأمور لا تخفى على أحد فعلاً في هذه

البلدة:

- يا شهر اسود.. يعني الموضوع انتشر؟

ابتسم «نوح» باستهزاء واسترسل:

- انتشر إيه يا ابني! إنت في «باسوس».. يعني كله يعرف

كل حاجة عن كله..

- وبعدين؟

- إنت مالك قلقان كده ليه؟ ولا خايف تقعد لوحدك؟

- خايف إيه بس؟ بقولك إيه.. ممعاكش سيجارة؟ مش

لاقي اللي كنت شايلها.

- لأ مش معايا..

نظرت إليه نظرة طويلة ذات مغزى وأكملت:

- طالما كله عارف كله.. يبقى أكيد تعرف حكايتنا مع عيلة

«السعدني»؟

- ومين ميعرفهاش؟

- بصراحة يا «نوح» أنا فعلاً خايف، من شوية اتهمبالي إن في

حد في البيت وإنه جاي يموتني.

نظر «نوح» إلى السلم الخشبي ثم تفحص صالة الاستقبال سريعاً

وتبدلت ملامحه قليلاً، رُبما لعناد أو تحدّ، لا أعلم تحديداً، وأردف:

- «آدم».. محدش هيقدر يثديك خالص متخافش، إنت إنسان طيب وميتهيأليش إنك ممكن تثدي مخلوق، ثم إن عيلة «السعدني» مهما كان في خلافات مش أخلاقهم يتهجموا على حد في سنك، ولو في حاجة تقلق للدرجة دي كان أبوك مستحيل يسيبك لو حدك..

نظرت خجلاً مما فعله أبي، فقد أصبحت علكة يلوكها أهل «باسوس» الآن على ما يبدو.. لكنه لم يبالي بمشاعري وأكمل حديثه:

- عموماً يا سيدي وعد مني هعدي عليك كل يوم بعد العشاء، متخافش... ولو في أي حاجة قولي وملكش دعوى، محدش هيقدر يقرب لك.

حاولت أن أبتسم وقلت في قلبي أحاول التخلص منه:

- أنا رايح الحمام ثواني وجاي..

أوماً إلى برأسه وذهبت إلى الحمام، بعد أن قضيت حاجتي حاولت فتح الباب لكنه لم يُفتح، حاولت مراراً وتكراراً دون جدوى، ثم رأيت الترباس الداخلي يُغلق من تلقاء نفسه! فركت عيني بشدة لعلني أتخيل ما أرى، مددت يدي المرتعشة كي أفتحه مرة أخرى لكنه اتغلق ببطء مرة أخرى دون أن أمسه! رجعت إلى وراء خطوتين ونزلت بضع قطرات عرق من جبهتي، أخذت

أفكر ماذا أفعل، ناديت علي «نوح» بصوت عاليٍ مرات عديدة دون جدوى، اقتربت من الباب وفتحت الترياس بسرعة لكن الترياس أغلق بسرعة أكبر قبل أن أمسك مقبض الباب! لم أعلم ماذا أفعل حينها لكنني أعلم أنني سمعت صوت رجل يضحك ثم رأيت الترياس يُفتح ببطء دون لمسه، ففتحت مقبض الباب بسرعة وهرعت خارجه لأجد «نوح» جالسًا في سكينه، تنفست ما تبقى من أنفاس وقلت لاهثًا والعرق يتصبب من كل جسدي:

- ناديت عليك كثير يا نوح حرام عليك... كل ده مسعتنيش؟

نظر إلي نوح في دهشة وقام من مكانه ينظر إلي وقال:

- مالك يا اني.. وايه كل العرق ده؟ إنت استحمست؟
- الترياس اللي جوه الحمام.. اتبيالي كان بيقتل ويفتح نوحده! وأعتقد سمعت حد بيضحك!
- اللي بيضحك الخفير بره كان بيتكلم مع حد وصوته عالي.
- لأ أنا متأكد إن الصوت كان في الحمام وده مش صوت الخفير، ويعدين أنا كل ده محبوس جوه.. بقالي كثير مش تظمن عليا؟

- بقالك كثير إيه يا ابني.. إنت لسه داخل من دقيقة! اقعد

كده واهدا.. واضح إن أعصابك تعبانة.

قمت من مكاني ذاهبًا إلى الباب الخشبي لأتفقد الخفير
وزوجته، فناداني «نوح»:
- رايح فين بس؟

- هبص على الغفير.. علشان كمان أخليه يفتح لك البوابة
لما تيجي ماشي.

- حاضر.. بص أنا هقوم أمشي يا آدم..

- اقعد يا عم مش قصدي بس كنت عايز أشوفه صاحي
ولا لا..

- طيب متخرجش دلوقتي على الأقل..

كُنت ممتنًا بشدة لوجود «نوح» معي ولو قليلًا.. التفتُّ إليه
في خوف وسألت:
- ليه؟

نظر إلي بملامح باردة وأردف:

- شكلك خايف وتعبان، وبعدين لو فعلاً في حد بيراقبك
ويخوفك أو حتى عايز يتذيك، ميبانش إنك متوتر كده، خليك
طبيعي، ثم إن وجودي هنا وانور المفتوح ده هيخلي الناس تفهم
إنك مش لوحده، ساعتها هيفكروا ألف مرة قبل ما يعملوا
حاجة.. ده على فرض إن في حد بيحاول يتذيك فعلاً.

نشيت ناحيته مرة أخرى وجلست.. نظرت إليه وأردفت

بعد لحظات:

- عندك حق.

ابتسم «نوح» ابتسامة واسعة ثم نهض واقفاً.. فسألته في

ذعر:

- رايح فين؟

- هروح.. أبويا شوية وهيقلب الدنيا عليا.

- إنت لسه جاي.. اقعد شوية معايا.

- هنتعد كثير بعدين. أظبط أموري بس عشان ما اتحبسش

إنت مش عارف صعوبة دخولي وخروجي مع أبويا.

- طيب هتيجي بكره أكيد؟

- أيوه بس انت متخافش.. واشرب حاجة دافية قبل ما

تنام، شكلك تعبان.

جاهدت كي أبدو طبيعياً وأردفت في قلق.

- مش خايف..

أوصلته إلى باب الفيلا لكنه أصر على أن أغلقه وأدخل

غرفتي لأستريح، وأردف في حزم أخ كبير:

- «آدم».. أنا هشوف الغفير فين وهخليه يقفل البوابة،

متخافش واجهد شوية، روح انت نام، تصبح على خير.

- وانت من أهله.

قلتها في عفوية ثم أغلقت الباب وذهبت إلى غرفتي وأغلقت بابها، استسلمت من شدة الخوف لما قال نوح ونفذته بالحرف، لأول مرة اليوم أشعر ببعض الأمان ولو كان همًا بعد رحيل أبي، أواجه مصيرًا لا دخل لي به وخوفًا لم أعتده، بعد دقائق سمعت صوت «عم محمد» يتشاجر مع أحدهم، ربما يتشاجر مع زوجته، ثم صوت البوابة الحديدية تُغلق.

في أول ليلة لي في البيت وحيدًا لم أستطع أن أغلق عيني في الظلام، تركت النور مضاءً، واستسلمت لنوم لم يكن عميقًا لكنه كان مليئًا بأحلام غريبة، أناس لم أرهم من قبل، يبدوون كعائلة، يتحدثون بصوت عالٍ أو أنهم كانوا يتشاجرون، لا أعلم.

قبل الفجر بقليل كانت المرة الأولى التي أشعر فيها بتلك اليد الغريبة التي سترافقني طويلاً للأيام القادمة.

في البداية أحسست بيد تربت على كتفي في حدة لتوقظني، استيقظت نصف واع أتلفت حولي دون إدراك، أول ما لفت انتباهي تلك الرائحة النتنة بقوة في الغرفة، لا بد أنه كابوسًا آخر، هكذا قلت لنفسي قبل أن أحاول العودة للنوم. لكن أذني التقطت صوت أدوات مائدة الطعام بالخارج، كأن أحد يأكل بينهم مُستخدمًا الشوكة والسكين وأصوات ارتطامها بالأطباق

تبدو جلية، كما رأيت النور بالخارج يضاء ويغلق من خلال الجزء الزجاجي العلوي بباب الغرفة.

أحسست بقلبي يكاد يتوقف، إنه الطبق الذي تركته «أم محمد»، ثم إنني مُتأكد أنني سمعت البوابة الحديدية تُغلق، ومُستحيل أن يغادر الحفير مكانه في هذه الساعة؛ فليس له مأوى آخر غير بيتنا، وليس من طبيعته السهر إلى هذا الوقت، إذن من بالخارج؟ هل أخرج لأستكشف أم أبقى مكاني آمناً؟ وتذكرت اليد العنيفة التي أيقظتني من نومي في البداية فارتعبت أكثر ورحت أتأكد من إحكام غلق باب الغرفة.

بعد لحظات مرت كدهر، أخذت قراراً بالبقاء في غرفتي لكنني تقدمت من الباب في ببطء حذر على أطراف أصابعي وتأكدت مرة أخرى من إغلاقه جيداً بالمفتاح، ورجعت إلى سريري بنفس الطريقة كي لا أحدث صوتاً أستفز به من بالخارج أيًا كان، لن أستطيع أن أستغيث بأي أحد الآن.

دقائق وسمعت صوت أذان الفجر، جاء صوت المؤذن «الله أكبر» خاشعاً فسكت الصوت بالخارج فجأة.

ظللت أفكر فيما حدث وفيما سوف يحدث بعدها، هل كان خوفي طوال اليوم قد جلب أوهاماً؟ إذا كان قد تهيأ لي صوت الشوكة والسكين فمن أيقظني؟ ومن أضاء النور بالخارج؟

لم أخرج على الخروج من باب الغرفة رغم شدة احتياجي إلى استخدام الحمام، وبقيت جالسًا أنتظر الفرج.
بعد وقت غير معلوم دق الباب دقائق منتظمة مرة أخرى، كتمت أنفاسي وأنا أنظر مدعورًا إليه، ثم دخلت تحت الغطاء والتحفت به، دعوت الله بالنجاة، وكانت هذه المرة الأولى التي أطلب فيها شيئًا منه، فأنا لم أعتد ذلك، لم أرَ أبي أو أمي يفعلان أو يحثاني على ذلك، كانت طلباتي كلها مُجابة، لم أسمع أبي يذكر الله أو يذهب إلى صلاة الجمعة كما يفعل أغلب المسلمين، لكنني دعوت الله بالفطرة.

دقات الباب لم تتوقف، دقائق منتظمة وكأن من بالخارج يحذرك، توقفت الدقات مرة أخرى وسمعت صوت خطوات تبتعد، أخرجت رأسي من تحت الغطاء في حذر، فرأيت مقبض الباب يتحرك في محاولة لفتحه، من بالخارج يُريدني بلا شك، لماذا تركتني يا أبي أواجه عائلة «السعدني» وحدي؟!!

ثم جاءت خطوات سريعة متلاحقة وكأن من بالخارج قد فقد صبره، ثم جاءني صوت عالٍ:

- يا «آدم».. الساعة بقت تسعة هتصحى إمتي؟

كان صوت «أم محمد»، زفرت نفسًا عميقًا ونقضت الغطاء من فوقني في غيظ وحاولت أن أكظم غيظي، أكانت هي من

دخلت في الليل وزوجها لياً كلاً؟ فيها الوحيدان اللذان يملكان نسخة من جميع مفاتيح البيت، لكن ما هذه الجرأة التي تجعلها يمرحان في البيت هكذا دون إذن؟ خاصة بعد سفر والدي؟ أتراهما معتادين على اقتحام المنزل هكذا؟ علا صوتها مرة أخرى: - دا انت ما كلتش من إمبراح.. مينفعش كده، والله يا حبيبي السنة هتعددي هوا وهتلاقي الأستاذ «إبراهيم» والست والدتك هنا.. دي الأيام بتجري، افتح بس متزعليش.

حاولت أن أتمالك أعصابي وهي تعاملني كطفل أبله، قُمت لأفتح لها الباب ونظرت إليها في غيظ حاولت إخفاءه، دخلت وهي تحمل صينية كبيرة بها فاكهة وحليب وأطباق فطور شهية كثيرة، ثم ابتسمت في بلاهة وكأنها لم تفعل شيئاً واسترسلت: - صباح الخير.. شايفة الأكل زي ما هو يعني بره، لأ كده الست والدتك تزعل منك.

نظرت إليها مُستفسراً:

- يعني الأكل بره زي ما هو؟! أمال مين اللي كان بياكل

بقي؟

واصلت نظرة البلاهة وأجابت وكأنها تنفي تهمة عن نفسها:

- قصدك إيه؟ مين يعني اللي هياكله بقي؟

- مش قصدك حاجة.. عايز أعرف بس الطبق اللي بره زي

ما هو؟

- اتفضل اخرج شوفه بنفسك.

تذكرت صوت الضحكات ليلة أمس فسألتها:

- صحيح قبل ما أنسى.. هو أبو محمد كان بيضحك إمبراح

بالليل بصوت عالي؟

- مش فاكرة.. ليه؟

- أصل صوته كان عالي قوي..

- معرفش أنا كنت نايمة... آه افكرت في حد من الغفر

اللي حوالينا كان بينادي «أبو محمد» بالليل، طلع يكلمه بره لأنه

مبيد خلش حد هنا بس مفتكرش ضحك ولا لأ!

قالتها ونظرت إلي في ريبة وبدت متزعجة فأردت أن أغير

مجرى تفكيرها فقلت مؤكداً:

- والنبي إبقى فكريه دائماً يتقل البوابة بالذات بالليل.

- متخافش بنقلها والله ده كان واقف قدامها بره مش بعيد،

بس عينيا حاضر هقوله.

- أنا شفته فعلاً بيقل ورا نوح لما جه بس زيادة تأكيد و....

قاضعني صوت ارتطام على الأرض، فنظرت إليها في خرف

ثم نظرت إلى الباب المفتوح، التفتت هي نحو الباب وعلا صوتها

في عفوية وثقة:

- يا واد يا «مروان» .. قتلتك خليك بره يا زفت ..
- فجأة دخل «مروان» مُمسكاً برغيف مليء بالجبن، يأكل في
 نهم غير مُبالٍ بنا، فأمسكته أمه وشرعت في ضربه فقاطعتها:
- خلاص انتي هتضريه علشان بياكل؟
- ابتسم «مروان» وفمه مملوء بالطعام الذي بدأ في التساقط منه
 وأردف بشكل مقزز:
- قول لها والنبى .. جيت أقولك صاحبك «حسن» بره عاوزك،
 بس أنا مرضيتش أدخله إلا لما أقولك الأول زي ما أمي قالتلي:
- جاء صوت «أم محمد» مُزعجاً أكثر من ذي قبل:
- أنا مش قتلتك ميت مرة متدخلش هنا أبداً؟ وكان بتاكل
 من الطبق اللي بره .. أنا حرماك من حاجة يا واد انت؟
- نظر لها وهو مبتسم محاولاً أن يغيظها وقضم قضمة كبيرة
 وتكلم دون مبالاة للفتات الهارب من بين شفثيه إلى الأرض:
- الله .. ما انتي بتعملي الفطار لآدم الأول وإحنا هنموت من
 الجوع بره، لقيت ده في وشي أكلته .. حقي.
- بدأ على مروان الانزعاج وربما الغضب فابتسمت له متظاهراً
 بعدم سماع جملته الأخيرة وقلت:
- خلي حسن يدخل يا «مروان» على بال ما آخذ دش واطلع
 له.

- حاضر.. هجيبه حالاً.

أدار «مروان» ظهره لأمه وشرع في الخروج لكنها أعطته
لسعة قوية على مؤخرة رأسه لم يبالِ بها وخرج، التفتت «أم
محمد».. تبسمت وتابعت قائلة:

- لو عوزتو حاجة انده عليا من البلكونة.

ثم أضافت بلهجة غربية زادني حيرة:

- وما تخافش كده احنا معاك.. مش هنسيبك.

ثم اختفت من الغرفة سريعاً.

(٦)

«حسن»

في هذا اليوم المريب الذي زُرت فيه منزل آدم صباحًا والذي قررت أن يكون الأخير، أردت أن أسجل مذكراتي لأول مرة على الورق، فما رأيته شيء يستحق التدوين والبحث. كما وددت أن أكتب ما يمكنني أن أرجع إليه مرة أخرى ربما حدث جديد في هذا الموضوع المرعب.

أدخلني «مروان» ابن الخفير المقيم بفيلا «آدم» إلى غرفته حيث كان آدم لا يزال بالحمام، دخلت الغرفة، ولم تكن المرة الأولى بالطبع، أشياء كثيرة مبعثرة كعادة صديقي، صينية كبيرة بها فطور غني لم أستطع مقاومته فجلست أتناول منه ما استطعت حتى شبعت، ثم جذبت الكرسي في ركن الغرفة ووضعت بجانب كرسي المكتب وجهزت البلاي ستيشن استعدادًا للعب عند قدوم «آدم».

فجأة سمعت صوتًا بالخارج لم أتبينه، فظننت أن صديقي قادم من الحمام، لكنه لم يأت، وقفت على عتبة باب الغرفة

ونظرت فوجدت البيت خاليًا، قلت لنفسي: رُبما «أم محمد» بالطابق العلوي تقوم بواجبات التنظيف اليومية، دخلت الغرفة مرة أخرى وشرعت أقضم من التفاحة على الصينية، فسمعت صوت أطفال يضحكون وربما يجرون من خلفي، ثم صوت شيء يقع على الأرض وكأنه كرسي! خرجت في هدوء من الغرفة، واتجهت إلى كراسي مائدة السفرة أستكشف الأمر. فهالني ما رأيت.

رأيت كلبًا أسود ضخماً يجري هناك ثم اختفى ناحية سلم سفلي يقضى بالتأكد إلى قبو الفيلا. تعقبته إلى هناك فلم أجد له أثرًا! ووجدت جميع الكراسي في أماكنها، نظرت إلى صالة الاستقبال في حيرة وتوجس، لا بد أن كثرة السهر أتلفت عقلي، دخلت الغرفة وأغلقت الباب كي لا أسمع شيئًا آخر، لكن صرير السلم الخشبي كان قويًا، صوت أقدام تجري عليه صعودًا ونزولًا فتأكدت من وجود «أم محمد»، لعل الكلب الذي رأته دخل خلصة ولم تره.

جلست أفكر، لو يعلم أبي أن ابنه الصغير «حسن السعدني» سليل عائلة «السعدني» الشهيرة والقديمة في «باسوس» والى طالما أظهرت عداة كبيرة تجاه عائلة «الخولي»، يصادق ابنهم «آده» بغير علمه، لغضب غضبًا لا أعلم عواقبه، فهو لا يحبهم بعيدًا

عن التماق الأسري السائد في السنوات الأخيرة بين العائلتين.
«آدم» صديق الطفولة الذي لم يشأ أبوانا أن نصبح أصدقاء،
لكننا استطعنا أن نوهمهم بعكس ذلك لكي تطمئن قلوبهم، كنت
أراه في زيارات الخليج وفي زيارات «باسوس»، في لقاء العائلتين
السنوي تبدأ المنافسة بأحدث ما اقتنوا من مجوهرات.. سيارات..
أحدث الألعاب لأولادهم كالفديو جيم والبلاي ستيشن..
أحدث الأجهزة الكهربائية.. وأحياناً أحدث الأسلحة! تفاخر
عائلات لا يخلو من حقد، كراهية مدفونة لا نعلم أساسها، حينما
سألت أبي عن سببها لم يجب، بل حذرنى من الثقة ومن آدم!
لا شيء من هذا كله يهمني، مادام يمتلك «آدم» أحدث بلاي
ستيشن مثلي، إذن لا فرق أن نلعب عندي أو عنده.

مع ذلك أعتقد أن الأمور ستبدل يوماً ما، إنها سنة الحياة،
لا يمكن لشيء أن يستمر أبد الدهر.. لا يُمكن، كل شيء يتغير
ويتجدد ثم يرحل، حتى مشاعر الغضب والامتنان التي نشعر
بها تجاه بعضنا البعض تتغير وتتبدل وترحل، نحن أيضاً سوف
نتغير ونتبدل ونرحل بأي طريقة كانت، لأي سبب مُتوقع أو
مفاجئ، هي فقط أسباب لكي نقتنع أن من كان هنا يوماً ما
يتنفس ويعيش ويغضب ويفرح لم يعد له وجود الآن، لذلك
أحاول أن أفرح كلما استطعت، وأن أعيش يومي بأكبر قدر ممكن

من الاستمتاع فقط.

أثناء شرودي فجأة فُتح الباب في سرعة وقوة فانتفضت، فضحك «آدم» وهو ينظر نحوي، لم أتمالك نفسي من الغيظ وعلا صوتي:

- إيه الخفة اللي انت فيها دي؟!!

أكمل «آدم» ضحكته وهو يساوي شعره بالفرشاة وأردف:

- هو انت شفت حاجة؟ ده أنا استويت إمبراح.. بقولك

إيه؟

- إيه؟

تحولت نظرة «آدم» إلى شيء من الجدية والخجل وجلس على طرف السرير:

- أنا عاوز أقولك حاجة بس متزعلش، أنا عارف إنك مش هتزعل، إحنا متفقيين على كده من زمان، وبعدين كمان إحنا الجليل اللي هيغير كل القرف والقتل اللي عايننا منه و...

قاطعته لمعرفتي أن كل ما يقول مجرد مقدمة لشيء، وأنا أكره

المقدمات:

- خلصني يا ابني.. إيه هي الحاجة؟

نظر إلي «آدم» في ريب ثم نظر إلى الباب وقام فأغلقه، ثم

جلس بالقرب مني وأخفض صوته قائلاً:

- أنا حاسس إن عيلتكم بتحاولن تقتحم البيت من امبارح..
وحاسس كده انهم عاوزين يقتلوني.

نظرت إليه في بلاهة ثم قلبت تعابير وجهي إلى استخفاف ما
يقول ولم أعلق، لكنه أكمل وكأنه يصطنع المزاح:

- ما تقول لأبوك «متشولح» ميتشطرش عليا أنا مش قده
يا عم..

حاولت السيطرة على أعصابي التي أفقدها عندما يشير آدم
إلى هذا الموضوع وأجبتة في هدوء:

- يا آدم للمرة المليون بقولك دي إشاعة.. محدش يقدر
يأكد إن أصلنا يهودي.. ويجد هزعلك لو سمعت منك الاسم
ده تاني..

أراد آدم تغيير مجرى الحديث فتظاهر بأنه لم يسمع ما قلت
وأردف:

- إمبارح يا «حسن».. حد كان معايا في الفيلا، يمكن
بيخوفوني بس، بس مش قادر أفهم ليه..

ظلت نظرتي البلهاء كما هي وسألته:

- وإيه كمان؟

- المشكلة إن كمان باب الحمام اتربس عليا وأنا جوا بالعافية..
وصوت الراجل اللي كان بيضحك! بقول ده مش معقول حد في

عيلتكم.. أنا متلخبط!

لم أتمالك ضحكة أفلتت مني وقلت في استخفاف:

- حمام اتربس.. لأ إنت كده القعدة لوحدك خطر عليك.

خرفت ولا إيه؟

- أنا عارف إنك مش هتصدقني، بس بجد كان في حد

معايا، ده كيان في حد صحاني!

- صحاك إزاي يعني؟

- في إيد صحتني بالليل، كنت هموت وأنام وأول ما عيني

تغفل وأبدأ أروح في النوم تقعد تزقني من على السرير لحد ما

أصحي.

- وبعدين؟

- بعدين إيه؟ باتنفض وأفضل صاحي.

- وشفت اللي بيصحيك؟

-- لأ.. صحيت ملقيتش حد!

- ولا هتشوفه.. إنت عبيط يالا؟ ده أكيد حلم.

- أنا عارف إنك مش هتفهمني، بس لو مت أو أتخطفت

ذنبني في رقبتيكم يا «حسن»، وإنت صاحبي وتجيبي حقي.

نظرت إليه وقد أضفت ابتسامة استهزاء وأكملت:

- مش همسك فيك.. موت إنت بس وشوف أنا هعمل إيه..

بقولك إيه يا ابني إنت، أنا جاي ساعتين وماشي من ورا أهلي،
 متظبط الزفت نلعب ولا أقوم أروح ألعب في بيتي بكرامتي؟!
 كانت نظرة «آدم» تميل إلى الإحباط فأجابني بغير حماس:
 - ماشي تعال نلعب..

جلسنا في مقابل المكتب بجانب بعضنا وبدأنا في اللعب،
 هنا تذكرت الأصوات التي سمعتها وأردت أن أتأكد من وجود
 أحد بالفيلا فسألته..

- بقولك إيه.. ما تخلي «أم محمد» تعمل لنا شياي..

- «أم محمد» مشيت من بدري وعلشان أنه عليها حوار..
 شوية ونقوم إحنا نعمل.

قالها «آدم» في تلقائية دون أن يلتفت، استقبلت إجابته وقد
 اضطرب صدري بما حدث، إذا لم تكن زوجة الخفير من أحدثت
 الأصوات.. إذن فمن هو؟ أتري حديث «آدم» عن الليلة الماضية
 صحيحًا؟ أتري كل تلك الأحاديث الخرافية التي كانت محور
 حديث أمي وصديقاتها عن فيلا الخولي حقيقية؟ أم أن لأبي أو
 أحد أفراد عائلتنا علاقة بالأمر؟ لكن ما ذنب «آدم» بكل ما
 حدث بين العائلتين؟ إذا صح كلامه فسوف أتبرأ منهم جميعًا،
 لكنني لم أقوَ على إخباره بتلك الأصوات لأنه بهذا سيصح حديثه
 عن عائلتي.

بدأنا نُركز في اللعب ونسينا كل شيء، حقًا أستمع باللعب مع «آدم»، يفهم كلانا الآخر دون حديث، أحيانًا دون أن ننظر إلى بعض، مع مرور الوقت تناولنا كل الفطور الشهى معًا، ثم قام «آدم» إلى المطبخ وأحضر زجاجتي ماء فقد كان الجو حارًا، أو رُبما تأثير اللعب علينا، نظرت إلى الباب فوجدته مواربًا، لم يُغلقه «آدم»، عُدنا إلى اللعب مرة ثانية لكن لا أعلم لماذا لم أكن مطمئنًا لمواربة الباب، أردت بضع مرات أن أقوم فأغلقه لكن اللعب كان أشد لهوًا ولذة، فتكاسلت.

كان «آدم» هو الغالب فأخذ يضحك ويقهقه ويزيد في إغاظتي، لكنني لأول مرة لم أبال، جزء مني كان يفكر في تلك الأصوات التي سمعتها، ارتطام الكرسي وصرير السلم والأقدام.

وبعد أن نسيت ما حدث وأخذني ما أخذ «آدم» من اللهو، تهيأ لي وكأنني أرى بطرف عيني شخصًا ما عند باب الغرفة، لم أنظر في البداية لأن المباراة كانت على أشدها، لكنني أحسست أن هناك شخصًا ما واقفًا يراقبنا، مما أجبرني على الالتفات لرؤيته على عدة مراحل وكان شيئًا ما يربح وجهي ناحية الباب، وكانت مفاجأة لم أتوقعها قط.

عندما رأيت هذا الكائن واقفًا خلف الباب ممسكًا بيديه

الاثنين الباب ويُطل علينا برأسه فقط، في حين أخفى باقي جسده وراء الباب، أدت وجهي مرة أخرى إلى البلاي ستيشن بطريقة عفوية، لكنني وبسرعة أرجعت رأسي إلى الباب لأرى هذا الكائن مرة أخرى، لم يكن شخصًا، كان كيانًا أسود سوادًا فاحمًا، طويلًا يقارب طول الباب، عيناه حمراوان، والعجيب أنني أحسست أنه لم يكن ينظر إلينا مباشرة، بل ينظر إلى الشاشة!

لحظات واختفى هذا الكيان، تبخر وكأنه لم يكن موجودًا وتركتني مبللًا بالعرق وقد فغرت فمي في هلع، توقفت عن اللعب وأحسست أن أصابعي قد وُضعت في ثلج، لحظات خارج الدهر، لحظات لا أستطيع أن أصفها أحسست فيها أنني ضعيف جدًا، لسنا وحدنا في هذا الكون كما نعلم لكن رؤيتنا لمن يشاركوننا فيه تجعلك تشعر بالضالة.

تنهت إلى آدم والتفت إليه فوجدته ينظر هو الآخر لنفس المكان الذي كان فيه ذلك الكائن منذ ثانيتين، وقد أصابه ما أصابني من رعب، بل أعتقد أنه كان أضعافًا مضاعفة، بعد لحظات مرت علينا وكأنها ساعات تماكنتُ نسبة صغيرة من شجاعتي التي طالما تفاخرت بها على صغر سني وسألت صديقي وأنا أبتلع ما تبقى في حلقي:

- بتبص على إيه؟

أدار «آدم» وجهه إلي في بطاء وهلع وقد احمر وجهه وأذناه
ولا حظت ارتجافاً يديه وقال:

- إنت كنت بتبص على إيه؟

- قول إنت..

- لأ قول إنت الأول..

جف حلقى تماماً وارتعش صوتى:

- اللى إنت شفته..

- عينه حمرا صح؟

- وإسود خالص..

مرت لحظات أخرى بغير كلام.. لم نستطع أن نغلق الباب
أو نتحرك من أماكننا أو حتى أن نكمل حديثنا.

فجأة فُتح الباب الخشبي من الخارج وسمعنا صوت
«مروان» مهللاً:

- يا «آدم» يا «آدم»، إنت مش وعدتني تلاعبني معاك مرة..

أنا عاوز اللعب والنبي، دور واحد بس.

حمدت الله حمداً كثيراً على مجيئه، وقُمت على عجل وكنت
في حالة يرثى لها، قلت في صوت خافت لا أعتقد أن حمديتى

سمعه:

- معلىش أنا لازم أمشي علشان اتأخرت..

لم يعلق صديقي بكلمة، لم يكن لديه ما يقوله وقد صار الأمر واضحاً، خرجت أجري وقد رأيت «مروان» وكان ممسكاً بالباب الخشبي ففتحته بعنف على آخره، فتابعني في تعجب.
الآن فهمت من أين سمعت الأصوات وكل ما حدث البارحة لصديقي المسكين، يا ليتها كانت عائلتي من تترىص به، فتكون أرحم من هذا الذي أظنه، يا ليتها كانت عائلتي.. ترى ما الذي سيفعله هذا المسكين وحده معهم في هذه الفيلا الملعونة؟! .

* * *

(٧)

«آدم»

سمعت صوت فرقة كبيرة بصالة الاستقبال بينما كنت مُستغرقة في مشاهدة القناة الثانية في غرفتي، صوت تحطيم زجاج هائل، على ما يبدو أن الصوت قد أتى من الخارج، هرعت لأرى ماذا حدث، لم أجد شيئاً كالعادة، حينها رن جرس الفيلا، فذهبت ونظرت عبر العين السحرية، رأيت نوح يقف منتظراً، فتحت الباب ودعوته للدخول، دخل في هدوء كعادته ينظر نظرة سريعة إلى البيت، لا يعلم أنني أرغب بشدة في وجوده وكنت أنتظره منذ رحل حسن في صمت بعد ما شاهدناه، نظرت لنوح محاولاً الابتسام رغم توترى الواضح وقلت:

- اقعد... إيه الأخبار؟

نظر إلي مُتوجساً وسألني:

- أنا تمام... إنت كويس؟

- وانت جاي سمعت صوت فرقة... زي إزاز بيتكسر؟

- فرقة؟ لأ الدنيا هادية بره.

- طيب شفت عم محمد بره؟

- شفت مراته.

- عم محمد ده كمان غريب! مش مركز مع الحراسة من يوم

ما أبويا سافر. مش مطمئن له..

- ليه يعني؟

- بقى بيععمل مشاوير كثير الأيام دي ويسيب الفيلا لمراته..

ومراته بتجري ورا العيال طول اليوم. وكل شوية ألاقها في حنة
شكل في البيت مع إنها مكانتش بتدخله تقريبًا اليومين اللي كان
أبويا وأمي هنا.

- يا ابني متكبرش الموضوع، عم محمد برضه لسه مش

متعود إن في حد عايش في الفيلا على طول، خد بالك هو متعود

على الفيلا فاضية، شوية وهيتعود على وجودك، تلاقه بيحب

حاجة وراجع، ولا يا سيدي حتى بيعمل مصلحة.. إيه المشكلة؟

الدنيا هنا أمان برضه إحنا مش في شيكاغو.

سادت لحظات صمت ثم قلت في عفوية:

- أحيانًا بتبقى باسوس قريبة من شيكاغو، أنا سمعت

عن...

قاطعني نوح في برود:

- عن الخناقات اللي بيقتلوا فيها بعض؟ دي بتحصل كل

فترة طويلة، وبعدين مهها حصل مش هيتشطروا على عيل يعني -
 صدمتني صراحتة لدقائق، وتوقف نظري عليه دون حديث
 ربما لأنه يراني «عيل»، لكن غلبي الضحك فضحكت وضحك
 معي لثوانٍ، ثم أردف:

- مش قصدي عيل بالمعنى، لكن في الآخر أذيتك مش
 هتفيد حد، ده لو في عداوة بين أبوك وبين أي عيلة يعني.
 - فاهم.

بالرغم من أن شخصية «نوح» تبدو سوية واجتماعية، إلا
 أنني أشعر وكأنه يجبي سرًا بداخله، قررت أن أفتح موضوعات
 مختلفة ربما أعرفه أكثر، لكنه باغتني بسؤال مختلف:
 - فين بقى «البلاي ستيشن» علشان أغلبك؟

بدأت في تجهيز «البلاي ستيشن» والكراسي في غرفتي، ما إن
 انتهيت حتى جلس «نوح» في سرعة وفرح كأنه طفل صغير، ثم
 شرع في اللعب بمفرده فأردفت:

- عارف يا نوح.. مش عارف ليه ساعات بحس إن جواك
 حاجة غريبة مش قادر أفهمها، لو عندك ظروف وعايز تفضفض
 قول، إحنا بقينا أصحاب.

نظر «نوح» إلي نظرة خاطفة بطرف عينه ولم يُجب عن سُؤالي،
 وكنت أريده أن يتحدث أكثر اعل قلبه جهداً فأردفت بنبرة مأكرة

لعلها تلفت انتباهه:

- أقولك الصراحة...؟

كما توقعت لفتت انتباهه هذه الجملة التشويقية التي في حقيقتها سؤال يثير الفضول، تلفت لثوانٍ وعلق في سرعة وقد شغله اللعب:

- قول..

- مع إنني معرفكش كويس لكن بدأت أرتاح لك.

أجاب سؤالي وهو لا يزال مُنشغلاً باللعب بمفرده:

- إنت ارتحت من أول معرفتنا يا «آدم» وإلا مكانش زمانا دلوقتي ينلعب سوا عندك.

- عندك حق.

توقف «نوح» عن اللعب والتفت إلي وقال في نبرة غريبة:

- بص يا «آدم».. كل واحد متنا له حكايته، متحاولش

تعرف كل الحكاية علشان كل واحد فينا بيحكي الجزء اللي عايز الثاني يعرفه وبس.. فاهمني؟

نظرت إليه وابتسمت فرد الابتسامة وقد فهم كلانا الآخر

إلى حد كبير في لحظات، أكمل حديثه وكأنه يتأمل شيئاً لا أراه:

- أمي دايمًا تكلمني عن «الحب غير المشروط»، اللي هو

مفيهوش مصالح، تفكر ده ممكن يبقى بين الصحاب؟

- مش عارف..

- إنت مثلاً ممكن تفكر إن أهلك مش بيحبوك.. لأنهم

سايوك لو حدك هنا، قرايبك مش حواليك، اللي بياخد باله منك الغفير ومراته.. متزعلش مني يعني..

نظرت إليه وقد اختلطت مشاعر الغضب والغيرة والحزن معاً وقد فاجأني جرأته، ولم أدري ماذا أقول.. لكنه أردف سريعاً:
- أنا عارف إنك مش متزعل مني لأنك فاهم أنا أقصد إيه، وعارف إن سنك صغير لكن دماغك كبيرة، اللي عايز أقوله إن دايماً التوقعات أكثر حاجة بتفسد كل أنواع العلاقات، تقبل اللي قدامك زي ما هو ومتوقعش حاجة من أهلك، من أي حد مهما كان قريب منك، مهما كنت كويس معاه، لأنه لو خلف توقعاتك هتتصدم وممكن تكرهه، ولو كرهت قلبك هيتغير.

ساد الصمت بينما هو منشغل باللعب وعقلي يريد أن يستوعب ما قال، فسأله:

- تقصد إيه؟

- أقصد متلومش أبوك وأمك من جواك وعيش حياتك، أنا بشوفك بتتحول إزاي لما بتيجي سيرتهم، هما طاقتهم كده، حدودهم كده، مش معناه إنهم مش بيحبوك، هما أكيد بيحبوك بس بطريقتهم وعلى قد طاقتهم وإمكانيتهم، هي دي إمكانيتهم

ولو كانت محدودة، ثم إن في قاعدة غريبة..

- إيه هي؟

- أي حاجة وهي بعيدة حلوة وقيمتها فيها، أول ما تبقى ملكك بتفقد قيمتها، خلاص بقت موجودة، مهبها كانت عالية ومتعوضش، مش هترجع قيمتها ثاني غير لو ضاعت منك، التعود بيعمل كده، التعود بيخلي الناس تنسى التقدير.

- أنا مش حاجة يا نوح أنا بني آدم..

- أهلك ضامين وجودك وطاعتك، هتعمل إيه يعني؟ هتطفش؟ مش معنى كده بقولك سييهم، بس يحاول أفهمك نفسية الناس من جوا.

- إنت مش بتحلل تصرف أهلي يا نوح علشان أنا باين عليا إني متضايق منهم، إنت بتقول كل ده علشان تهرب من الإجابة لما قلتك فضفض لو عندك مشكلة.

- أنا أكيد عندي مشاكل في حياتي، لكن قبل ما أفضفض حبيت أحل لك مشكلتك إنت الأول مع أهلك، حبيت أقولك إني حاسس بيك وإن عادي كلنا عندنا مشاكل مش إنت لو حدك. لحظات وهبت رائحة العفن التي اعتاد أنفي عليها، توقف نوح عن اللعب للحظات وبدأ ينظر تارة إلى الحوائط وتارة إلى السقف في توجس، وبدأت ملامحه تختلف فسألته:

- مالك؟

- مفيش.. كمل كنت هتقول حاجة؟

قالها نوح وقد لمحت في عينيه نظرة خوف سريعة يريد أن يخفيها، فسأته:

- بقولك إيه، موضوع الخناقة القديمة بتاعة عيلة السعدني ده، عارفها؟

- بسمع كلام كده.

- الموضوع ده ساعات يفكر فيه كثير، تفتكر لسه شغال؟

- سمعت مرة بابا بيقول خناقات الناس مبتخلصش.

- أنا نفسي أعرف السبب إيه؟

- أنا هعرفك..

قالها «نوح» وتوقف فجأة كأنه تذكر شيئاً، لكنني أردت أن أعرف السبب في شغف فسأته:

- إيه السبب؟

زاغت نظرات «نوح» في قلق في كل الاتجاهات، وفجأة نظر إلى الكرسي في رُكن الغرفة في رُعب، أطال النظر إليه وكأنه يرى ما لا يرى ثم ارتعشت يداه وسكت، نظرت إلى رُكن الغرفة الشاغر في ذهول ونظرت إليه وأردفت في قلق:

- مالك يا «نوح»؟

نظر «نوح» إلى اللعبة مرة أخرى ولم ينظر بعدها في عيني مباشرة وقال بصوت مُرتعش بسرعة:

- الجيم خلص.. نكمل بعدين، أنا لازم أروح.. تصبح على خير.

- جيم إيه اللي خلص! أنا لسه ملعبتش.

- أنا لازم أمشي حالاً معلش.

نظرت إليه في قلق وهو يُسرع إلى باب الغرفة يفتحه ويهرول إلى الخارج وأنا مذهول، فأردفت في شك وخوف أقاومه:

- ماشي يا عم البطل.. وانت من أهل الخير.

جاء رده سريعاً وعضوياً:

- معلش يا آدم هتتعوض، ياللا سلام وخلي بالك إنت على

نفسك.

لم أعلق، ثم نظرت إلى ركن الغرفة الخالي إلا من كرسي وحيد، وتذكرت يوم أن رحل حسن بنفس طريقته، كان خائفاً بالتأكيد، مشيت بسرعة ورائه إلى أن فتح باب الفيلا وأغلقه ورائه، ذهبت إلى غرفتي وأنا مُنشغل بما فعله نوح.

دخلت الغرفة وجلست في شرود، دقائق وقاطعني صرير

البوابة الحديدية يُغلق، ثم دخلت الحمام لأستحم قبل النوم

كعادتي، وقد بدأت أعتاد الوحدة، بعد أن انتهيت وأثناء طريقي

لغرفتي مرة أخرى خيل إلي أنني سمعت صوت طفل يبكي! أطرقت السمع لأتأكد من مصدر صوت البكاء، فوجدت أن البكاء بلا شك داخل غرفتي! في بادئ الأمر لم أميز الصوت، توقفت مكاني مدعورًا ممسكًا بالمنشفة، لم أعلم ماذا أفعل من شدة الخوف! ثم تهيأ لي أنه صوت نوح! أمسكت بطرفي المنشفة وكانت ملتفة حول عنقي لأمسح بها وجهي ورأسي، ثوانٍ وعلا صوت البكاء، فوجدته صوت طفل! تجمدت أطرافي وحاولت جاهدًا أن أركز.. أهى نبرة صوت نوح أم لا؟!!

هل أتى مرة أخرى؟ لكن كيف دخل؟ ألم يُغلق الباب وراءه؟ أم أنه صوت طفل؟ لكن من هو؟ وكيف دخل؟ ولماذا يبكي؟ ظللت واقفًا مكاني مُمسكًا بطرفي المنشفة لا أدري ماذا أفعل؟ لم تقوَ قدمي على دخول الغرفة أو الرجوع إلى الحمام مرة أخرى، هل أختبئ؟ ليس منطقيًا أن أختبئ في بيتي، لا بد أن أرى ماذا يفعل نوح أو أي شخص آخر في بيتي الآن وكيف دخل؟ تشجعت وأجبرت قدمي على الدخول وعيناي متسمرتان على ما أظن، كان الصوت واضحًا وعاليًا، تسللت إلى الغرفة فانقطع الصوت فجأة وبدأ لي أنه آتٍ من الدور العلوي! لكنه وبلا شك صوت طفل!

أحسست كأنني دخلت لعبة فجأة رغبًا عني، لعبة على

الأرجح لست مؤهلاً لها الآن، فكرت للمحظّات في اتباع الصوت
لكنني تراجععت، كنت أصغر من أن أفعل هذا، نظرت إلى الغرفة
نظرة سريعة فاحصة شاملة وأغلقت بابها بالفتاح، كان الصوت
لا يزال يأتي من الدور العلوي، فقررت أن أتجاهله حتى وإن
حدث أمر عظيم، أكملت ارتداء ملابسني والتحفت بالغطاء في
صحبة نور الغرفة الذي لم أستطع إغلاقه كالليلة السابقة، كما لم
يجد النوم لجفوني سبيلاً في هذه الليلة.

(٨)

«حسن»

هذا الكائن شديد السواد أحمر العينين طويل القامة، لم أستطع أن أنساه أو أنسى تلك الأصوات خارج غرفة آدم أيضًا، من هول الصدمة والمفاجأة لم أستطع أن أتبين ملامحه، لكنه وبكل تأكيد لم يكن يهتم بأمرنا، كانت عيناه مسطتين نحو جهاز «البلاي ستيشن»، ما هو جنس هذا الكائن؟ هل يُعقل أن يكون على كوكبنا كائنات فضائية كما في الأفلام؟ أم أنه من الجن؟ وماذا كان يريد من طفلين بالكاد بلغا للتو؟ لكن هل أستطيع أن أجزم أنه جن من الأساس؟ وإن لم يكن فمن هو؟

أسئلة كثيرة لم أملك شجاعة البحث عن إجابتها، لكنني لم أستطع مقاومة فضولي فبحثت بعدها في كتاب قديم ملك لأبي لاهتمامه القديم بعالم الماورائيات والأرواح، قرأت القليل الذي جعلني أقرر عدم القراءة مرة أخرى، ومنذ ذلك الحين وفي كل مرة أغلق فيها عيني لتستريح أراه في عقلي واضحًا لكن بملامح تشبهنا، ملامح شبه واضحة تؤرق نومي، وكأنني أجذبه بكثرة

التفكير فيه، ثم أنام رغماً عني مُرهقاً، ولا أستطيع التحدث بشأن ما حدث مرة أخرى حتى مع آدم! أحياناً أتساءل: هل كنت أهذي؟ أم أنني حقاً رأيت ما رأيت؟

جلست في هذا الصباح الباكر في غرفتي وقد احتار عقلي في كثير من الأسئلة ولم يُجِبني، أصبحت أصلي جميع الصلوات دون انتظار أُمي أن تطلب ذلك مني كما اعتادت أن تفعل، أصلي لله كي يحميني وأنا الخائف مما لا أعرف، أصبحت أنام بعد صلاة العشاء وأصحو باكراً، سمعت كثيراً من القصص المرعبة من الكبار قبل ذلك، لكنني لم أسمع أن أحداً رآهم، على العموم لم أر شيئاً بعدها أو أشعر بشيء مُريب، لا بد أنه بيت آدم.

لقد تناسيت التاريخ الملعون لهذا البيت وما كان يجب أن أتناساه، كنت صغيراً مع عائلتي في زيارة لعائلتهم، وكانت أُمي لا تدخل فيلتهم إلا بعد قراءة آية «الكرسي» مرات عديدة وهي تمسح بيديها على رأسي، وترتدي نفس الآية في سلسلة حول رقبتها لا تخلعها أبداً، كنت ألعب مع آدم كرة القدم في حديقتهم التي تشبه الغابة، وبعد أن فرغنا ومللنا حل الليل، ورأينا القمر مُكتملاً كأنه وجه يضحك لنا فأردنا تمضية بعض الوقت في اللعب ولم تُرد أن تدخل البيت.

ذهبنا إلى شجرة عتيقة وأخذنا نصوب الكرة ناحيتها،

أصوبها أنا مرة فترتد إلينا ليصوبها آدم وهكذا مرات ومرات.
واستمر اللعب ما يقرب من ساعة إلى أن صوبها آدم في المرة
الأخيرة أمام عيني فلم ترتد مرة أخرى!

ماذا حدث؟ أين اختفت الكرة؟ أين ذهبت؟ ومن الذي
أخذها؟ نظرنا إلى بعض في ذهول لاختفائها أمام أعيننا، في بادئ
الأمر نظرنا حولنا، ذهبنا وراء الشجرة وأخذنا نبحث عن الكرة
في كل مكان فلم نجدها، مر وقت لا أذكره في البحث عنها دون
فائدة، وفجأة ظهرت الكرة أمام أعيننا قادمة من اللاشيء. في
اتجاه مقابل لكاننا. ظهرت من العدم وكأن أحداً رماها من بُعد
آخر لا نراه!

بالطبع انتشر موضوع اختفاء الكرة في «باسوس» بين
الأطفال في أعمارنا، وبين الكبار أيضاً، فكانوا يرتابون من فكرة
دخول البيت أو الاقتراب منه ليلاً، حينها لم أفعل لأنني كنت في
سن من السهل أن ينسى سريعاً، لكنني الآن تذكرت كلام أبي
في طفولتي عن هذه الفيلا، وكيف أنها كانت مسكونة وبها لعنة
قديمة وما إلى ذلك من قصص عاشها مع والد آدم لا أتذكرها
جميعاً، كان دائماً يقول لأمي إن هذه الفيلا تُميّزة عن مثيلاتها في
باسوس.

بعد قليل سمعت جرس الباب يرن، دقائق وجاء صوت

أمي عاليًا: «يا حسن.. آدم الخولي هنا».

انتفضت ولم أعلم حقيقة شعوري.. كأنني أصبحت أخاف منه، للدقة من أي شيء تابع لهذا البيت، قُمت من مكاني وحاولت جاهدًا أن أبدو طبيعيًا مع صديقي، فليس له ذنب في كل ما يحدث، كان مثلي تمامًا خائفًا مذعورًا، أوصلته أمي إلى الغرفة وكان لنظراتها مغزى أفهمه، دخل آدم الغرفة وجلس على سريري لكنه لم يبدُ كعادته، لم أشأ أن أتحدث عن هذا الكائن مرة أخرى.

لم ينظر إلي آدم ولم يتحدث لثوانٍ، كان جالسًا مطأطئ الرأس على غير عادته، بدا لي كأنه يحمل خبرًا سيئًا، ولم أزد أن أعرفه فأردفت وأنا أتحرك في الغرفة وأتظاهر بترتيبها:

- تشرب شاي؟

- لأ شكرًا.

- إنت خاسس قوي.. تفطر معايا؟ أنا لسه هفطر.

- لا مليس نفس.

- طيب.. تحب نلعب؟

عندها اعتدل في جلسته ونظر إلي في جدية وقال:

- حسن.. أنا مش عارف أعيش لو حدي في البيت ده.

أدركت أن أحداثًا جديدة قد مر بها صديقي، لم يبال بعدم

رددي واسترسل في حديثه:

- إمبراح حصل حاجة غريبة جدًا.. كان نوح صاحبي عندي.. ويا دوب لسه ماشي وبعد ما مشي سمعته بيعيط في أوضتي! وبعدين اتأكدت إن مش هو اللي بيعيط.. ده طفل!

- مش فاهم يعني إيه بعد ما مشي لقيته بيعيط! وبعدين بقى طفل؟ ومين نوح ده أصلاً؟

- سمعت صوت عياط في أوضتي لكن لما دخلتها ملقتش حد! ونوح ده واحد اتعرفت عليه هبقى أحكيك بعدين... مش ده الموضوع يا حسن.. أنا متلخبط...

تحدث آدم بعصبية فلم أشأ أن أزيدها فأردفت:

- ماشي.. وبعدين؟

- وبعدين إيه؟

- وبعدين حصل إيه؟

- الصوت اتنقل.

- اتنقل إزاي؟ شفت حد؟

- لأ.. سمعت صوت الطفل بقى جاي من فوق!

على الفور انتقلت إلى ذهني صورة الكائن الذي رأيناه معًا،

نظرت إليه في توجس وسألته:

- وعملت إيه من ساعتها لحد دلوقتي؟

- منمتش من ساعتها لحد ما جيتلك على طول.

- مسألتش الغفير ولا مراته؟

- لأ مجاش في بالي.

- إزاي يا ابني! أول حاجة كان لازم تعملها تسألهم.

- أسألهم أقول إيه يعني؟ وأنا ملقتش حد! ثم أنا ما صدقت

النور طلع علشان أعرف أخرج من البيت أصلاً.

نظرت إليه بتمعن ووجدت حالته مُزرية، لم أشأ أن أوذيه

بلوم أو عتاب، وكيف أفعل وأنا أراه ضحية؟ لكنني تذكرت

اسم «نوح»، هذا الاسم لم أسمع به من قبل بين أصدقائنا فسألته.

- آدم.. إنت واثق من نوح ده؟ يكون حد مسلطه يرميلك

حاجة في البيت؟

- حاجة زي إيه؟

- سحر مثلاً؟ لو حد عايز يثديكم.

- لا لا ما أعتقدش.. ده واد جدع.

قالها آدم بعفوية لكنه توقف وبدأ يفكر ثم عاد بيقين ليقول:

- معتقدش نوح يثديني.. عمر ما إحساسي بيطلع غلط.

- حساس قوي.. عموماً... أنا أكثر واحد موقفي صعب

دلوقتي يا آدم.

- ليه بتقول كده؟

- علشان إنت رغم إنك عندي وفي بيتي، برضه هتفكر إننا هنتذيك.

ظهر الغضب على وجه آدم وعلق بنبرة لا تخلو من عصبية:
- يا حسن انت صاحبي، واتفقنا كثير نطلع نفسنا بره الحسابات دي.

لم أعلق لكنني تمنيت لو أستطيع أن أتأكد من عدم علاقة عائلتي بأذى صديقي، استمرت نظرات آدم في متابعتي وقد بدا عليه الإرهاق الشديد وهو يقول:

- متفق مع كلامي ولا إيه؟
حاولت أن أبتسم قدر استطاعتي فهزرت رأسي وقلت:
- متقلقش من الموضوع ده.

قلتها وأنا أتمنى أن أستطيع المحافظة عليها، حقاً أتمنى ألا أخسرک يا صديقي، لكنه باغتنني بسؤال:

- هو إنت ليه مش بتتکلم عن اللي حصل خالص وقت ما كنا بنلعب يا حسن؟ ده انت مكلمتنيش من ساعتها! خايف تفتح الموضوع؟

نظرت إليه في قلتي ولم أجبه فأكمل:

- إنت خايف طبعاً.. أنا كمان خايف ومش عارف أعمل إيه؟
- بيقولوا إن الحاجات دي بتيجي على الكلام.

لم تتوقف نظرات آدم عن لومي ولم يتوقف جبيني عن إفراز العرق الغزير، ولم أجرؤ أن أنظر في عينيه مباشرة، أنا الصديق الخائف المتخاذل عن مساعدة صديقه، ثم جاءني فكرة فقلت في حماس:

- ما تلم هدومك وتيجي تقعد معايا هنا؟ وتسيب البيت باللي فيه لحد ما تبلغ أهلك وهما يتصرفوا في الموضوع ده.

- مش حل، ثم إن بابا أكيد مش هيوافق وأهلك كمان هيستغربوا، دي مامتك كانت مستغربة لما شافتني جاي دلوقتي. وبعدين أقول لأهلي إيه؟ في صوت عيل بيعيط في الفيلا فهروح أقعد عند ولاد السعدني؟

- معلىش يا آدم، متنساش إنهم فاكرين إن صحوبيتنا على قد الزيارات بتاعتهم بس.

- فاهم.. طيب أنا كده هاضطر أمشي بقى.

- ما تقعد يا ابني شوية.

- وبعده ما أقعد؟ ما هو في الآخر لازم أروح يا حسن.

- طيب لو في حاجة كلمني على طول.

نظر نحوي بخيبة لمحتها وتجاهلتها وقال:

- إن شاء الله.. سلام.

(٩)

«آدم»

أيقنت بعد خروجي من منزل حسن أنه خائف ريباً أكثر مني ولا فائدة منه، أقدر خوفه وأجاهد عقلي كي يتحكم في مشاعري التي تلومه، من منا لا يخاف المجهول؟ من منا لا يخاف ما لا يراه؟ نحن لا نعلم حقاً نواياهم، ثم إن عالمهم وقوانينهم تختلف عن عالمنا وعن قوانيننا تماماً، هذه معلوماً في العمارة.

تمشيت عائداً إلى الفيلا، كانت فترة الظهيرة شديدة الحرارة والرطوبة أيضاً، أردت بشدة أن أستحم لأزيل كل هذا العرق، وأن أتناول فطوري ثم أخلد للنوم في هواء المكيف البارد، كان عقلي في حالة هذيان نتيجة قلة النوم. أو انعدامه تقريباً.. كذلك القلق، لكنني سأقاوم كل هذا لأفعل ما أريد.

رأيت باب الفيلا الحديدي مُوارباً من بعيد، اقتربت فرأيت «عم محمد» يتحدث إلى شخص لا أعرفه، فلم أبالٍ حتى إنني من شدة التعب لم أسأله عن أي شيء، كان النوم مُسيطرًا على عقلي سيطرة كاسلة، وبدأت أعصابي في الانهيار، نظرت إليه

وطلبت منه بصوت ضعيف إفتارًا تحضره «أم محمد»، تركته وهو يسألني: «كنت فين يا آدم؟ وإيه اللي خرجك بدري كده؟» لكنني لم أجبه ومشيت نحو الباب إلى أن فتحته ووقفت أنظر إلى الفيلا من الداخل وأتمنى ألا يحدث شيء مُريب.

انتابتنى مشاعر غريبة، امتلأت إصرارًا على إكمال خطتي التي لم أظن يومًا أن تكون خطة ليومي، وهي أن أستحم ثم أتناول الفطور وأخلد إلى نوم عميق، دخلت وأغلقت الباب وتصرفت كأن شيئًا لم يكن بالأمس، إنني فقط مُراهق لم ينضج بعد، يتوهم أصواتًا ويخاف منها ثم يستنجد بمراهق خائف آخر ليصبح الخوف هاجسًا لا أكثر.. تأثرا بمشاهد أفلام السينما والرعب المسلي خلف الشاشة.

بالفعل شغلت مُكيف هواء غرفتي على درجة باردة مُنعشة وأغلقت بابها، ثم استمتعت بحمام دافئ، سمعت باب الفيلا الرئيسي يُغلق فانتفضت للحظات لكنني تذكرت أنها ولا بد أم محمد تحضر الإفطار، خرجت من الحمام ونظرت إلى المنضدة بالخارج فوجدت صينية تغطيها قطعة قماش بيضاء، كشفتها فرأيت ما لذ وطاب وكُنت في شدة الجوع، فجلست بالخارج مُكتفياً بالنور الرباني الآتي عبر النوافذ، أكلت وشربت حتى شبعت تمامًا، ثم بدأت جفوني تُغلق تلقائيًا، فذهبت إلى غرفتي.

فتحت الباب وأنا شبه نائم فاستقبلني هواء منعش بارد، استسلمت وتركت جسدي لينام في هدوء، لكن مُشاهدة مُكيّف الهواء مُغلَقًا جعلت جفوني تُفتح عن آخرها ولا تغلق مرة أخرى، استجمعت شجاعتي وخرجت مُسرِّعًا إلى «أم محمد» أناديا بصوت عالٍ:

- «أم محمد» إنتي طفيتي التكيّف اللي عندي؟
جاءني صوتها عاليًا:

- التكيّف؟ آه.. لأ.. لأ مش فاكرة.

لم أدري ماذا أقول أو أفعل فأردفت في عفوية: «الشمس ضربت نافوخها ولا إيه؟ لو هي ماطفتوش.. مين اللي طفاه؟ أنا كنت مشغله؟»..

اقتربت أم محمد وابتسمت ابتسامة بلهاء وكأنها تذكرت شيئًا:

- آآآه.. يمكن فصل لما النور قطع، ما هو لو النور رجع مش هيشتغل لوحده لازم تشغله.

تنفست الصعداء وفرحت بفطتها وفرحت بانقطاع التيار الكهربائي لأول مرة في حياتي، بعد أن هدأت شعرت بالنعاس مرة أخرى، قدخلت وأغلقت الباب في هدوء مُتجهًا إلى غرفتي. نظرت إلى المُكيّف وتبسمت، شغلته ثم ارتيمت على سريري

في تعب وكانت عيناى مُعلقتين على ساعة حائط تُشير عقاربها إلى الثانية عشرة ظهرًا، وبدأت أغط في نوم عميق ولم أشعر بشيء. بعد عدة ساعات أخذت أستيقظ شيئًا فشيئًا، هُيى لي أن أحدًا يحاول أن يوقظني، يضربني على رأسي ضربات خفيفة، ومرات يضرب كف يدي! لم أستطع أن أجزم لأنني لم أكن في حالة تسمح بالتمييز، فقلت في نفسي إنها أحلام وآثار ما أفكر فيه.

وفجأة ارتطمت بالأرض وكأني سقطت من فوق السرير! وانتفضت على آلام في ظهري واستندت بيدي على الأرض. لم أستوعب ماذا حدث، قمت وأنا أحلق في الغرفة مذهولًا، كيف وقعت من فوق السرير؟! أنام دائمًا في منتصف السرير ولا أتحرك إلا فيما ندر! هذه هي المرة الأولى في حياتي التي أقع من فوق السرير! نظرت إلى مُكيّف الهواء فوجدته مُغلقًا، لا بد أن التيار الكهربائي انقطع مرة أخرى، لكن كيف لم أستيقظ من شدة حرارة الغرفة؟

نظرت إلى عقارب الساعة أمامي فوجدتها الثانية عشرة! ما هذا الذي يحدث لي؟! لا أفهم شيئًا، تغلبت على أوجاع عظامي إثر الارتطام وقُمت فشغلت مُكيّف الهواء.. خرجت إلى البلكونة فرأيت الظلام قد حل! هي الثانية عشرة بعد مُنتصف الليل إذن!

أيعقل أنتي نمت كل هذا دون أن أستيقظ، دون قلق أو دون
إزعاج أم محمد وأولادها؟!!

كان الهدوء يحيم على الفيلا بالداخل والخارج، وكانت البوابة
الحديدية مغلقة، كان واضحًا أن عائلة الخفير بأكملها نائمة لا
أسمع لهم صوتًا، اطمأن قلبي لذلك، المهم أنهم موجودون.
في حين انشغل عقلي بموضوع سقوطي الغريب هذا من فوق
الفراش.

صرفت عقلي رغبًا عنه للتفكير في مشاعر الجوع المسيطرة
الآن، فقررت الذهاب إلى المطبخ لأرى ما به، ولسوء حظي لم
أجد طعامًا لكن في طريقي عائداً إلى الغرفة وجدت صينية الطعام
وقد تركتها أم محمد مغطاة كعادتها، ما أجملك يا «أم محمد»! لكن
كيف لم أشعر بوجودها في البيت؟ لهذا الحد كنت مُتعبًا؟ نظرت
حولي وكان الظلام دامسًا، أخذت الصينية هذه المرة إلى غرفتي
فلم أشأ أن أبقى خارج الغرفة كثيرًا، دخلت الغرفة وأغلقتها
ثم وضعت الطعام على المكتب، وبدأت ألتهم الدجاج مع الأرز
والخضار وأستطعمها، لم أفكر في أي شيء آخر عدا ما أراه في
الأطباق.

وفجأة بدأت أسمع حركة بالخارج، حركة خفيفة غير
واضحة، كنت قد شارفت على الانتهاء من وجبتي فتوقفت عن

المضغ وانتبهت، بدأ الصوت في العلو شيئًا فشيئًا، وكأنه صوت شوكة وسكين ترتطمان في طبق، شخص ما يأكل بالخارج! كيف؟ منذ بضع دقائق كنت بالخارج ولم يكن هناك أحد! لم أشعر أن أحدًا يُراقبني كما السابق أو أن أحدًا يُختبئ! فمن هو؟ وماذا يأكل؟ لم يكن هناك أكل بالبيت كله إلا ما آكله الآن؟! ثم سمعت أصوات أطفال يضحكون ويلعبون في حربة! الصوت بلا شك يأتي من صالة استقبال البيت!

ازداد الصوت علوًا حتى هُيئ لي أنه بات بجانبني، لم أستطع أن أعيد الملعقة مكانها على الصينية أو أن أبتلع ما كنت أمضغ، انتابتني حالة من التوقف عن إصدار أي صوت، رُبما عن التنفس أيضًا، وبقيت صامتًا في انتظار من يأكل أو يحتفل أن ينتهي ويعود من حيث أتى!

فجأة سمعته يلقي بأدوات المائدة دفعة واحدة على الطبق فسكت الأطفال! أعتقد أنها إشارة انتهاء الطعام أو الغضب! وبقي السؤال: هل سيرحلون أم سيبدءون في فعل شيء آخر؟ مشيت على أطراف أصابعي إلى الباب فأدرت المفتاح مغلقة الباب جيدًا، ثم مشيت بنفس الطريقة إلى السرير وجلست أنتظر ما سوف يُفعل بي، كانت عقارب الساعة الواحدة بعد منتصف الليل، اختفى الصوت نهائيًا حتى إنني شككت في قدراتي

العقلية، بل فكرت في أن أتفقد الخارج لكنني تراجعت عن الفكرة سريعاً، رُبما أفعل ذلك في وجود أم محمد صباحاً، تمددت في منتصف السرير جالساً أنظر إلى الباب، وقد هدأت حدة التوتر، أسندت رأسي إلى الحائط ورائي فثقلت جفوني وأغلقت عيوني شيئاً فشيئاً، أحسست بأطرافي تسترخي فتركتها وكنت في حاجة إلى ذلك. لكنني استيقظت مرة أخرى على نغز اليد الخفية ودقات قوية تأتي من الحائط، ثم على صوت يأتيني من خلفي! صوت يُلح كُنْتُ أحسبه داخل أحد أحلامي، صوت رفيع يعبر بين أذني عبر الحائط، صوت يتكلم في حزم:

- إنت بتحامى في نوح وحسن يا آدم؟ لا نوح ولا حسن

هيرحموك مني..

انتفضت كمن لدغته عقرب وأخذت أردد في عفوية: «مين؟ أنت مين؟ مين؟» لكن الصوت لم يجيني، بل اختفى وشعرت بأنفاس ساخنة بجانبني! حينها سمعت دقات الساعة الثانية بعد منتصف الليل، هذه المرة كاد قلبي فعلياً يتوقف.. هرعت إلى باب الغرفة فسمعت أصوات حركة عنيفة بالخارج خلف الباب مباشرة، وأدركت أنني صرت محاصراً في الغرفة مع صاحب هذا الصوت المرعب.

(١٠)

«نوح»

استفتيت قلبي كما تعودت دومًا، وجدت أن الحياة عبارة عن سلسلة من التجارب الكثيرة، تجارب ليست بالضرورة أن تكون ناجحة، قد يفشل أغلبها لكنها تُنتج بعض الخبرة والحكمة، وعليه فإني ماضٍ في صداقتي مع آدم عن إخلاص وزهد في أي مصلحة شخصية، وليكن ما يكون.

المشكلة تكمن أن هذا عكس ما يريد أبي، أبي الذي لا يعترف بصداقة خارج إطار العائلة، لكنني سوف أتعرف على أصدقاء جدد وأتعلم الكثير والكثير، هنا في باسوس وخارجها أيضًا، فالحياة مهما طالقت قصيرة ونحن جميعًا نعيش فيها لنستمتع بها لا أن نسجن أنفسنا داخل جدران قاسية وعقول أكثر قسوة. ذات مساء وبعد أن انتهيت من زيارة أحد أقاربي، عقدت العزم على مقابلة «آدم»، أردت أن أطمئن عليه وأرى كيف تسير أموره، أحس دائمًا بمسئولية تجاهه لا أعلم لماذا؟ خاصة أنني قد غادرت بشكل غير لائق في المرة الأخيرة، تجاوزت البوابة

الحديدية المواربة، وتجاوزت «عم محمد» الذي كان مُنهمكًا في ضرب «مروان»، وعبرت الحديقة مُتجهًا إلى الباب، ضربت الجرس وانتظرت، بعد بُرهة رأيت خيال آدم من وراء زجاج الباب الكثيف المموج يأتي ثم يتنحى جانبًا ولا يفعل شيئًا، فأصابني القلق عليه، ثم سمعت صوت القرآن الكريم عاليًا يأتي من الداخل فاطمأنت، ضربت الجرس مرة ثانية فجاء صوت آدم خائفًا: «مين؟» فأجبتُه:

- أنا نوح.. افتح يا آدم..

فتح الباب قليلًا ونظر إلي ليتأكد، دخلت من خلال مساحة تكفيني بالكاد فأغلق آدم الباب على الفور وقد ظهر عليه الخوف والإرهاق، علا صوت مروان يصرخ في الخلفية وعم محمد ينهال بالسباب عليه لدخوله الفيلا مُتلصصًا!

وقفنا خلف الباب ننظر لبعضنا البعض لثوانٍ وكأن كلاً منا يمسح مخ الآخر ليرى ما بداخله، ثم نطقت أخيرًا:

- مالك يا آدم؟ هتفضل تبصلي كده كثير؟ في إيه؟

لم يجبني وسار بحركة بطيئة لم أعهد لها عليه إلى أقرب مقعد وجلس فكررت سؤالِي:

- قول في إيه؟ شكلك غريب!

انهار آدم في البكاء وكأنه انتظر أن آتي ليفعل ذلك فتركته

حتى يهدأ، بعد أن مسح دموعه نظراً إلى بعينين حراوين عجيبتين،
تغيرت ملامحه وقد تضاربت كل الأفكار في عقلي وقال بصوت لم
أعده:

- أنا لازم أسيب المكان ده، لكن مش عارف أعمل إيه.
برضه ده بيتي...

- في إيه يا آدم فهمني؟

- في واحد عايز يطفشني من البيت.

تدفقت الأفكار في عقلي وقلت في هدوء واستفسار:

- واحد زي مين؟

لم تتغير ملامحه أو تتبدل، كذلك صوته العجيب، مال
ناحيتي وأردف:

- الأكيد إنه مش من عيلة السعدني.

- يبقى من عيلة مين؟ في حد في دماغك؟

زأغت نظرات آدم قليلاً ونظر إلى السقف والجدران ثم
اتسعت حدقة عينيه، وفجأة ابتسم ابتسامة غريبة ثم نزلت
دموعه ونظر إلي في توسل وقال:

- إنت عارف يبقى مين.. مش عايز أقول.

كان مظهره مثيراً للشفقة وقد مال برقبته ينظر إلى الأرض،
أردت أن أساعده فألححت في سؤال:

- قول مين يا آدم متخافش، أنا مش هسيبه.

اعتدل في جلسته ونظر إلي نظرة جامدة لم أستطع فهمها

وقال في نبرة خائفة بصوت خافت:

-- لو قلت هيجي، مش هقدر عليه ولا انت هتقدر عليه.

رجعت بظهوري واستندت إلى الكرسي وأخذت أفكر في

هذا الحديث.. لم أعلق لكنه استرسل:

- أنا لازم أتصرف وأمشي من هنا.. مش هسيبتي.

- كلم باباك ييجي.

نظر حوله وكأنه يتفقد أحداً ما، مال إلي لكنه نظر إلى السقف

ثم همس في أذني:

- لو قتلته هيتذيني، مش هسيبنا كلنا، وبابا وماما كانوا

هيتذوا لو كانوا قعدوا أكثر من كده في الفيلا!

- مين اللي قالك الكلام ده؟

عاد ليهمس في أذني خائفاً:

- هو بنفسه، دي تاني مرة ييجي، بيكلمني من الحيطه..

مسابنيش طول الليل.. طول الليل يا نوح.. كل شوية كان

بييجي! ولو حاولت أخرج كان بيسنعني.

- هو مين؟

- هو...

نظرت إليه في دهشة ثم ساد الصمت بيننا وقد صدمني كل ما مر به، آدم المسكين، سألته:

- بس قولي الأول إنت اللي شغلت القرآن؟

- لأ.. عم محمد..

حاولت أن أتحدث في موضوع آخر لأهدئ من روعه:

- يعني مش هنلعب النهارده؟

أدار رقبتة ببطء إلى غرفته ونظر إلي في خوف، فأردت

طمأنته:

- آدم.. متخافش أنا معاك.

- إنت معايا دلوقتي لكن مش هتبات معايا وتسمع صوته

زبي-

-- المهم إني معاك دلوقتي ووعدتني هحملك من أي أذى

مهما كان، مش هسيبك.

نظر إلى عيني يتفحصهما، نهضت بسرعة وسرت نحو غرفته

ثم وقفت ونظرت إليه فتبعني في خطى بطيئة، دخلت الغرفة

فشممت رائحة عفن تختلط بكثير من البخور، رأيت الحوائط

وكأنها غُسلت من شيء ما، دوائر كبيرة وصغيرة كثيرة لونها

غامق، ولاحظت كثيرًا من الأغطية والوسائد على سريره! ثم

إنه قد نُقل من مكانه ليصبح ملاصقًا للحائط، فسألته في عفوية:

- ليه غيرت مكان السرير؟ كان الأول أحلى.

نظر إلي في حزن وقال:

- أنا اللي نقلته.

أردفت وأنا أجلس وأحضر البلاي ستيشن لنبدأ اللعب:

- ليه بقي؟ تغيير؟

- علشان كل ما أنام بيثيلني ويرميني من فوق السرير!

توقفت عن كل ما أفعله ونظرت إليه في دهشة ولم أعلق

فأكمل حديثه:

- أيوه.. بتشال وأترمي على الأرض من ارتفاع كبير! في

الأول كنت فاكر إني بتقلب وبتقع على الأرض، رغم إني عمري ما

كنت بتقلب في نومي، جبت المخدات دي وحطيتها على الجنبين

كأني عيل صغير، برضه كنت بلاقي نفسي فجأة على الأرض.

- هو مين اللي بيرميك يا آدم؟

تلقت مذعورًا وقال في نبرة خافتة:

- هو.. هو يا نوح.. أنا معرفش اسمه.

بات واضحًا أنه خائف من مجرد ذكر اسمه فتجاهلت ما

يقول وأكملت:

- وإيه اللي عرفك إنك بتترمي من ارتفاع؟ ما جايز بتقع

فعلاً؟

- عرفت لما صحيت مرة قبل ما أترمي، صحيت وأنا فوق قريب من السقف، لقيت نفسي بنفس وضع نومي لكن فوق عند النجفة، مصدقتش نفسي.. قلت أكيد بحلم وحييت أثبت لنفسي كده وجيت أتقلب.. وفي ثواني نزلت على الأرض، حتى شوف..

كشفت آدم عن ملابسه ليريني آثار كدمات كثيرة وكبيرة بألوان مختلفة متفرقة في أنحاء جسده، آثار الأمر حيرتني وحزني عليه، من الذي يؤدي إنساناً بوداعة آدم ولطفه؟! لم أر منه إلا كل الخير!

في الكون قوى كثيرة لم يُختبرها الكثير بعد، حقائق لا يعترف بها الجاهل، ولن يعترف بها إلا عندما يُدركها، إلا عندما يختار في أمرها ومعناها، ولا يعلم لماذا تقع له هو؟ لن يعلمها إلا عندما يستغيث في ألم، حينها وحينها فقط سوف يعترف بوجودها، لكن يبقى اللغز والسؤال.. لماذا؟

لن أتركك يا صديقي تدفع ثمن ذنب ليس ذنبك، سوف أكون بجانبك منها كلثني الأمر، أردت أن أقويه فأردفت وقد تغيرت مشاعري إلى قوة مفاجئة وتحذ:

- آدم.. اسمعني كويس، واضح إنك في مواجهة شيء كبير، عايرك تبقى قوي مش ضعيف، القوة بنستمدها من جوانا،

إحساس بتحسه وبتعيثه فبیتحول لحقیقة، اوعى تتخيل إنك
ضعيف ومش قد أي حاجة، إنت أقوى لو بس صدقت ده.
نظر إلي في دُعر وأشار بإصبعه إلى فوق، نظرت حيث يشير
فوجدت شيئاً عجيباً، لقد ملئ السقف ببقع دماء لزجة وكثيفة
مُعلقة لا تسقط! لم أفهم شيئاً لكن يجب أن أعترف أنني فوجئت
تماماً مما رأيت، وقفت صامتاً أفكر فيما يحدث، طلبت منه أن
يقص علي ما حدث ففعل وظل يتلفت حوله أثناء الحكى، وأنا
أطمئنه أنني لن أتركه، أنهى آدم قصته وساد الصمت، تحدثت
أخيراً وكأنني ألقنه تعاليم:

- آدم.. أنا هقولك حاجات عمري ما اتكلمت فيها غير مع
أمي، ومخرجتش بره العيلة.

لم يجيني آدم حتى بإشارة، فاسترسلت:

- أنا كنت سلم بالوراثة وأنا صغير، مع إني باسمع إن
جدي كان بيخاف ربنا ويصلي ويعمل خير كثير، لكن أبويا
عمره ما قالي صلي، ولا ادعي ربنا، لولا أمي كانت دايمًا بتعلمني
كان زمني في حنة تانية خالص.

- مش فاهم قصدك!

- أنا عايزك تلجأ لربنا.. رب الكون هو اللي هينجيك من

اللي بيحاول يثديك.

استمع آدم إلي وكأنه في عالم آخر لكنه لم يكن كذلك.. نظر إلي وأردف كأنه يتذكر:

- أنا كمان عمري ما حد قالي اعمل ده وسيب ده، دينك بيقول كذا وخلاص.. لكن ده إيه علاقته باللي بقوه هولك؟

- علاقة قوية، أنا اتطمنت عليك النهارده وأنا داخل وسامع سورة «البقرة» في البيت، افكرتلك انت اللي مشغلها.

ابتسم آدم في سخريه ولم يُعلق فأكملت حديثي:

- اللي عايزك تسيب مكانك لا أنا ولا انت هتقدر عليه يا آدم، واضح إن قوته أكبر بكثير..

نظر إلي بحسرة وضحك بصوت ثم نظر إلي الأرض في يأس فأردفت سريعاً:

- لكن ممكن نبقي أقوى منه أضعاف، لو مع ربنا.

اختفت ابتسامة آدم ونظر إلي بجدية وقال:

- ده أنا محصلش كل البلاوي دي إلا لما رحلت صليت الجمعة في الجامع لأول مرة في حياتي.

ابتسمت وقد فهمت شيئاً فأردفت:

- بالضبط كده.. هو ده اللي عايزه، إنك أول ما تلجأ لربنا

يدخل الشك قلبك من ناحيته، يربط بين الصلاة والخوف اللي بيرميه جواك، فكل ما تيجي تصلي وتقرب من ربنا تخاف من

اللي هيحصل بعد كده، علشان تقول الكلام اللي انت لسه قايله
حالا. لكن لا... أنا عاوزك تلمسك برينا أكثر وأكثر، وتقرب
منه كيان، ما تفوتش فرض واحد، وقرأ القرآن دايمًا، لو بقيت
مع ربنا مش ممكن مخلوق يغلبك.

أحسست بآدم قد هداً قليلاً أو لعله يتدبر ما أقول فأكملت:
- خليك واثق إن النافع هو الله والضار هو الله.. الله وحده
يا آدم، إحنا بنتغافل عن ده، وبنخاف من حاجات في الكون
ميصحش نخاف منها وإحنا معاه، بتتخيل إن الحادثة هي اللي
خلت فلان يبقى عاجز أو يموت مثلاً، الحادثة دي سبب علشان
نُحنا الضعيف يقدر يتقبل أقدار الله وحكمته، عقلنا يقبل إن
الدواء بيخفف الألم أو المرض لكن في الحقيقة هو الله، عارف
ده معناه إيه؟

هذه المرة سألتني عيناه فأجبت:

- ده معناه إن ربنا عايزك ترجع له، عايزك تكون معاه،
علشان كده حطك في الموقف الصعب ده.
- أنا مش قادر أستوعب أغلب كلامك، لكن أنا بأثق فيك
وهعمل كل اللي تقولي عليه، بس أرجوك اوعدني ما تغييش
علي..

- يمكن ربنا سخرنى لنجدتك، إنت ربنا معاك يا آدم

صدقني، لازم تصدق في ده.

- يبقى هتسييني.. مش هلومك.. إذا كان أهلي سابوني..

تفهمت حينها أن صغر سن آدم وتنشئته وما يمر به الآن
سوف تمنعه من فهم ما أقول، على الأقل الآن، فأسمعتة الكلمة
الوحيدة التي تطمئنه الآن إلى أن أرى ماذا سأفعل له ومعه:

- أنا معاك يا آدم.. وهنبتي سوا، كل اللي اتعلمته من أمي

هعلمهولك.

- وعد؟

- وعد.

(١١)

«آدم»

أيقظتني تلك اليد التي بدأت أعتاد على طريقتها في إيقاظي، وكان أحداً ينغزني بعضاً مدببةً كُلِّها طالت فترة نومي قليلاً عن المعتاد، استيقظت وجُلت ببصري في الغرفة تلقائياً فلم أجد أحداً، أستمع لكثير من الأصوات التي بتُّ آنسُ لها بعد أن كنت أخافها، أقنع نفسي أنها مجرد تخيلات، أبدأ الطقوس الصباحية بأن أستحم، لكنني لا أحب أن أرى ما صرت عليه في الفترة الأخيرة، فكلها خلعت ملابسي رأيت الكثير من الكدمات الزرقاء تغطي أجزاء كبيرة من جسدي، ألوان كثيرة تتداخل مع بعضها على جلدي، أضغ المراهم المُسكنة وأرتدي ما يجب أن أرتديه وأنا مستسلم لا حيلة لي، لكن الآلام الناتجة عنها تعلن عن نفسها أحياناً، نظرت إلى وجهي في المرآة المعلقة في الحمام، فرأيت كثيراً من السواد قد التفت حول عيني بقوة، أردت أن أنام لكنني لا أريد كدمات أخرى أعالجها، فكرت في أن أنام عند الخفير لكنني لم أستحسن الفكرة، فكرت في أن أذهب إلى حسن

لكنني خجلت من ذلك وأنا أعلم أنه هو نفسه قد بدأ يخاف مني. سمعت أم محمد تصرخ كالعادة في مروان كي لا يدخل الفيلا، فهي تهتم بنظافة الفيلا بشكل تفصيلي يوم الجمعة، غادرت البيت وذهبت إلى المسجد لأصلي الجمعة، لم أرَ أبي يواظب على صلاة الجمعة أو يجثني على أدائها من قبل، لكنني ذهبت ولا أعلم لماذا، بعد أن انتهيت وأثناء خروجي من المسجد أحسست بشيء غريب، وكأنني أعبر طريقًا إجباريًا لا بد من عبوره للوصول، لكن الوصول إلى أين؟ لم أستشعر وجهتي بعد. في طريق عودتي تذكرت «نوح» وأني لم أره منذ فترة، دخلت الحديقة فرأيت مروان يجلس فيها، كان يأكل وقد امتلأ فمه عن آخره، دخلت البيت وحاولت تجاهل كل شيء، كانت أم محمد توشك على الانتهاء مما تفعله، لمحتها تنظر إلي وتبتسم وتقول: «تقبل الله» فأردفت في عفوية «شكرًا يا أم محمد» فضحكت! لكن كيف علمت بذهابي للمسجد؟ لم أكن على استعداد لسؤالها، كنت أريد أن أستريح وحسب.

دخلت غرفتي وأغلقتها، أنا الذي لم أحب العيش في باسوس لهدوئها فاخترع مخي أحداثًا مليئة بالتشويق والإثارة كي أتغلب على الهدوء الذي لم أعتده، أو ربها على أصوات الحديقة التي لا تهدأ في الليل، أليس هذا ما أردته وتمنيته عند مجيئنا إلى باسوس؟

مغامرة تغلب الملل؟ لكنني بالتأكيد لم أتمنَّ أن أعيش وحدي مع الخفير وزوجته وأولادهما الممتوعين من دخول الفيلا! ليضربهم عم محمد إذا ما علم بدخولهم لدقائقي، لو كنت في الإمارات الآن لكنت ألعب أو أكل مع أصدقائي في المطاعم العالمية.

قررت أن أتجاهل كل ما أفكر فيه، أن أرجع إلى طبيعتي؛ فأنا أحب اللعب كثيرًا، اللعب هو أهم مصدر للإلهاء، فعندما تلعب تنسى وتتشي وتنشغل بشيء ليس حقيقياً، أترى كل ما حدث كان لعبة؟ أكان الصوت صوت عقلي؟ أيمن أن يكون رفض عقلي وجودي هنا في باسوس في فيلا على النيل بمفردي هو ما يفعل بي هذا؟ وإذا كان كذلك هل أعتبر نفسي سويًا بعد ذلك؟ كيف أتأكد أنني بخير؟

جلست أمام التلفزيون في غرفتي أشاهد برنامج «عالم الحيوان»، رأيت «فهدًا»... أحببت أن أكون مكانه وفي قوته، نعم أنا فهد مُفترس جائع أتجول في الغابة، أبحث عن فريسة، أمشي بين الأشجار وحيداً في الشمس، تغلبنى حرارتها فأتسلق شجرة عجوزاً ضخمة وافرة الظلال لتكون مخبئي حين الغروب، آخذ قبيلوتي في هدوء غير مبالٍ بجذوعي أو بها يحدث حولي في غابة لا تنصر إلا القوي، ولا ترحم الضعيف، تبدأ الشمس في الغروب فاستيقظ على مهل لأراها تختبئ بين الأشجار، أتمطى وأنزل من

أقرب أكثر، يُحس الغزال بشيء مُريب فيتوقف عن الأكل وتتبعه
أذناه وجميع حواسه، أختبئ وراء شجرة ضخمة، ينظر الغزال
بطرفي عينيه يمينا ويسارا فلا يجد شيئا يستدعي الخوف، فيعود
إلى اطمئنانه ويأكل مرة ثانية في سذاجة أعرفها، أقرب أكثر
وأكثر إلى أن أصبح أنا سيد الموقف، يلتف الغزال فيراني فيعرف
مصيره، يجري بكل قوته لكن هيهات، أنا ملك السرعة على
الأرض، أجري وراءه وأضحك على ما تفعله الحياة بالكائنات
جميعها، هل خلقنا وخلق معنا حب البقاء مع استمرار الشقاء؟
لماذا لا يُسلم نفسه في رضا ويوفر علينا هذا الشقاء الذي لن

ينتصر فيه وهو يعلم مُسبقًا، لكن يُعجبني إصراره، أكاد أمس ظهره لكنه يُفلس، لا أريد أن أمسك به الآن؛ لأنني أعشق المطاردة، وإن كُنت أنتصر في كل مرة، لأتلفذ بلحم ما آكله بعد تعب لأرضي نفسي، ولأنني أستحق التمتع بالفوز بعد المعاناة، يزيد الغزال من سرعته وتزداد ضربات قلبه ويزداد توتره، أحب ما أرى حقًا لكنني أيضًا سريع الملل، لا أجد شيئًا جديدًا، فهذا مشهد تكرر على أجدادنا وآبائنا وتعلمناه منهم، أوسّع من فتحة أرجلي قليلًا، ثوانٍ تمر وأنا أثبت في ظهره، وهو ما زال يقاوم ويجتهد ويجري رغم الثقل فوق ظهره، فأباعته بغرز أنيابي في عنقه، عضه قوية ثم عضه أخرى أكثر قوة، يقع حزينا تحت فكي وهو دامع العين، عضه أخيرة أغرس فيها كل فكي فينفجر الدم كالنافورة وأنا ألعق الدم المنفجر في شهوة.

في هذه اللحظة العجيبة أحسست بانفجار الدماء على وجهي وعلى ذراعي، كأنها حقيقة، لهذا الحد يمكن أن يكون الخيال ملموسًا؟ لهذا الحد تعايشت مع خيالاتي؟ فتحت عيني ببطء فلم تكن الصورة واضحة، عادت الرؤية تدريجيًا فرأيت لونًا أحمر في كل مكان، عادت الرؤية قوية فرأيت شيئًا لم أقو على رؤيته، أردت أن أصرخ في استغاثة، لكن لساني انعقد وكأنني أنخرس.

ما هذا الذي أراه؟ بقعة دم كبيرة في وسط الغرفة! دم لرج طازج! بقع دم كثيرة منتشرة على جدران الغرفة! الدم يملأ ملابسي! وجهي ويدي وفمي!!!

وقفت بجانب كل هذا الدم ولا أدري ماذا أفعل! ألم أكن فهدًا في الغابة؟ هل حقًا قتلت الغزال المسلم؟ وإذا كان كذلك فكيف حضر دمه إلى غرفتي؟! ألم تنظف أم محمد الغرفة والبيت كله منذ قليل؟ بلى لقد دخلت الغرفة وكانت نظيفة أكثر من كل يوم! نظرت حولي لأعرف مصدر الدم فلم أجده، نظرت إلى السقف ويا هول ما رأيت! كان السقف هو مصدر الدم!!

بقعة دماء كبيرة بنفس مساحة بقعة الأرض وفي نفس مكانها! هل سقط الدم من السقف وانفجر في الغرفة كلها؟! لكن من أين؟ الدم يملأ الغرفة الآن ورائحة الموت أيضًا، أخذت دموعي تنهمر دون توقف ولم أستطع أن أتحكم في شيء على الإطلاق، حتى إنني تبولت على نفسي دون أن أدري فأختلط البول بالدم وأنا لا أقوى على الحركة، ثم رأيت الجدران تضيق علي وتضيق حتى كادت تطبق علي، فتحت باب الغرفة وهرولت إلى خارجها ثم خارج الفيلا وأنا أبكي وأصرخ بصوت عالٍ لم أختبره من قبل. اتجهت نحو غرفة الخفير وكان وقت العصر قد مضى وهم يستفيقون من قيلولتهم، رأني عم محمد وزوجته فأصابها الهلع

والدهشة، نظر عم محمد إلي ونظر إلى الفيلا نظرة ذات مغزى لن أنساها.

جاء مروان ينظر إلي فنهرته أمه ليعود إلى الداخل، ظللت أبكي وأنا في حالة هستيرية حتى إنني لا أتذكر جميع ما قلنا، أخيراً تحدث الخفير في خوف:

- إيه يا ابني اللي حصل وإيه الدم ده كله؟!!

أجبت، ومخارج أفاظي غير مفهومة من كثرة البكاء:

- كنت بلعب.. بتخيل بس.. بلعب فهد...

- إيه؟

- فهد.. وباكل غزال والدم.. معرفش إزاي بجه والله ما

أعرف...

أردفت أم محمد وقسماتها كلها تتعاطف معي في حنان أم:

- أنا لسه منضفة الفيلا كلها وأوضتك كانت نضيفة، إيه

اللي حصل؟ الدم ده جوه؟ مين اللي جوه؟

لم أتوقف لحظة عن النسيج وأنا أقول:

- والله ما أعرف متين...

نظرت إلي بكل عطف:

- لا حول ولا قوة إلا بالله! تعال يا ابني وريني فين الدم

...

قاطعها أبو محمد في حزم:

- استني جاي معاكى.

ثم التفت ناحية الغرفة وأعلن تعليقاته لمرّوان:

- حسك عينك تيجي ورانا هقطع خبرك.. فاهم؟ اقعد مع

اخواتك لحد ما نرجع.

اصطحباني معاً إلى داخل الفيلا، آثار أقدام دماء، إنها قدماي

بالطبع، دخلنا جميعاً الغرفة، ما إن رأيا مشهد الدماء حتى علت

أصواتها في غير انتظام: «الله أكبر.. الله أكبر» مراراً وتكراراً.

اقتربت أم محمد من الدماء وبدأت تشمها في ترقب وحذر

وأبو محمد واجم كمن صعقته صاعقة، نظرت أم محمد لزوجها

ولاح عليها قلق وخوف، لكنها استدعت نبرة مُختلفة لطمأنتي

وقالت:

- ماتخافش مفيش حاجة.

ثم نظرت إلي بمنتهى الشفقة وقالت:

- ادخل دلوقتي حالاً استحمى وسيبلي هدومك في طبق

لوحده في الحمام، وأنا هجيبلك هدوم تانية حالاً.. وإنت يا

أبو محمد هاتلي من الحمام اللي فوق طبق وليفة ومساحة خليني

أنضف بسرعة.

نظر إليها الرجل وعيناه تتحدثان نيابة عنه ولم يتحرك،

فزغرت له وأردفت في صوت عالٍ:

- ياللا يا راجل هتتف تبحلق في إيه؟ الي حصل حصل.

ثم نظرت إلي مرة أخرى وأردفت:

- وانت يا آدم هتفضل واقف وشكلك كده؟ ياللا يا حبيبي

نخش استحمي كويس.

دخلت الحمام وفعلت كما قالت لي، سمعت صوت أذان

المغرب واضحًا ولم أكن أهتم بصوت الأذان من قبل، لكنني

أحسست بتعلقني به كتعلق غريق بقشة، جاء صوت أم محمد من

الخارج لتعطيني منشفة وملابس نظيفة.

خرجت من الحمام فشاهدت أم محمد تهبئ المكان للنظافة

فتلف سجادة صغيرة مليئة بالدم، وسمعت أبو محمد يتحدث إلى

أحد عبر هاتف المنزل ويحثه على الإسراع، طلبت مني أم محمد أن

أستريح مع ابنها مروان حين انتهائها من التنظيف ففعلت على

الفور، جلست مع مروان وباب الغرفة مفتوح، كان ينظر إلي في

ذعر ولا يتكلم، ولما فعل كانت نبرته مُرتعشة فقال:

- هو صحيح الفيلا دي مسكونة؟ أنا بسمع كلام كثير

إنها...

نظرت إليه وأنا أفكر، طريقته كانت توحى بأنه يعرف أكثر

مما أعرف أنا، حين هممت بأن أسأله رأيت شيخًا يرتدي عمامة

ويستعيد بالله ويدخل من البوابة الحديدية المواربة ويستقبله أبو محمد فيدخلان معاً الفيلا.

خيم الليل علينا وكانت أضواء الفيلا كلها مُضاءة بالداخل والخارج، وجلجل لأول مرة صوت القرآن في الفيلا، ثم ظهر أخيراً الخفير وزوجته والشيخ، توقفوا عند الغرفة ونظروا إلي، بدا على أم محمد التعب والإرهاق، نظرت إلي وحاولت أن تبسم وقالت في وهن:

- أنا نضفت الأوضة والفيلا تاني وبقت زي الفل ما تقلقش، الشيخ معروض كمان قرا قرآن وبإذن الله مش هيبقى في حاجة، هدومك اتغسلت ونشرتها، إحنا مش هنجيب سيرة لأهلك، وانت كمان ما تجيبش سيرة علشان ميتخضوش حرام. نظر إلي عم محمد وأردف:

- الشيخ معروض عايز يرقيك يا آدم.

- يعني إيه يرقيني؟

لاحت على الشيخ ملامح دهشة ونظر إلى الخفير ونظر إلي وأردف:

- عندك كام سنة يا آدم يا ابني؟

- ١٣

- عندك ١٣ سنة ومتعرفش يعني إيه رقية شرعية؟

ربت أبو محمد على كتف الشيخ وأردف:

- معلىش يا شيخنا.. زي ما حكيتلك.

- لا حول ولا قوة إلا بالله! الرقية يا ابني هي كلام الله

يحصنك من أي شر.

بدأ الشيخ في الرقية الشرعية، تركتهم يفعلون ما يرونه

صحيحًا، لكن لماذا يحدث كل هذا في اليوم الوحيد الذي أذهب

فيه إلى المسجد وأصلي لله؟ وكأنه عقاب؟ لم أبح بها يدور في

خلدي لأحد، لكنني سوف أخبر «نوح» حينما أراه، لعله يعرف

الإجابة.

خيرني أبو محمد بين المبيت عنده مع مروان أو المبيت في

غرفتي كما أشاء، كان الاختيار صعبًا، لكنني إذا لم أبت بغرفتي

الآن فمن سيبت بها إذن؟ لا، لن أترك بيتي لأحد.

اصطحبني أبو محمد للدخول وترك زوجته تستريح من تعب

اليوم، في حين كان يؤكد أنه سوف يظل مُستيقظًا من أجلي متى

أريده، عاملني كوالد حنون ليلتها، دخلت الفيلا وكانت الأنوار

كلها مُضاءة وصوت القرآن عاليًا فهدأت، أحسست كأنه حماية،

أدخلني إلى غرفتي فرأيتها عادت نظيفة كما كانت تقريبًا فيما عدا

بعض الآثار الطفيفة على الجدران والسقف اللعين، لم تكن كثيرة

لكنها كانت واضحة تمامًا، أشار علي بترك الأنوار مضاءة كما هي

- براحتك يا آدم أنا حذرتك أكثر من مرة، لا «نوح» ولا

غير «نوح» هيمنعوني منك.

ثم سكن الصوت واختفى تمامًا..

(١٢)

«حسن»

مُنذ أن تركني آدم وغادر البيت في آخر مرة التقينا، شيئان لم يتوقفا عن الحدوث، الأول هو سؤال أبي عن مدى علاقتي به، هل صداقتنا قوية؟ أم أنها تقف كما يعتقدون عند حدود الزيارات الأسرية بين الحين والآخر؟ الشيء الثاني إحساسي بالندالة مع صديق طفولتي.

لكن ماذا أفعل بكل هذا القلق الذي استبد بوالدي؟ حتى وصل به الأمر لمراقبتي! الطريف أنني أعلم كل ما يفعله، لكنه على يقين بأنني لا أدري من الأمر شيئاً، كم أحب سداجة الآباء وهم يلعبون أدواراً ليسوا مؤهلين لها! هنا رأيت أن وقفني مع نفسي واجبة الحدوث، فحقيقة الأمر أنني كنت خائفاً جداً، كنت أستطيع أن أتواصل مع آدم لأطمئن عليه دون علم أبي، أستطيع أن أهدئ أبي بسهولة. لكنني كنت خائفاً من آدم وخائفاً كذلك على نفسي وعلى آدم أيضاً، مشاعر كثيرة متضاربة، بل كنت خائفاً على بيتي لنلا يصيبه مكروه بمجيء آدم إليه، نعم أعترف.. كنت جباناً.

لكن بعد كثير من التفكير، لم أستطع أن أعد نفسي من الرجال، ثم إنني نظرت إلى حياة أبي بإمعان.. كانت حياة سيئة ولم أريد أن أكررها؛ لأن اختبار الحياة يُباغتنا في أوقات حرجة، تذكرت خيانة أبي لأصدقائه، بل وتبادلهم أدوار الخسة مع بعضهم البعض، الآن هو بلا صديق حقيقي، كلها علاقات مصالح بحتة لا تدور إلا حول المال والأراضي والموارث والعقارات. بلا أمان وبلا مأوى من أي كيد، فأنا لم أر صديقاً حقيقياً على مدار سنوات عمره يحبه بإخلاص، وكذلك لم أراه يحب صديقاً له، لم يكن له صديق واحد وفي، أهذا ما أريد أن أكون عليه عندما أكبر؟ الصداقات القوية لا تُبنى في الكبر بل تُؤسس من الصغر.

فكرت في أمر الصداقة كثيراً فوجدت أنها علاقة وطيدة لا تعصف بها رياح الحياة وإن اشتدت، علاقة لا تكون قوية إلا بالتفاضي والمشاركة والإخلاص والمثابرة، كثير من الحب هو الأهم، وهو ما يبقى في نهاية الرحلة.

تذكرت آدم وكل سنوات عمرونا البسيطة والجميلة، أردتها أن تكون أساساً لصداقة قوية تعمر في الأرض على قدر أعمارنا فيها، فاتخذت قراراً بمساعدة صديقي رغم كل خوفي وجبني وما قد أواجهه؛ لهذا تحايلت على أبي وأمي ومن يرصد تحركاتي

في بلاهة وقررت الذهاب إلى فيلا آدم الخولي، وليكن ما يكون،
 كأن الحياة قد وهبتي الشجاعة دفعة واحدة.

على مقربة من بوابة الفيلا الحديدية رأيت الحفير عم محمد
 يقف أمامها وسط دائرة من حُرّاس البيوت المجاورة، يتحدث
 بصوت عالٍ غير مفهوم، لم أتبين مخارج ألفاظه، أظنني سمعتهم
 يرددون: «اللهم احفظنا»، ما خنته أن الأمر مهم لالتفافهم حوله
 وإنصاتهم الشديد.

عندما اقتربت ورآني عم محمد خفت صوته وأشار بيده
 مُرحبًا فالتفت للجمع إلى ينظرون، كانت البوابة مفتوحة قليلًا
 وأطفالهم يلعبون بالقرب منهم، يقف مروان وحيدًا بالداخل
 ويبدو على غير عادته، لم أتبين حالته لكنه ليس مروان الذي
 أعرفه، نظراته غريبة جدًا.

سلمت على مروان لكنه لم يُبالِ بي، عبرت الحديقة وضربت
 جرس الباب ووقفت أنتظر، ثم سمعت صوت القرآن الكريم
 بالداخل عاليًا، اطمأنت واضطرب قلبي في نفس الوقت، هذا
 يدل على أن شيئًا قويًا قد حدث أثناء فترة غيابي؛ لأن آدم لم يكن
 ليفعل ذلك وحده دون سبب، لكن القرآن على أية حال حماية
 وحصن.

ظللت أنتظر أن يفتح آدم الباب، نظرت مرة أخرى إلى

دخلت البيت ونظرت إليه نظرة شاملة وكأنني أفحصه،
 لاحظت كآبة غريبة على المكان بالرغم من كثرة الإضاءة، ورأيت
 صديقي وقد تبدل تمامًا، سبقني آدم بغير ترحيب أو حديث
 ودخل غرفته في خطى بطيئة، دخلت الغرفة ورائه فهالني ما
 رأيت، دوائر قذرة على الحائط، من الواضح أنها كانت رسومات
 بلون قوي، لكنها لم تُغسل جيدًا فتركت أثرًا على الحائط، رائحة
 عفن تذهب وتجيء في الغرفة، نظرت إلى صديقي وكان جالسًا
 في وسط سريره في حالة استسلام وبدأ مُعتادًا على ما رأيت،
 وقفت في مُتصف الغرفة تمامًا أنظر إلى كل هذا فأغلق الباب

بعنف علينا دون لمسه! انتفضت وقد تملكني الفزع وأنا أنظر إلى صديقي الذي باتت ملامحه غريبة علي وضحك بصوت عالٍ أفرعني أكثر، سألت آدم إذا ما كُنَّا وحدنا في البيت فلم يُجِبني إجابة مُريجة، ابتسم رغماً عنه ثم ضحك ضحكة عجيبة وقال: «يعنى»!

تسمرت مكاني وقد تأكدت أنه قد أصيب بمس شيطاني، لكن كل من بالخارج رأوني أدخل فلماذا لم يحذرنى أحدهم؟ لماذا لم يحذرنى مروان؟ استمر آدم في الضحك بهستيريا دون توقف لدقيقة كاملة حتى إنني ظننت أن قلبي توقف للحظات، ثم عاد ينحف عندما توقف آدم عن الضحك ونظر إلي في شفقة، في هذه اللحظة أحسست بشيء نزل من فوق على قميصي فنظرت أتفقده فإذا بي أرى دماء!! هالني المنظر ونظرت تلقائياً إلى السقف فشاهدت دماء لونها داكن شبه مُتجلطة، لكن جزءاً منها سائح يسيل في هدوء ويتجمع في منتصف الغرفة وقد سألت هذا النقطة على قميصي!

عرفت منذ أن رأيت هذا الكائن أن الأمر ليس بسيطاً، لكنني لم أكن لأتخيل ما أرى أبداً أو حتى أصدقته، تعامل آدم مع الأمر ببساطة وأشار علي بالجلوس وقال:
- اقعد يا حسن متخافش.

شيء بداخلي لم يستطع أن يجلس على كرسي المكتب حيث رأيت الكائن جالساً عليه آخر مرة، نظرت إلى كرسي في ركن الغرفة فهسمت أن أجلس عليه فنهاني آدم في سرعة وحزم وكانت قد أعلنت ملامح صديقي عن جدية لم أعهد لها عنه:

- لأ.. بلاش هنا.. اقعد على كرسي المكتب أحسن.

توجست مما قال خيفة فسألته:

- إشمعنى؟

- من غير إشمعنى، من غير ليه، مش عايز أسئلة كثير،

المهم.. إيه اللي فكرك بيا يا حسن؟

فهمت أن صديقي يريد حقه مني فلم أمانع:

- جاي أقف جنبك في اللي انت فيه ده.

ضحك آدم ضحكة عالية مريبة مرة ثانية لم تُخفني هذه المرة

وقال:

- ياااه دلوقتي بس افتكرت؟

- أنا عارف إن حقك متعرفنيش تاني، أنا بعترف إني خُفت..

أنا بنى آدم في الآخر برضه، خفت من كل حاجة.

- ودلوقتي مش خايف؟

- دلوقتي حسيت إني كنت جبان وقليل الأصل معاك، هو

ده اللي عايز تسمعه يا آدم صح؟ أيوه كنت خايف من كل حاجة

حتى منك، واكتشفت إني منستش الكورة اللي اختفت زمان في
الجنية لما كنا بتلعب، فآكرها طبعًا، ولا نسيت الحواديت اللي كان
أهل البلد بيحكوها عن الفيلا وإحنا صغيرين، وسمعتها كذا
مرة من كذا حد وأنا صغير.

ضاقت عينا آدم وكأنه يتذكر معي وسألني:

- حواديت إيه؟

- حاجات زي إن الفيلا مسكونة يا آدم، صوت الضحك
العالي اللي كان يسمعه عم محمد جاي من أوض النوم اللي فوق
وانتم مسافرين! النور اللي بيولع لوحدته ويطفي كأن حد قاعد!
ابنه اللي قلبه وقف في الأوضة اللي فوق بعد ما قعد يصرخ فترة..
ده اللي فآكره دلوقتي.

نظر إلي آدم وكأنه يتذكر شيئًا:

- ابنه مات فوق؟ إزاي؟

- ما عرفش تفاصيل كثير، كلها حواديت، لكن اللي سمعته
إن أمه وأبوه كانوا معاه تقريبًا، هو كان في الدور اللي فوق وقعد
يلعب كثير، الباب قفل عليه زي ما قفل علينا حالًا كده وفي
الأخر لقوه ميت، وحكايات تانية كثير مرعبة، ومع ذلك جيتلك
اهو علشان تعرف بحبك قد إيه..

- سمعت الكلام ده مين؟

- مرة زمان كانت أمي بتحكى لصاحبيتها.
- وما متك عرفت منين؟
- معرفش يا آدم مسألتهاش.. أنا كنت بتصنت عليهم.
- وبعد ما الباب قفل على الولد؟
- الباب مرضيش يفتح، والولد فضل يصرخ ويقول كلام مش مفهوم، على ما كسروا الباب الولد كان مات، اللي يقول قلبه وقف واللي يقول اتخنق، هو ده اللي سمعناه لكن محدش عارف الحقيقة، ما عندك أهله بره أهم أسألهم.
- ولو هو الموضوع كده فضلوا قاعدين ليه في المكان؟
- يمكن ملهمش حته تانية يروحوها؟
- قام آدم من مكانه وسمعتة يقول:
- زي ما الحمام قفل عليا!
- أحسست أن شيئاً ما جعله يتخلى عن استسلامه، كأنه يريد الحقيقة، أخذ يروح ويجيء في الغرفة ذهاباً وإياباً ثم نظر إلي وقال:
- أنا الكلام ده مش داخل دماغي! لو انت مكانهم تقعد في المكان تاني بعد ما ابنك مات فيه؟ وتقعد ليه؟
- أنا لأ.. بس أنا مش مكانهم يا آدم، كل واحد له ظروفه، أكيد محتاجين، وبعدين أهلك أهل كرم وعمرهم ما بخلوا على

عم محمد ولا مراته ولا ولاده بحاجة، ثم إنها شغلانة مريحة جداً، أهل البيت مش قاعدين يقرفوهم واعمل وسوي، دول بيعجوا زيارات كل فين وفين، وكل حاجة ماشية بالتليفون، أكيد لهم حسية تانية.

- اعمممم.. عموماً كله هيبان.

- هما مش كانوا معاك الفترة اللي فاتت دي؟

- كانت أم محمد بتروح وتيجي تنضف.. تطبخ.. كده يعني.

- وكنت بتقعد لوحدك؟ ولا بتخرج ولا إيه؟

- كان نوح بيعجي يقعد معايا..

- مين نوح ده يا آدم؟

- ده واد صاحبي كده بس جدع.. مش زي ناس.

- يا عم خلصنا. ماشي شكراً.

- بعرفك بس الغريب بيعمل إيه.

- والغريب ده مخافش؟

- لأ مخافش.. بس يمكن علشان متدين وكل ما بيعجي

بيديني درس دين، بيعلمني إزاي، أواجه اللي بيمر بيا من غير

فزع، وكمان بدأت أصلي..

- طيب والله كويس.. ابقى عرفني عليه الواد ده.

- ماشي.

قُمت من مكاني واقتربت من آدم ومددت يدي مُصافحًا
ونظرت له وقلت:

- يعني زعلان برضه ولا إيه؟

ابتسم آدم واقترب مصافحًا وكأنه سيضربني:

- عندي حاجات تاني أهم من إني أزعل من واحد تافه

زيك..

ورغماً عنا ابتسمنا معاً.

بجانبي ولا ينظر إلي، فتوقفت عن السير، لكنه توقف أيضًا ولم ينظر إلي! وكنت أعلم أنه كابوس جديد، حتى وأنا بداخله.

أخذت أتلفت يمينا ويسارا أبحث عن إنسان يساعدي فلم أجد مخلوقا، كان الشارع خاليا من كل المخلوقات إلا أنا وهذا الكلب، هشيت مرة ثانية فواصل الكلب السير بجانبي، أسرع السير فأسرع، أبطأت فأبطأ، قطعت الطريق فواصل معي، توقفت فتوقف، ارتعبت، استجمعت قواي وحاولت أن أزيحه عن طريقي لكنه لم يبال ولم ينظر لي، توقفت مكاني لبرهة كي أفكر ماذا أفعل وأنا أنظر إليه، فجلس على الأرض ورفع عينيه

إلي وكأنه يبادلني التفكير، ساورني الشك أنه ربما يقرأ أفكاري!
فارتعبت أكثر لكن لم يكن لدي خطة للهروب وقد بدا أنه يريد
شيئًا مني تحديدًا، أو ربما يُريد أن يفتك بي، لكنني لا أستطيع أن
أقف مكاني كثيرًا فاتخذت قرارًا بالسير مرة أخرى، حالما اتخذته
نهض الكلب مرة أخرى ونظر لي مُستعدًا لإكمال الطريق، تجاهلت
نظرته ومشيت فمشى بجانبني وقد اقترب هذه المرة! وأخذ في
الاقتراب أكثر فصرخت، وفجأة ظهر رجل يُمسك بيده مصحفًا
وأخذ ينهي الكلب عن السير معي، أشار إلي الرجل بالسير وقال
في حزم: «كامل طريقك انت وسيهولي»، كان وجه الرجل سمحًا
فسرت في طريقي وأنا مطمئن إلى حد كبير.

مشيت قليلًا لكنني سمعت صوت زحف ثم فحيح! ورأيت
شيئًا ضخماً طويلاً يتعرج يأتي في مقابلي من بعيد، لم أتبين ما هو،
لكنه يتلوى على الأرض بسرعة فائقة، إلى أن بات قريبًا مني فقام
وانتصب بشكل عجيب فأصبح في طول بناية، كان تُعبانًا أسود
ضخمًا لم أر مثيله أبدًا، تُعبانًا جائعًا وغاضبًا، تُعبانًا يتكلم! ينظر
من فوق إلى كلتا عينيَّ في صرامة وهو يقول:

- رايح فين؟

تلجسم لساني وأنا أنظر إليه وإلى حجمه وكان ذيله يتلوى في
مكر على الأرض، أيقنت أن أمري قد انتهى لكن بقيت أميئي

ألا أتألم في موتي، اقترب الثعبان وسأل ببطء وهدوء ورُبها توعد:
- بقول.. رايح فين؟

تصببت عرقاً وحاولت أن أتكلم فقلت في صوت أعتد أنه
لم يخرج من حاقبي:
- معرفش.

وفجأة ظهر الكلب مرة أخرى يحاصرني من ورائي،
تساءلت: ماذا فعل بحامل المصحف؟ أم أنه تحايل عليه ليأتيني
من اتجاه آخر؟ نظر الكلب إلى الثعبان نظرة عجيبة، وفهمت أن
الكلب كان يريدني أن أسير في طريق معين من البداية للوصول
إلى هذا الثعبان.

هنا ظهر نوح من شارع جانبي أخاف الكلب وأرجعه إلى
الوراء! ألقى نوح زرعة صبار ضخمة مليئة بالأشواك فجرى
إليها الثعبان في سرعة كبيرة والتهمها، نظر الكلب في هلع إلى
الثعبان الذي بدأ يخرج شوك الصبار من جلده وهو يصارع
الموت، نظر الثعبان إلى نوح وهو يتألم، ثم رجع الكلب إلى
الخلف ونظر إلى نوح مرة أخرى في خوف وأخذ يعدو في الاتجاه
المعاكس، نظر نوح إلى الثعبان في شفقة وأخذني من يدي إلى
أن أوصلني إلى حاقله تُوصلني إلى وجهتي، بدأ النور يسطع
مُعلنا اختفاء الظلام، ثم أوصاني نوح بكلمات كثيرة لا أتذكرها

وودعني واختفى!

استيقظت من هذا الكابوس العجيب ألهمت وأحس بدقات قلبي تتسارع وتوجعني، وضعت يدي على صدري في إعياء، كان ضوء خفيف يشق ظلام الغرفة، فهيم لي أني أرى «نوح» يمشي في الغرفة ويدخل في الحائط! ما أصعب الهذيان! نهضت لاهثاً وتخبّطت أكثر من مرة في الظلام وكدت أسقط حتى فتحت البلكونة، لم يتبق على أذان الفجر إلا وقت قليل، لم أكن قد أفقت بشكل كامل، رأيت «نوح» يجري في الحديقة بين الأشجار، أخذت أفرك عيني بكلتا يدي، نظرت مرة أخرى فلم أجد شيئاً، سيطر الحلم على عقلي سيطرة كاملة، دخلت الغرفة مرة أخرى وجلست على السرير أفكر، مكثت مكاني لدقائق لا أستطيع أن أسلم بأن ما عشته منذ قليل كان مجرد كابوس! بدا كأنه حقيقي، أحاول أن أتذكر وصايا «نوح» فلا أستطيع.

ثم انتبهت لأصوات ضحك عالية تأتي من الحائط خلفي، أنظر خلفي فتنقل الأصوات على يميني، أنظر تجاهها فتنقل على يساري فأنظر إلى اليسار لكنها انتقلت إلى الأعلى، كأنها آتية من الدور العلوي، نظرت إلى السقف فرأيت الدم المتجلط عليه كأنه يسبح وينزل على الأرض ببطء في نقط متظمة! نظرت إلى الأرض فلم أجد آثاراً للدماء في حين استمرت الدماء في الهبوط!

رغم كل الخوف بداخلي ولأول مرة قررت أن أستكشف ما يدور حولي، تقدمت ببطء نحو باب الغرفة وفتحتها، قبل أن أخرج سمعت صوت خطوات تصعد السلم وصرير يأتي منه، الآن أنا على يقين من وجود أحد أو شيء بالبيت، بقي أن أكون رجلاً كما يظني أبي فأدافع عن نفسي.

خرجت من الغرفة ونظرت إلى صالة الاستقبال الخاوية الهادئة، ثم تابعت النظر لأعلى في ترقب فسمعت صوت باب يُغلق! الصوت الآن يوجهني ويُرشدني إلى الاتجاه الصحيح للقاءه! لكن من هو؟

صعدت السلم الخشبي وقد تغلب فضولي على نخوفي، كانت كل أبواب الغرف مُغلقة والظلام يخيم في كآبة على المكان، فهممت أن أنزل، وبمجرد أن أدت ظهري ونزلت درجة واحدة، فُتح باب غرفة الضيوف لكن بقي مُوارباً! التفت في ببطء واستسلام لمواجهة مصيري فرأيت خيالاً يتلوى! لكن هذه المرة تغلب نخوفي على أي إحساس موجود، هممت أن أصعد مرة ثانية لكن سمعت صوت الجرس وخطبات غير منتظمة على باب الفيلا الرئيسي، حمدت الله ونزلت لأجيبه دون تفكير، كان نوح هو الطارق، وقفت أمامه مُتخبط المشاعر دون إلقاء تحية، أشعر وكأنه كان معي منذ قليل يدفع عني الأذى، ابتسم نوح

ونظر إلي وقال:

- معلش يا آدم أنا جاي في وقت غريب..

لم أجبهُ ووقفتم أنظروا له في شرود فتابع:

- أمشي طيب؟ أنا عارف إني جاي في وقت...

تنبّهت إلى ما يقوله وقاطعته:

- لا مش مشكلة ولا حاجة.. أنا صاحي بقالي شوية، ادخل.

تركت الباب ودخلت مباشرة إلى غرفتي وعيني مازالت

مُعلّقة بالدور العلوي، أغلق نوح الباب ودخل ورائي الغرفة

وأغلق الباب، جلس على كرسي المكتب بينما استلقيت أنا على

السريّر، بدا نوح جادًا بعض الشيء وأردف:

- إنت مش متعود تصحى على الفجر؟

- يعني على حسب.

- يعني صحيتك؟

أعدت النظر إليه هذه المرة فوجدته يرتدي نفس الملابس

التي شاهدته بها في الحلم! فلم أجب عن سؤاله فأردف:

- إنت كويس يا آدم؟ حصل حاجة؟ أنا عارف إني جاي

بدري جدًّا بس...

قاطعته مُسرّعًا:

- حلمت بيك حلم عجيب، مش مهم التفاصيل بس أنا

كنت في خطر وانت أنقذتني .

نظر إلي نوح ولم يعلق فتابعت:

- زي ما أنقذتني دلوقتي كده.. حاجة عجيبة!

نظرت إلى السقف فنظر نوح إليه وقال:

- استعد تصلي الفجر.

- هصلي لما يأذن.. هو انت إزاي معندكش فضول تعرف

الحلم؟

- لأنني تقريبًا عارفه أو تقدر تقول إني حلمت نفس الحلم،

علشان كده جيتلك دلوقتي أتطمئن عليك.

- إيه؟! -

- مش عايزك يفوتك فرض يا آدم.. ﴿إِنَّ الصَّلَاةَ كَانَتْ عَلَى

الْمُؤْمِنِينَ كِتَابًا مَّوْقُوتًا﴾ (١).

ثم تابع:

- الصلاة على وقتها يا آدم زي ما اتفقنا.. والأذكار

للتحصين.. فاهم؟

- مش فاهم إنت ليه بتقول كده!

- «إذا أظلم القلب من ذكر الله ظهرت الشياطين».

زاد فضولي بهذه الجملة.. أيعلم «نوح» شيئًا لا أعلمه؟

(١) [النساء، ١٠٣].

قاطعني «نوح» وقد نهض واقفاً:

- أنا لازم أمشي دلوقتي..

نظرت إليه وقد تملكني فضولي للمرة الثانية في أقل من ساعة
في هذا اليوم العجيب وقلت:

- إنت جاي علشان تقوي الصلاة على وقتها والأذكار
وتمشي؟

- اسمع يا آدم.. لو عايز أي حاجة في الدنيا هتقدر عليها
بس تتحكم في مخك، المخ هو اللي بيدي إشارات لأي حاجة في
الجسم، حاول تتحكم في مخك، إقنع نفسك إنك مش خايف
وإنك قوي لأنك مع ربنا، هتبقى مش خايف وهتبقى قوي، ربنا
هيكون معاك.

- طيب قولي تعال معايا البيت يا أخي بدل ما انت شايفني
قاعد لو حدي مرعوب وعمال تدي نصايح.

- الأيام دي عندي قلق في البيت مع أبويا، لكن أوعدك
قريب جداً.

نهض «نوح» دون أن ينتظر رداً مني وخرج من الغرفة
فخرجت معه، رأيتة ينظر إلى السلم وإلى أعلى فطافت أسئلة
كثيرة في رأسي، لماذا ينظر إلى أعلى؟ وكيف صادفه نفس الحلم؟
وقبل أن أسأله قال:

- أنا ماشي.. خليك انت في الأوضة ومتطلعش فوق مها
حصل، شغل سورة «البقرة» وصلي كل الصلوات على وقتها وأنا
هبقى أعدي عليك.. متخافش.

نظرت إليه في استسلام دون فهم ودخلت إلى غرفتي
وأغلقتها، لكنني لم أسمع باب الفيلا يُغلق! لعل «نوح» أغلقه في
هدوء، أم أنه مازال بالبيت؟ ما هذا الهراء؟ لماذا يتواجد «نوح»
بالبيت؟

بعد ثوانٍ سمعت طرقاتاً على باب الفيلا، نظرت في الغرفة
لعل نوح قد نسي شيئاً لكنها كانت خاوية، خرجت لأفتح الباب
في توجس وكان حسن، نظرت إليه في ذهول؛ فلم تكن عادته
أن يزورني في هذا الوقت المبكر أيضاً! كان مظهره يوحي بالقلق
فأشرت إليه بالدخول ودلفنا معاً إلى غرفتي، رأته يتلفت حوله
ثم يغلق باب الغرفة ويقف وراءه في قلق، فأردفت:

- غريبة.. جاي بدري برضه.. مالك إنت كمان؟

- أنا كمان يعني إيه؟

- نوح لسه خارج حالاً.. مشفتوش وانت داخل؟

- لأ... حالاً إمتى.

- ده لسه خارج حالاً.. أنا افكرته نسي حاجة ورجع لما

انت خبطت.

- مشفتش حد..

- إزاي؟! بقولك من ثواني يعني ملحقتش يمشي الجنية كلها للباب.

- يا آدم بقولك مشفتش حد..

- يمكن..

- لأ ما يمكنش.. أنا بقالي ربع ساعة بخبط على البوابة الحديد علشان يصحى عم محمد، ما برضه الدنيا بدري قوي.. ده الفجر لسه هياذن.

دار رأسي و حاولت أن أستوعب ما يقول حسن وأردفت:

- نعم؟ يعني البوابة مكنتش مفتوحة؟

- لأ.. إنت غبي؟ بتوكل عم محمد كان نايم وفضلت أخبط ربع ساعة لحد ما صحى.

تذكرت أنني لم أسمع صوت الباب الرئيسي يُغلق، ثم إن «نوح» نصحني بعدم الخروج من الغرفة وعدم الصعود إلى فوق! أترأه هو من يفعل بي كل هذا؟ لكن لماذا وهو دائماً ما يحثني على الصلاة والإيمان؟ توقف رأسي عن التفكير وأحسست بالعرق يتصبب مني، جلست ونظرت إلى حسن في خوف وهمست:

- وطي صوتك.. يظهر نوح لسه في البيت.

نظر إلى حسن في ذهول وضائق عيناه كعادته عند السؤال

وأردف هامسًا:

- مش فاهم حاجة! نوح لسه في البيت ليه؟

- مش عارف.. بس كده عيلتكم بريئة من أي حاجة

ممكن تحصلي حتى لو سحر، الموضوع طلع مع نوح اللي آمنت

له ودخلته بيتي! كلام أبويا طلع صح أني معرفش حد غريب

ومدخلوش البيت.. يا ريتني سمعت كلامه، فاكر لما قولتلي

يمكن حد بيرمي سحر في البيت؟ تفكر هو؟

- أنا معرفوش أصلاً يا آدم لكن طبعًا كلام أبوك صح..

المهم هنعمل إيه دلوقتي؟

- مش عارف.. طيب إنت إيه اللي جابك بدري؟

- حلمت حلم عجيب..

- نعم؟!!

- عيلة شكلها غريب بيتخانق مع بعض، إنت واقف

جنبهم، الغريب إنهم بيتخانقوا هنا في البيت! بعدين شفت

كلب وتعبان واقفين قدامك وفي واحد ملاحه مش باينة هو اللي

أنقذك، أنا مش عارف إيه ده بس خُفت وقلقت عليك، ومكتش

عارف آخذ التليفون عندي في الأوضة أكلمك، قلت قبل ما حد

يصحى أجيلك صدرد.

وفجأة سمعنا أم محمد تصرخ باسمي وتطرق الباب يعنف،

أسرعت وحسن لفتح الباب فرأيتها تنظر إلي في فزع وهي تردد:

- إيه اللي حصل؟ مالك؟

نظرت إليها ذاهلاً وأردفت:

- مالي؟!!

تعجبت وتأملتني وقد لحقها زوجها واقفاً وراءها ينظر إلي

في فزع ثم نظر إلي حسن في قلق وقال:

- مالك يا آدم بتصرخ ليه؟

نظرت إلي حسن متعجباً وإليها مبتسماً مردفاً:

- أنا مصرختش ولا فتحت بقي!

أردفت أم محمد في يقين:

- إزاي يا ابني ده صوت صريرك فزعنا.. إحنا قلنا في

مصيبة!

سادت لحظات من الصمت ثم قلت:

- يمكن حد من الجيران؟

أردفت أم محمد في سرعة:

- يا ابني بقولك صوتك إنت.. بتعيط وتصرخ.. هو أنا

هتوه عنك؟

نظر عم محمد إلي حسن في شك وقال:

- لا مواخدة يا حسن يا ابني نسيت أسألك.. هو أنت إيه

اللي جايبك بدري كده؟

نظر إلي حسن في قلق وقال مُتلعثًا:

- عادي.. جاي لصاحبي.. في حاجة؟

ساد الصمت مرة أخرى لكن نظرات الشك من الخفير وزوجته لم تفارق حسن الذي بدأ يتعرق، عقدت أم محمد ذراعيها وهمت بأن تقول شيئًا فربت زوجها على كتفها وقال:

- ياللا يا أم محمد آدم كويس.. يمكن كان كابوس..

أردفت:

- يمكن إزاي.. إنت سمعته معايا..

قاطعها في حزم:

- بقولك كابوس يا وليه.. امشي قدامي..

نظر إلي عم محمد بعينين حراوين وقال:

- لو احتجت حاجة نادي علينا يا آدم، ولما صاحبك يمشي

اقفل الباب كويس.. أنا هروح أتوضأ وأصلي الفجر..

ذهبا بخطى ثقيلة وأغلقت الباب ونظرت إلى حسن وقد

وجمت، دخلنا غرفتي مرة أخرى يغلب صمتنا الموقوف، لم أستطع

أن أعلق بشيء، لكن حسن قد فهم أن الأمر أكبر من مجرد حلم،

في هذه اللحظة بدأت الدماء المتجلطة في السقف تتساقط بغزارة

كالمطر، تسمرت أعيننا على السقف لدقائق في خوف، أفقت على

يد حسن تنغزني وهو يبخلق في ركن الغرفة متصببًا كثيرًا من العرق، فوجدت ثعبانًا أبيض كبيرًا يتلوى في ركن الغرفة وينظر إلينا كل على حدة، كأنه يفاضل بيننا! هُييءُ إلي أنه يضحك! لا أعلم من أين جاء! أنا وصدريقي نتصبب عرقًا ونُمسك بأيدي بعضنا البعض، نفتح باب الغرفة بسرعة ونخرج، ثم أمسكت مقبض الباب لأحكام إغلاق الباب على الثعبان، كان حسن يرتعش وارتجفت أنا عندما رأيت راقصة الباليه في اللوحة لا تنظر إلي بل تعطيني ظهرها!! ظلمت مُندهشًا مُحملًا في اللوحة وحسن يحثني على المغادرة وهو يجذبني من ملابسي، حتى سمعنا صوت امرأة ورجل يتشاجران بكلمات غير مفهومة داخل غرفتي! صرخنا بفرع وهرعنا إلى الخارج غير مُصدقين لنستغيث بعم محمد في هلع.

(١٤)

«نوح»

أحسست بالوضاعة أمام صديقي آدم إذا ما علم الحقيقة،
كيف يأتمنتي آدم على نفسه وهو وحيد خائف، وأنا أعلم ما
يفعله به أبي وأقف صامتًا لا أجرؤ على الاعتراض؟! كيف أخنع
لأوامره كسابق عهد أمي الذي كان سيئًا في عدم إعجابي بها في
الصغر، أهذا ما أرتضيه لنفسي؟ خيانة من ائتمنتني؟! لا والله لا
أرضى بهذا أبدًا.

بعد أن تركت آدم، جلست أفكر في غرفتي فيما يجب علي
فعله، أفكر في الطريق الصحيح، يجب أن أوقظ أبي من غفلته،
يجب أن آخذ بيده إلى طريق الله كما فعلت أمي معي، يجب أن
أتصرف..

في هذه الأثناء دخل أبي الغرفة دون أن ألاحظه، توقف أمامي
فوقفت احترامًا، رأيت وجهه غاضبًا وواجبًا فخفق قلبي بشدة
ولم أتفعل بقدومه، ظل ينظر إلي في غضب ولم يُشير لجلس
كعادته فظللت واقفًا، ثم أنهى الصمت قائلاً:

- إنت بتتجراً على أبوك يا نوح؟

- العفو يا والدي.

صرخ والدي في وجهي بقوة:

- عفو إيه؟ إنت بتتحداني؟

لم أنطق كلمة أخرى بعدها، سار إلى الشباك في الغرفة وأطل

منه قليلاً ثم التفت إلي وقال:

- أنا عارف علاقتك بآدم من أول ما بدأت، وحذرتك

وانت مسمعتش كلامي، رغم تحذيري لك ألف مرة متصاحبش

من بره العيلة سبتك بمزاجي، عارف سبتك ليه؟

ارتجفت قليلاً وأنا أجيبه:

- ليه؟

- علشان الخبرة.. علشان تعرف قيمة جنسك كويس،

علشان تعرف تنمي قدراتك وتعرف تستغلها، كنت فاكرك

شاطر.

- وهي الشطارة إني أأذي إنسان بريء ملوش دعوى

بحاجة؟

- ملناش دعوى بريء.. ظالم، مش المفروض تتعاطف معاه

خالص.

- يا بابا آدم إنسان مُسلم مبيئديش حد، وانت عارف أصله

كويس، حرام الولد خايف على طول.

- إنت بتدافع عنه ليه؟

- إنسان مسالم وعمره ما أذى حد.. «المسلم لا يؤذي

مخلوق».

ضحك «عبد الله» ضحكة نحيقة عالية ثم استطرد قائلاً:

- وتفتكر لو عرف انت مين برضه هيفضل يجبك؟ هل

تعتقد إنه هيفتكرلك الخير اللي عملته معاه؟

فاجاني سؤاله الذي لم أطرحة على نفسي يوماً.. فأردف وقد

عرف ما أفكر فيه:

- البني آدمين ملهوش أمان، ولو انت مؤمن باللي أمك

قالتهلوك، الكتاب اللي انت مؤمن بيه.. وصف الإنسان بأنه

جاهل وطاغي وظالم وجبان وغير شاكر للنعم، هي دي حقيقة

الإنسان اللي انت فرحان بصداقته.

- أنا مش بتكلم على الإنسان في العموم أنا بتكلم عن آدم

صاحبي، ملوش لازمة اللي انت بتعمله معاه أرجوك لمجرد إني

بحبه وبقينا أصحاب، هو ذنبه إيه؟

- يظهر إن خوفي عليك من الأول بوّظك وكملت خيبتك

بالدروس الهايفة اللي اتعلمتها من أمك.

- عمر الدين ما كان هيافة.. إحنا اتخلقنا في الأساس للعبادة

وال... ..

قاطعني بحدّة:

- لما أتكلّم ما تجادلش.. من إمتى بتقف قصادي وتعارضني؟
أنا ممكن أحبسك..

امتلكت أخيراً قدرًا من الشجاعة يجعلني أتحدّث أمامه
فأردفت في ثبات:

- أنا لما بعارضك بعارضك في الحق، زي ما الحياة والموت
حق، الله حق والدين حق والحساب حق، الجنة والنار حق،
علشان كده خايف عليك من نفسك ومن مصيرك، أنا بحبك
وبحترمك وبخاف منك علشان إنت والدي، لكن مش بخاف
من أي حاجة لأنني قريب من ربنا، بيده الملك وهو على كل شيء
قدير.

- طيب يا نوح.. خاف على مصيرك انت وصاحبك من
اللحظة دي.

ثم تركني وذهب غاضبًا وهو يتوعدني أنا وآدم.. ولم أستطع
أن أوقف طوفان غضبه، فعلمت أنني يجب أن أستعين بأمي.

(١٥)

«عم محمد»

لن أنسى رؤية آدم ملطخًا بالدماء بيكي مذهولًا ودموعه
تختلط بدماء علي وجهه في مشهد عجيب، لن أنسى رؤيته يجري
لاهنًا مذعورًا مع صديقه حسن السعدني فارّين من باب الفيلا
وقد وقف شعر رأسيهما من الخوف عند رؤية الثعبان الأبيض،
عندها رأيت فيهما ابني محمد وقد استبد الخوف به ذات يوم عند
رؤيته نفس الثعبان الأبيض منذ سنوات لكنه لم ينبج كما نجوا.
بالطبع أعلم من بالداخل، وأعلم من هو الثعبان، لا بد أنه
هو، ومن غيره يستطيع أن يفعل كل ذلك؟ سأمحك الله أو لعنك
بما ورطتني فيه يا ابن «السعدني»، كنت أعلم علم اليقين أن ما
بدأ لن ينتهي أبدًا، ظل خامدًا لأعوام ظننت فيها أنني مرتاح
البال، لكن في أعماقي علمت أن ما اشتركت يومًا في عمله سيأتي
يومًا أتحمّل عواقبه.

هذا البيت العتيق خدم فيه جدي لأبي، كان يحب الجد الأكبر
لعائلة «الخولي» حُبًا كبيرًا، كان الجد تقيًا وورعًا، كان يملك

الكثير من خدام الجن المسلمين، «مخاوي» كما اشتهر بين أهل البلد، لكنه لم يؤذِ أحداً قط، كان يستخدم الجن في فك الأذى أحياناً، وأحياناً أخرى يُنكر أي علاقة له بهذا العالم، هذا ما تردد علي مر سنوات في عائلتي البسيطة، والتي تخشى مجرد الحديث إذا ما تعلق الأمر بالعوالم الأخرى.

كبرت وتوارثت الخدمة والحراسة في الفيلا عن أبي الذي توارثها عن أبيه، لم أكمل تعليمي قهراً وفقراً رغم قدراتي، كنت أحياناً أدخل الفيلا لأذاكر في أوقات مختلفة أثناء غياب أصحابها، فأجد تحذير أبي من البقاء وحيداً في الفيلا خاصة في الليل، كان هذا كافياً لإيقاظ أسئلة في عقلي، تغاضيت عنها لسنوات لتمضي الحياة في هدوء، مات والدي ثم لحقت أمي بأبي رحمهما الله، ورزقنا الله وزوجتي طفلنا الأول «محمد» البكري، كانت فرحتي كبيرة يوم مولده.

كان والد آدم يعيش في الإمارات ولا يأتي مُطلقاً، لكنه عندما تزوج بدأ يزور الفيلا زيارات سنوية قصيرة، لم يكن يشكو حدوث أي شيء غير طبيعي، مرت سنوات في هدوء زائف تغاضيت فيها عما أراه وأسمعه في الفيلا ليلاً، وسط خوف زوجتي في بادئ الأمر ثم اعتيادها لما يحدث، فقط أرادتني أن أبتعد عن هذا كله لتربية ابنتنا وتنمية معيشتنا، لكن فضولي كان

عدوي الأول، أخذت أراقب ما يحدث كل ليلة، تُشعل إضاءة خافتة كل ليلة بعد مُنتصف الليل، خيالات تروح وتجيء في حرية، صوت ضحكات يأتينا أحيانًا من الشرفات، كان أهل البلدة يقولون إنها روح الحاج «الخولي» الكبير، لكنني عندما بدأت أسأل وأبحث كثيرًا في سبيل المعرفة، اكتشفت أنها لم تكن كذلك، كُنت ساذجًا وضعيفًا، تصورت أنني قادر على مواجهة أي شيء، لم أكن مؤهلًا حينها، لم أكن كوالدي مُحافظًا على صلتي بالله، ومع ذلك أبحرت في علوم السحر عبر كُتب جلبتها من تاجر ملعون بالقاهرة، قرأتها بعناية وتعلمت منها كيف السبيل إلى التحكم بساكن القبو السفلي عن طريق كتابة بعض طلسم هذه الكتب الملعونة على جدران الفيلا، لكن كان الموضوع دون نتيجة ولم يتغير شيء وظننت أن موضوع طلسم الكتب كذبة ولم أكن أفهم أي شيء.

كان يوم ميلاد محمد الخامس قد اقترب، أشرت على أمه التي أوشكت أن تلد ابنتا الثاني أن نقيم له عيد ميلاد كالأكابر بالفيلا له ولأصدقائه، لم ترتجُ نفسها لأنها تهاب المكان بالداخل، لكنني أصررت تلبيةً لطلب صغيري ذات مرة فقد كان شديد التعلق بي، لا يتركني في مجلس أو عمل، حتى إنه كان ينام مُلتصقًا بي. ولأنني أترثر هنا وهناك فقد وصلت أخباري كاملة لعائلة

«السعدني»، أرسل «علي السعدني» في طلبي لفيلته ففعلت، وكانت علاقتي بهم سطحية، قابلني في ود غير مُبرر، جلسنا معاً نحتمي الشاي ونتحدث عن أحوال البلد، ثم اعتدل في جلسته وألقى ببضعة آلاف من الجنيهات أمامي وابتسم دون تعليق، زاع بصري تجاه النقود، نظرت إليه وابتسمت، تمنيت أن يكون المبلغ لي لكن ما المقابل؟ سألته وابتسامتي ما زالت تنير وجهي:

- إيه الفلوس دي يا بيه؟

- دي علشان عيد ميلاد محمد.. مش انت هتعمله في الفيلا

برضه؟

ارتبكت وجاء صوتي مُتذبذباً:

- ده طبعاً بعد ما أستاذن أصحاب الفيلا..

ضحك الرجل ضحكة أذابتني خجلاً من كذبي عليه

واسترسل:

- خلاص.. اعتبرهم حلاوة ولادة حسن ابني..

- ربنا يبارك فيه ويحفظه يا بيه.

ترددت في أخذ المبلغ لكن عينيَّ كادت أن تأخذه نيابة عن

يدي فقال الرجل:

- مد إيدك خذ الفلوس يا محمد.

أخذت المبلغ على الفور ونظرت إليه لا أصدق أنني أهل

كل هذه النقود، والأهم أنها ملكي، نظر إلي الرجل في ثبات
وتغيرت نبرة صوته فأصبحت جدية وقال في هدوء:

- دلوقتي نعرف نتكلم، اسمعني للآخر يا محمد وفتح
مخك، اللي هطلبه منك مش صعب عليك، بالعكس ده انت
هتعملي خدمة مش هنسالك جميلها وكيان هتاخذ حقها.
نظرت إليه مُنتشياً وقد عقدت العزم على فعل أي شيء
يطلبه وقلت:

- طلباتك أوامر يا علي بيه.

- جميل.. الفيلا اللي انت قاعد فيها، فيها شيء يخلصني، قبو
الفيلا تحته أثر يخلص عيلة السعدني مش الخولي، حاولت أشتري
من إبراهيم الفيلا لكن منشف دماغه وفرحان بيها ويقولي فيلا
أثرية وكلام فارغ، كمان في موضوع أصعب..
- خير إن شاء الله؟

- يعني.. إنت عارف الحاجات اللي بتحصل في الفيلا كل

يوم؟

لم أشأ أن أخلط الأمور هنا وأردت أن أركز على شيء بعينه،
فسألته:

- الناس بتهول يا بيه، في حاجات غريبة آه، لكن مش

بالصورة اللي بتتنقل بين الناس.

نظر إلى الرجل بمكر واستراح في جلسته وقال بنبرة مُختلفة:

- لما الناس بتهول يا محمد.. جبت ليه كُتب سحر وقاعد

تفليها ليل نهار؟

ارتبكت ولم أدري ماذا أقول لكنني لم أدرك وقتها أنه ولا بد

يبعث من يُراقبني منذ فترة، وقف وأخذ يروح وييجيء في الغرفة

بعد أن أشعل سيجارة وأكمل حديثه:

- شوف يا محمد، أنا مبحبش اللف والدوران، أنا وانت

وأهل البلد عارفين إن سُكنة الفيلا صعبة، وانت وارث الحراسة

فيها أبأ عن جد وعارف تتعامل فيها كويس، محدش غريب قرب

من الفيلا إلا واتأذى.. صح؟

أردفت في صدق:

- صح..

- جميل جدأ، أنا هقولك اللي أعرفه كمان وأنا عارف إنك

عارف، الحاج «الخولي» الكبير كان راجل له كرامات كتير.. إنت

فاهمني كويس طبعا مش محتاج أوضح.

ابتلعت ريقى بصعوبة وأردفت:

- الله يرحمه.

- الموضوع إنه لما جدي اكتشف موضوع الأثر اللي تحت

الفيلا رجع للخولي علشان يرجعهوله، لكن الحاج الخولي كان

مُقتنع إنه طالما اشترى الأرض باللي فيها يبقى أي حاجة فيها بتاعته، لكن في الحقيقة الأثر يخص عيلتنا، وفضلت المشكلة على كده.

- طيب ليه الحاج الخولي يعمل كده وهو كان معروف عنه إنه رجل تقي؟!!

- لأن تجارة الآثار من وجهة نظره حرام وكلام فارغ، الأثر ده لو اتباع هيجيب فلوس تأمين مستقبل عيالنا وعايلهم ويمكن البلد بحالها.. وانت أولنا.. فاهمني طبعًا..

اعتدلت في جلسي وأردت أن أثبت وجودي، الآن فهمت اللعبة جيدًا، وهذا المبلغ يجب أن يكون مجرد عقد توقيع شفهي، نظرت إليه وقد تملك الغرور مني وأردفت في ثقة:

- يا بيه.. إنت عاوز نجيب الأثر من غير ما تشتري الفيلا؟
جلس الرجل أمامي وقد ابتسم وقال بصوت فرح:
- الله ينور عليك.. ساعتها الأمور هتبقى سهلة، وخليهم يشبعوا بالفيلا براحتهم، همتك بقى معايا واعتبر المبلغ ده تحت الحساب يا محمد.

ضحكت بصوت عالٍ لأول مرة أمامه وأردفت في ثقة:
- يا بيه المبلغ ده ميكفيش تتفصح بيه في فرنسا أسبوع واحد زي ما بتعمل، أنا عاوز نسبة من الحقة المدفونة لما تتباع، والعربون

ده يزيد حبتين.

اعتدل الرجل في جلسته واختفت ابتسامته تمامًا وقام من مكانه مُتجهًا إلى مكتبه وهو يقول:

- غريبة.. قالولي عليك أهبل يا محمد!

- يا بيه انت عارف اللي انا هبقى مضطر أعمله عشان اطلع

حتة الأثر دي ممكن يبقى إيه؟

- لا مش عارف ومش عاوز أعرف.. اللي يخلصني في الليلة

دي الأثر.. غير كده ما يهمنيش وعرقك هتاخده.. لكن مفيش

نسب يا حبيبي، متنساش إنت مين وأنا ممكن أعمل فيك إيه..

لكن المبلغ اللي معاك هزوده وهديلك أضعاف لما تسهل لنا

الأمور بعد كده.

أعدت جلستي إلى سابق عهدها وقد خفت من توعده لي،

أعلم حجمي جيدًا بالنسبة لرجل في مركزه وعلاقاته، لا بد أن

أفكر بعقل أكثر الآن حتى لا أخسر المصلحة أو أؤذي نفسي

وعائلي، عادت نبرة صوتي مرة أخرى مسكينة وقلت:

- أنا تحت أمرك يا بيه، أنا مقدرش أرفض لك طلب، لكن

برضه نفسي أسيب حاجة للعيال من بعدي.

- متخافش هتسب، وهتسب كثير.. ها.. إخلص قلت

إيه؟

- قلت لا إله إلا الله..

- محمد رسول الله.. يوم عيد ميلاد محمد ابنك تبدأ. على

بركة الله.

وكانت الكارثة.. دفعت ثمن جهلي أضعافاً في ذلك اليوم،
كانت «أم محمد» تنظف الغرف كعادتها كل أسبوع، وبدأت أزين
بهو الفيلا بعد أن استأذنت إبراهيم الخولي عبر الهاتف منعاً للقبيل
والقال فوافق دون مناقشة، رُبما كان مُشغلاً باستقبال ابنه «آدم»
وقد وُلد قبل أيام قليلة في الإمارات.

أصرت زوجتي أن نحتفل أثناء النهار ونهي الحفلة قبل أذان
المغرب، أعددت كل شيء وتخيلنا لبضع ساعات أننا أصحاب
الفيلا والأرض، كل هذا الترف، كان إحساساً لا يُوصف، لا
شك أن المال يعطي، صاحبه الكثير من القوة.

بعد انتهاء حفلة عيد الميلاد على خير قُبل المغرب، انصرف
الأولاد واحداً تلو الآخر، وعادت الحقيقة مرة أخرى فأخذت
أم محمد تنظف الفيلا وتعيد الأشياء إلى مكانها، وكأنها قد أفاقت
من الحلم، تمنيت بشدة لو أملك ما يجعلنا نرتاح في شيخوختنا،
قررت أن أنفذ وعدي الذي سوف يترتب عليه تغيير حياتي.

بعد أن تأكدت من مُغادرة الجميع وبعد صلاة العشاء.
أخذت أحد الكتب التي اشتريتها وأخذت أكتب طلسماً معروفًا

لرواد العالم السفلي لطرده الجن الحارس من البيت، وطلسمًا آخر لحرق الجن، أخذت أكتب على الحوائط كلها وأهتم بالأركان، وأثناء انشغالي دخلت علي زوجتي فاكتشفت أن باب الفيلا كان مفتوحًا، نهرتها لتخرج وقد لاح عليها القلق مما رآته، لكنني أخرجتها بإصرار وأخذت أكمل ما بدأتها، حوائط الفيلا كثيرة وهذا ما يقوله الكتاب، كتابة الطلسم على كل حوائط المكان في أركانه.

بعد قليل سمعت صوت زوجتي تقرع الباب في عنف وتنادي، لم أهتم، لكنني سمعت صوت محمد يصرخ بشدة، توقفت عما أكتبه في هلع، للحظات لم أعرف هل أجيب زوجتي أم أبحث عن ابني، كان باب الفيلا هو الأقرب ففتحته فرأيتها قلقة تسألني في ذعر:

- مشفتش محمد؟

في هذه اللحظة صرخ المسكين مرة أخرى يناديني، بات من الواضح أن الصوت يأتي من الدور العلوي، نظرنا إلى بعضنا في هلع وهرولنا إلى الدور العلوي، الغرف كلها مغلقة وصوت ابني المسكين يصرخ بلا توقف، أخذنا نفتح الغرف والحمام ففتحت لنجدها خاوية، إلا غرفة الضيوف لم تفتح أبدًا، كان صوتًا مخيفًا يتحدثني من خلف الباب وصغيري يصرخ في استغاثة:

- اللي بتعمله ده هيكلفك حياة ابنك.. إنت اللي اخترت.

هنا رأيت حجمي الحقيقي في الحياة، أردفت راجياً:

- أنا غلطان.. همسح كل اللي كتبتة، أو عدك.. حالاً همسحه

بس سيب ابني.. «محمد» ملوش ذنب.

صراخ الولد لم يتوقف ولم أتوقف عن الرجاء أو تتوقف

زوجتي عن النحيب، وفي إحدى محاولاتنا فُتح الباب لأرى ابني

البكري يوم ميلاده يحضر مُسكاً بصدرة ينظر إلي في استسلام

وأرى ثعباناً أبيض كبيراً واقفاً بجانبه ينظر إلي ثم يزحف نحو

الشرفة إلى الخارج.

أسرعنا إلى الصغير وهو يلفظ أنفاسه الأخيرة، تحتضنه أمه

وتتحب واعتصر قلبي ألماً شديداً، سامحني الله أو لعني بما فعلت

بك يا ابي، لم أنو إلا الخير لك، لم أكن أعلم أنه شر مستطير.

حاولنا كثيراً تخطي الألم لكنه لم يزُل، ضاع ابني مني وسيطر

علينا حزن كبير لم يخرجنا من بعضه إلا أيام جاء زوجتي

المخاض، وجاء مروان، كانت زوجتي كريمة معي بأن سامحتني،

مرت الأيام وأنجبنا توأمين بعد مروان وعشنا في هدوء لا تقرب

الفيلا ليلاً أبداً، فقط طليت الفيلا كلها على نفقتي بهذه النقود

الحرام التي أخذتها من عائلة السعدني، آملاً في رفاهية لم تكن إلا

ناراً تأكل قلبي كل ليلة.

(١٦)

«عبد الله»

يخافنا بنو الإنسان ولا يعرفون عنا أي شيء، نشأت بين
الجن المسلم المؤمن العابد، كُنَّا قبيلة كبيرة قوية ومؤمنة، تُساعد
الضعيف ونأمر بالمعروف بين الأجناس، دون الالتفات إلى
ديانتهم أو فقرهم كما يفعل أبناء آدم، تعارفنا بقليل من البشر
أمثالنا ممن يستخدمون قوتهم في الحق، يخافون الظلم والخصومة
يوم الدين، لأنهم أحبوا الله وكانت هذه هي الخطيئة الكبرى!
في يوم مشئوم كُنت أراقب أبي كعادي، كان يوماً مُختلفاً
بشكل يصعب وصفه، كان قلقاً يستعد لملاقاة العدو قبلها
بساعات، لكن غير مُقتنع يُناقش جدي في العدول عن الحرب،
في حين يرفض الأخير فيرضخ أبي لأوامره في نهاية الأمر على
مضض، يومها أحس بمراقبتي له فناداني دون مُداعبة كعادته:
- «عبد الله».. تعال عايزك..

- نعم..

- النهارده أنا واخواتك الكبار وجدك ويمكن القبيلة كلها

طالعين مهمة كبيرة، إنت عارف ده؟

- سمعت أمي بتحكي عن «الملكة زينب» من بني الإنس وطلبها من جدي مُساعدة، وإنها عايزة تروح معاكم، لكن مش فاهم الحرب دي ليه؟

- مش كل الجن صالح يا عبدالله، زي الإنس بالظبط، في منهم شياطين بتحارب الخير في كل مكان على الأرض، إحنا بنحارب الشر وبنأيد الخير، كل العيلة هتكون معانا بها فيهم أنا ووالدتك لأنها مُصرة.

سادت لحظات صمت وأنا أحاول أن أفهم ما السبب لكنه أردف:

- المهم مش عايزك تكون هنا ولا في مكان بنروحه ولا تكون بأرض المعركة، حاول تختفي في أي مكان بعيد.
- ليه ما أروحش مع اخواتي.. أنا مش صغير وأقدر أحارب؟

- اسمعني كويس ونفذ اللي هقولك.

- وانت هتروح فين وجددي واخواتي؟

- أنا بقول لو ما رجعتناش.. إن شاء الله ترجع.

رُبما أحس بالخديعة وأراد أن يحمي ابته الصغير، فقد كُنت طفلاً لا يقوى على مجابهة شيء، لم أنفذ نصف وصيته الأولى.

وذهبت وراءهم لأرى ماذا سيحدث وأطمئن عليهم، لم أكن أعلم معنى كلمة «حرب».. كما لم أدرك معنى كلمة «سلام»، وباليتني ما ذهبت.

جيوش وقبائل كثيرة قوية، تتقاتل مع بعضها البعض فقط تنفيذًا لأمر ملوكها، منهم من يقتل تلذذًا بالقتل، ومنتهم من يطيع دون فهم، والنتيجة كثير من القتلى، راقبت ما يحدث من بعيد إلى أن رأيت جدي يُلقى جثة لا تتحرك، وأبي وراءه، وقتها لم أدرك الوقت لكنه مر كالدهر فوق رأسي، ثم رأيت أبي يهوي من أعلى دابته ويسقط جثة، تلاقى أعيننا وأنا أصرخ دون فائدة، ثم رأيت أصابعه تتحرك وتأمرنى بالمغادرة قبل أن يحتضر مباشرة، هالتي ما رأيت وتأملت وجهه لآخر مرة دون وداع، نظرت إلى عينيه فرأيت الخير يموت لينتصر التُّبح في العالم، أهذا ما أردته؟ انتصر الظلم والكرهية والشر، ذهبت براءتي بغير رجعة، ثم نفذت النصف الثاني من وصيته، أعطيته ظهري وذهبت بكل ما أُوتيت من قوة دون إدراك، إرضاء لأبي وطاعة له، كُنت أنظر ورائي بين الحين والآخر فأرى قبيلتنا أوشكت على الفناء والأعداد في تناقص، فأدركت أن أمي وإخوتي وكل عائلتي قد فنوا أو على وشك الفناء.

وكنت أنا الصغير الباقي ألملم شتات أمري وأتحرك من

بين كل الموتى المخدوعين إلى مصيري المجهول، رحلت من أرضي غير راغب، فقد كنت أمل أن أعيش هناك لأخذ ثأر أبي وعائلي، لكنهم لن يتركوني، لم أفهم لماذا أوصاني قبل أن يذهب للحرب، لكنني فهمت بعد ذلك أنه كان يعلم أنه اليوم الأخير الذي سأراه فيه، أخذت عهداً على نفسي ألا أحيا على دينك لتتركني كما تركتهم، بل أحيا وأموت على دين ما أراه وما ألمسه، فلا أعترف بمعجزات ولا أو من إلا بما يحدث أمامي.

ثم كان اختلاطي بكثير من الإنس فشهدت غدرهم على مدار عمر طويل جداً، كثير من الشر، لا يوجد فرق بين شياطين الإنس أو الجن كما يزعم بنو آدم، يأخذون من وجودنا حُجة لفعل الشرور، لم أستوعب كل هذا التناقض، كيف لصديق أن يغدر بعد أمان؟ حروب وخيانة وسفك دماء وكثير من المكائد والشرور والأحقاد، دائماً ما أندesh من قسوة البشر بعضهم على بعض، وما كان لنا عليهم من سلطان، هذا ما يقوله الكتاب إن كانوا مؤمنين، نوسوس لهم فيتبعوننا، ثم يتفوقون علينا بألاعيهم.

لذلك يا بني أنت لا تُقدر خطر ما أنت مُقدم عليه، أخاف عليك من الدنيا مرة، وأخاف عليك من صداقة الإنس ألف مرة، فلم يُقتل جدي ووالدي وجميع أبنائه إلا بخيانة أصدقائه،

لم يجد أعداؤه السحرة من الجن له مدخلًا، فاتحدوا مع بعض أعدائه من الإنس لمساعدتهم على محو قبيلتنا بأكملها، ومع كوننا نفر كثير وقوي، لكن تمت المؤامرة بنجاح وقُضي الأمر، هكذا بمنتهى البساطة.

لهذا كله أقسمت على قلبي ألا يحب مخلوقًا، لكنه خانني وأحب «سارة»، لم أكذب عليها أبدًا، صارحتها، لم أجد منها مقاومة فكانت فرحتي بها كبيرة وعشرتي معها مريحة، نعم تزوجتها وهي تعتق الإسلام بالوراثة مثلي لكنها لم تكن مؤمنة! بل إنني سعيت في إقناعها بأن الدين ما هو إلا قصص مغلوبة لا فائدة منها، واعتقدت أنني نجحت حينها على نحو كبير، ماذا حدث لها لتتغير هكذا؟ نعم رأيتها وهي تستمع إلى القرآن ونهرتها، راقبتها وعلمت أنها تتردد على بيوت العبادة، ثم رأيتها تتلو القرآن كل ليلة سرًا، كنت منشغلًا بأعمال أخرى وقتها، لكنني لم أتخيل أن يؤثر فيها هكذا، لماذا تركتني وحدي في منتصف الطريق؟

الآن تأخذها مني بإيمانها، الآن تكفر هي بالحقيقة وتجري وراء سراب كما فعلت قبيلتي، خدعها الإيوان كما خدعهم، الآن يقف ابني الوحيد في وجهي مُدافعًا عن إنسي! ألا يكفي ما أخذ مني؟ ألم تُغن عائلتي كاملة عن أخذ زوجتي وابني؟

نعم لم أنس ما حدث وأنا طفل أناجي الله، أتضرع لينقذ
عشيرتي، لم أكن أبالي بالحياة أو بالممات، كُنت أريدهم أحياء
بجانبي، ماذا فعلت عائلتي لتُباد بأكملها، ألم يطيعوا أوامر الله؟
ألم يوحدهم ويقدموه؟ ألم يتوكلوا عليه حق الاتكال؟ بل إنهم
سعوا في كثير من الخير ابتغاء وجهه! فما الذي حدث لهم في
النهاية؟ واحد تلو الآخر مات أمام عيني وأنا بين كل ميت أنظر
إلى السماء وأدعو بكل الخير وباسم العائلة التي وهبت حياتها بأن
تنجي ما تبقى وأن تكتفي بمن أخذته، كانت إبادة جماعية تحت
سواء الله.

لكنني ومع كل ما لاقيته بحثت في الأرض فلم أجد إلا
المخاييل والدرأوش والضعفاء يؤمنون به وبمعجزاته، مع
ذلك بحثت عن العدل في الأرض كل يوم فلم أجد ما يشفي
غليلي، بحثت لعلني أستعيد نظرة اليقين في عيون جدي وأبي
وهما يحكيان عن حلاوة الإيمان، لكنني رأيت الأقوياء يذلون
المُستضعفين، رأيت الظلم والجهل والفقر والمرض والحروب
وقد اختفى الخير على مر العصور، تساءلت إذا كانت كل رُسلك
قد دعت للخير فلماذا خلقت الشرور من الأساس؟

حتى تعبت من كل الأسئلة ولم أعد أبالي بما يحدث خارج
جدران الأربعة، لم أعد أبالي إلا بزوجتي وابني، فهما كل ما تبقى

لي، لكنك تأخذهما الآن رغماً عني إلى دائرة الوهم، إلى السراب الذي يحسبونه نوراً، هل تنتقم مني من أجل بقائي حياً؟ هل كنت تتوي أخذي أيضاً؟ هل كنا نعيش وأجدادنا وهما كبيراً اسمه الإيهان؟

لكنني لن أقف مكتوف الأيدي، لن أقف صامتاً، لن يأخذها شيء مني، سوف أتحوّل إلى كرة من النار تأكل كل ما يقابلها دونهم.

أما محمد، هذا الطفل الإنسي الذي صرّعته دون قصد، فأنا غير آسف عليه، ولا أحمل في ضميري شفقة ولا تأنيب ضمير له أو لعائلته الفقيرة، خيانة والده كانت السبب، والد هذا الخفير قد ورث مهنته عن والده الذي كان يعلم بسكني في البيت، والحق لم يضايقني يوماً أو يتجرأ علي، لم يكن ليتدخل في أموري الخاصة، أو يطلب مني طلباً، وهكذا عاش كل منا في سلام من الأذى، لكن ابنه «أبو محمد» ملأ الجشع نفسه، يبيع كل شيء من أجل المال، لا يعلم أن المال لن يرحمه مني إذا ما اقترب للأذى أو حتى المضايقة، كان في منتهى الغباء عندما حاول مساعدة عائلة السعدني في الحصول على التعويذة المدفونة في القبو وإخراجي منه، ألا يعلم أنني مُسخر لحراسته؟

قاده غباؤه إلى إزعاجي بكتابة تلك الطلاسم على جدران

البيت، وهو يعلم بوجودي علم اليقين وقد أوصاه والده بي خيرًا
 فلم يفعل. حذرتة حين أقدم على كتابتها في بلاهة، تحدثت بصراحة
 في أذنه «لو كملت هأذيك».. رددت الجملة أكثر من مرة، كان
 يتلفت حوله ويسرع ليكمل ما بدأه، استمر في كتابته وقراءة هذه
 الطلاسم التي كان من الممكن أن تقضي علي ليلتها، كان لا بد أن
 أدفع الضرر عن نفسي، كان ابنه يلهو في غرفتي بالدور العلوي،
 فرأيت أنه مصدر إلهاء وانتقام، ظهرت له في هيئة ثعبان يتلوى،
 فقط كي أخوليس إلا، لكنني توجعت وصرخت أمامه إثر عمل
 الطلاسم التي كاد أبوه ينتهي منها بالأسفل، انتفض الفتى من
 مكانه وقد رمى ما يلعب به، فظهرت له صورتي الحقيقية رغماً
 عني فارتدى على الأرض من شدة الفزع، صرخ حتى توقف قلبه
 فجأة ولم أمسسه قط، كان أمرًا قاسيًا لكنني تناسيت الأمر كله
 كأنه لم يحدث.. لم تكن نيتي الأذى ولا خطيئتي كتابة الطلاسم،
 بل والده، فليدفع هو ثمن نجاسته. أما أنا فلن أندم أبدًا على ما
 حدث يومها.. ما يشغلني حاليًا هو كيف أبعد ولدي «نوح» عن
 ذلك الإنسي «آدم»..

(١٧)

«سورة»

وقفت أستمع إلى صوت «عبد الله» يصرخ كالمجنون كمن يتحدث إلى أحد في الغرفة وكنت أعلم أنه وحيد، جن جنونه بانغماسي في الدين ودفاع ابننا نوح عن آدم وعن إيمانه، لا أدري ماذا أفعل، كنت دائماً شديدة الانسياق له، أطيع أو امره دون مجادلة أو تفكير، أحببته أكثر من عشيرتي، بل أحببته أكثر من نفسي، ولأنني ما زلت أحبه فإني أخشى عليه غضب الجبار، أخاف عليه نار جهنم، فهو بغضبه قد نسي رحمة الرحمن ونعمه التي لا تُعد ولا تحصى، وأنا أو من أن تأخير عقاب إلحاده لسبب؛ إما ليكثر من أخطائه فيُخلد في النار، وإما لموعظة أو حكمة لا أعلمها.

في زمان سحيق تورط جد «عبدالله» الأكبر في حرب بدأت كأنها قبلية، وكانت مكيدة من أعدائه وأعداء الدين، اتحدوا عليه وتمكنوا من إيقاعه، ودفع ثمن شهامته وشجاعته من حياته وحياة عائلته كلها، وأولهم «مُختار» والد «عبدالله»، إلا من نجا بنفسه وهرب وكانوا نفرًا قليلاً، كان «عبدالله» صغيراً فلم ينسَ مشاهد القتل والحرق والذبح لقبيلته، فلم يأتمن بعدها أصابع

يديه، وكان هذا سبباً في إحصاه، كان واثقاً أن الله سينجيهم
وسينتصرهم، سينتصر الحق على الباطل كما كان يعلمه والده،
ربما يموت البعض منهم في سبيل النصر، لكنه لم يتخيل أن تُقتل
عائلته بأكملها، حينها بكى وردد كثيراً: «لقد خذلني الله»، ولم
يذكره من بعدها مرة أخرى، ثم ترك أرض الشام كلها وجاء
إلى مصر واستقر في باسوس ولم يزر موطنه مرة ثانية إلى يومنا
هذا، هذا ما قصه علي دون تفاصيل، لكنني أوّمن أنه سيرجع
يوماً ما إلى طريق الله، طريق أجداده وأبيه، فالأصل دائماً فياض
على ذريته وأثره موجود. حاولت كثيراً معه ولم أقاوم غضبه، بل
كنت سأنساق إلى طريقه بدلاً من أن أجلبه إلى الطريق الصحيح.
الآن لا أستطيع أن أسمع ما يقوله.. أشفق عليه أشد الشفقة،
مع ذلك. حان الوقت لمناقشته مهما كلفني الأمر، مهما تطلب من
جراحة لأفهم أمانه للمرة الأولى في حياتي وأعرض، لأستقبل
ريحاً من الغضب تكفي لصرعي، لكنني على أتم الاستعداد
لذلك من أجله، فمن أجل إنقاذه أفعل أي شيء وسوف أفعل..
كن معي يا لطيف.

استجمعت قواي، أغمضت عيني قليلاً واستحضرت
عظمة الله في قلبي، توكلت عليه وذهبت إليه.. كان واقفا امام
نافذة الغرفة يتأمل ما وراءها وفيه بات واضحاً أن غضبه قد خمد

كثيراً، وقفت وراءه لثوان معدودة فأحس بوجودي وتحديث
بنبرة مُريية:

- عايزة إيه؟

- عايزة أتكلم معاك.

- مش عايز أتكلم في حاجة.

أردفت في صوت مرتعش:

- الأحسن إننا نتكلم.. لازم أقول اللي كان لازم أقوله من

وقت ما اتجوزنا..

لم يرد.. لكنني أحسست أن هذا الوضع هو الأفضل لأتحدث
بحرية دون أن أخشاه فأترجع عن بعض مما بداخلي، فلعبد الله
هيبة تجعل كل من يقف أمامه يرتجف، جف حلقي وانعقد لساني
لكنني تذكرت الله في قلبي واستقويت به:

- أنا عارفة إنك ناغم على الخائق، إنت نسيت كل حاجة يا

عبدالله، نسيت أصلك ونسيت نعم ربنا عليك.

ضحك عبدالله ضحكة عالية تنم عن غيظ وغلظة في قلبه

لكنني استرسلت في شجاعة:

- إنت وأنا والإنس وكل المخلوقات مجرد مخلوقات

في الكون، مهما بلغت قوتنا فهي ضعيفة، قوتنا مُستمدة منه

وبإرادته، ولو شاء سلبها منا برضه.

- آه طبعًا.. ما هو إحنا لعبة.

- ربنا قال: ﴿وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ﴾ (١).

العبادة لمصلحتنا وهو الغني عنها، العبادة مش شعائر بنعملها ونخلص منها ونقول خلاص إحنا عملنا اللي علينا، العبادة يقين بجمال الله، يقين إن كل اللي بيحصل لنا بدون إرادة خير وأحسن حال ممكن نكون عليه.

التفت إلي «عبدالله» وقد لاح على وجهه كثير من السخرية وقال:

- أحسن حال إني أعيش يتيم يربيني بني آدم وأهلي كلهم

يموتوا؟ حظي بس إنه كان كويس مش زي اللي بشوفهم، هو ده

أحسن حال بالنسبة لك؟

- كان ممكن تعيش بين أهلك وأنتم أسرى لشياطين ما

تعرفش ربنا، ما تعرفش الرحمة، ساعتها أهلك كانوا هيموتوا في

اليوم ألف مرة من الذل، لكن أهلك ماتوا يعزة وكرامة، ماتوا في

سبيل الله وتيتهم خير، مُتخيل أجرهم عند ربنا إيه؟ إحنا مكلفين

يا عبدالله، ربنا خلقنا كلنا أحرار وهنتحاسب عملنا بالحرية إيه،

وكل واحد هياخد ثواب وعقاب على قد عمله، ليه مشفتش رحمة

ربنا في إنك ما اتقتلتش؟ ليه ما شفتش رحمة ربنا في إنك لقيت

مأوى؟ إنت مش شايف كثير من قبائل الجن حوالينا عايشين

(١) [الذاريات: ٥٦].

إزاي؟ ليه مشفتش نعمة ربنا في قوتك؟ إننا اتجوزنا وعندنا ابن؟
ليه مفكرتش لحظة إنه نجاك علشان تنتقم ليهم وتكمل مسيرتهم
في الحق، علشان ترفع ذكراهم، إنت بنفسك قلتلي إنك لما كبرت
فهمت إنك كان ممكن جداً تبقى أسير طول عمرك عندهم، إنت
اللي خذلت أهلك يا عبدالله مش ربنا.

نظر إلي نظرة غضب لم أرها منه طيلة حياتي، مرت لحظات
صمت وكنت أرتجف من الداخل أمامه، فاستعنت بالله وأكملت:
- أهلك ماتوا في وقت أجلهم، كله مُقدر ومكتوب، إحنا لا
نملك تأخير أو تعجيل في الموت.

- وقري كل كلامك ده يا سارة، أنا مبعثش مُعترف باللي بتقوله
ده، إيه معنى «وما تشاءون إلا أن يشاء الله»؟ كفاية أو هام بقي.

- الحرية اللي بقصدها لا تعلقو على المشيئة الإلهية، ربنا اذانا
الحرية في إننا نكون أختيار أو أشرار، نئذي أو نمنع الأذى، دي
حرية نسبية مش حرية مطلقة، إحنا في الآخر مخلوقات، ومع ذلك
بنسمع عن الرسل الأولياء وأصحاب الكرامات اللي بتتكشف
لهم حاجات ميعرفهاش جن ولا إنس، دي حرية اكتسبوها
بالتقرب والاجتهاد فأكرمهم من علمه، إنت ناسي إن أجدادنا
كانوا مُسخرين؟ إنت في الآخر بترتاح للعمل الطيب وقلبك
بيتطمئن، أو بتشعر بالندم بعد أي عمل غلط، الفطرة بتوجهك

وكل يوم في حياتنا بنقف قدام اختيارات، واحتمالات ومقارنات
وإحنا في الآخر بنختار، دي حرية، كان ربنا قادر يجبرنا كلنا جن
وإنس على طاعته..

ابتسم «عبدالله» في سخرية وقال في ثقة:

- اقعدني يا سارة وحاولي تقنعيني. مش عارف إزاي سايبك

تهذي كل ده!

جلست وقد زفرت نفسًا عميقًا وأحسست أن خوفي بدأ في

الزوال وأكملت:

- القضاء والقدر، ربنا سبحانه وتعالى بيقضي ويبقدر على

المخلوق من جنس نيته، ويشاء له من جنس مشيئته، ويُرِيدُ له

من جنس إرادته، مفيش تناقض خالص.

- يعني إيه الكلام ده؟

- البني آدمين شاغلين نفسهم بحكاية إحنا مسيرين ولا مخيرين؟

- فعلاً لكن مكتش بهتم أعرف.

- كلنا مسيرين ومخيرين في نفس الوقت، ببساطة كده تسيير

الله في تخيير العبد، يعني ربنا بيسيرنا على حسب هوأنا ونيتنا إحنا

وقال في كتابه: ﴿مَنْ كَانَ يُرِيدُ حَرْثَ الْآخِرَةِ نَزِدْ لَهُ فِي حَرْثِهِ وَمَنْ

كَانَ يُرِيدُ حَرْثَ الدُّنْيَا نُؤْتِهِ مِنْهَا وَمَا لَهُ فِي الْآخِرَةِ مِنْ نَصِيبٍ﴾^(١).

(١) [الشورى: ٢٠].

- عمرك سألتني نفسك يا سارة ليه ربنا خلق الشر والمرض
والفقر والحروب؟ ليه سايبهم وسايبنا جن وإنس نعاني منهم؟
- حاجات كثير سألت نفسي عنها، وده اللي خلاني أدور
وأفهم أو أحاول ع الأقل، سلوك المخلوقات ممكن يكرِّهك في
الحياة وفي العبادة، لكن لو عرفت إن الشر والمرض والحروب
موجودين علشان إحنا على الأرض مش في الجنة، والأرض دار
اختبار وجهاد، اللي يفوز هيرتاح، ولو كان ربنا خلق الأرض
جنة فايه لزوم الاختبار؟ الثواب والعقاب والجنة والنار؟ وليه
جت رُسل كثير قبل كده؟

توقفت عن الكلام وأحسست أن «عبدالله» بدأ يستمع إلي
للمرة الأولى فقلت أخيراً:

- إحنا محتاجين نراجع نفسنا في حاجات كثير يا عبدالله،
عبادة ربنا وصلتنا بيه لمصلحتنا إحنا، ربنا غني عن العالمين،
وشوف رحمته مع عصيانك، شوف إزاي بيمهلك الوقت
للرجوع، لكن متنساش ربنا يُمهّل ولا يُهمل، أنا بحبك وأحب
لك الخير وأحب أشوفك على طريقه، أرجوك فكر في كل اللي
قُلناه وعيد نظر تاني.

(١٨)

«نوح»

هذه الليلة لم تُمَحَّ من ذاكرتي، كان هذا منذ سنوات بعيدة، كان آدم وحسن ما زالا صغيرين يلعبان الكرة ليلاً في الحديقة، صوت الكرة وضحكاتها العالية بعد مُتَصفِ الليل جعلنا النوم أمراً مُستحيلاً، وتذكرت أن أبي سبق أن زهرني بشدة عندما أردت اللعب معها في إحدى المرات، لم أفهم خوفه الكبير علي ومنعي من الاختلاط بأي إنسي.

غلبني الفضول، انتظرت حتى غفا أبي وأمي، ثم نزلت لألعب معها، كانا مُستمتعين بالمنافسة في ضرب الكرة على الشجرة العجوز بالحديقة، وقفت أمامها وابتسمت لكنها لم يباليا بي، أخذت أقرب منها للمرة الأولى في حياتي وأنظر إليها، لكنها لم يرياني فتملكني الفضول أكثر، كانا يقفان بجانب بعضهما والشجرة الضخمة أمامهما مباشرة، أخذ آدم يضرب الكرة على الشجرة فترتد إليه فيأخذها حسن ويضربها، واستمر تبادل الأدوار بينهما إلى أن سئمت، فقررت أن أشاركهما، ووقفت

أمامها بجانب الشجرة، ضرب حسن الكرة فأخذتها بفرحة، لكنه لم يفرح مثلي! وقف مُندهشًا ينظر إلى آدم، أخذت أنادي عليهما وأريهما الكرة لكنهما لم يتبها على الإطلاق، وكأنني.. فراغ! لم أجد في الدنيا شيئًا أكثر إبلاقًا من هذا الشعور، أنا غير مرئي.. أنا لا شيء.. كأنني عدم!

أخذت أراقبهما في ذهول أيضًا وأنا لا أعرف لماذا يتجاهلانني، كان حسن يبحث عن الكرة في حين دخل آدم القِلا مُسرِّعًا، وقفت أمام حسن ووضعت الكرة أمام عينيه لكنه ظل يبحث عنها في الأرض! جاء آدم حاملاً مصباحًا بيده ليُنير لحسن أثناء البحث، وقفت أمام آدم ورميت الكرة أمامه، ارتعبا عندما رأياها مرة ثانية بعيدًا عن الشجرة وفي الاتجاه المعاكس، لكنهما لم يرياها أيضًا وقرأ هارين من الحديقة!

هنا فقط أدركت أنني ولا بد مُختلف، جلست في الحديقة وحيدًا حزينًا على اختلافي، أردت فقط أن ألعب معها، لكن لم أفهم شيئًا، ثم فكرت في أننا نعيش معًا مع آدم وأبيه وأمه في نفس القِلا منذ زمن، ومع ذلك أثناء زيارتهم السنوية لا نختلط أبدًا، كما أنهم لا يلقون التحية علينا أو على خدمنا، ويتجاهلون أقاربنا وضيوفنا الواردين، وأنا أيضًا لا نبالي بهم ولا بخدمهم ولا بضيوفهم، تذكرت تسيهات أبي المستمرة بالأناختلط بهم أبدًا،

لكنتي لم أدرك لماذا.. كنت أحسبهم يروننا ولا يهتمون، لكنتي ليلتها اكتشفت أنهم لا يستطيعون رؤيتنا ليلاً أو نهاراً! لكنتي لم أخف منهم يوماً كما يفعل أبي، بدوالي مُسلمين لا يحبون الأذى. لم أستطع النوم ليلتها، بقيت حتى أدركت الصباح فصارحت أمي بما حدث وسألتها: من أنا؟ ووقتها فقط علمت أننا من عالمين مُختلفين، قالت: هم من صلصال، وأنا من مارج من نار، أنت جسد وأنا طيف، أنت إنس وأنا جن، تكويننا مُختلف، القوانين مُختلفة، وإن تشابهت التقاليد، نتشابه في أمور كثيرة، أهمها الدين والتكليف، وعلمت أن جميعنا جنٌّ وإنسا مكلفون ومسئولون أمام الله وأننا لم نُخلق إلا للعبادة، وأن عصرنا لا يُقاس بحسابات الدنيا الزائلة، فعزمت على معرفة الشيء الكبير والمهم المشترك بيننا في الحياة بشكل أعمق، ولحسن حظي كانت أمي أيضاً تتعلم أصول الدين وتحفزني لتعلمها، لم تكن تعلم أي أنتوي هذا أيضاً.

أحببت طيبة آدم فقررت أن آخذ بيده إلى طريق الله معي فتفاضيت عن الاختلاف وركزت على التشابه.

لكن كيف ألتقي بآدم دون أن يخاف مني؟ ظللت أفكر وأدرس وأحسب كل شيء، فوجدت أن الصدفة هي أحسن اختيار لي وله، سرقت السيجارة المُتبقية معه لتكون منفذاً لي،

شيء أستطيع أن أستخدمه في التعارف حتى وإن كان لدقائق، أردت أن أظهر له وأخوض خبيرة التعارف إلى بني آدم كما فعل أجدادي لأبي، لكنني لم أنتو الظهور في هذا اليوم الذي رأي فيه في الحديقة حيث كنت أتمشى وأتفقد أحوالها، بل إنه بدأ بالتعارف ووفر عليّ عناء البداية، التي لم أكن لأتحيل أن تمر بهذه البساطة. وبالرغم من أنني لم أعلمه إلا الخير أو أؤذنه قط، إلا أنني أراه خائفًا مني حد الموت بعد أن علم حقيقتي، الجهلاء حوله يظنون أن القرآن الكريم سوف يحرقني! كيف وأنا جن مسلم؟ أصلي وأصوم وأذكر الله مثلهم! بعد تفكير قررت أن أتعامل معه بطبيعتي، فقد كشفت كل الحقائق، أتمنى أن يطمئن قلبه ولا يضطرب، فأنا ما زلت أنا.. نوح، أنا الصديق الذي يجب صديقه، حاولت أن أفكر بعقله لأستوعب لماذا يخاف مني بهذا الشكل! وتفهمت كل ما يدور بعقله وكل القصص المخيفة عنا على مر الأزمنة، وكيف أننا نراهم من حيث لا يروننا، له كل الحق فهو لن يُميز الجن المسلم من الشيطان في هذه السن الصغيرة مع ضعف علمه، بقي أن أثبت له عكس ذلك، حتى وإن لم نعد أصدقاء بعد ذلك، فقط أريد أن أثبت أن منا الصالحين ومنا دون ذلك.

كان آدم جالسًا على سريرته وحيدًا في الغرفة، بدأ وجهه

شاحبًا، عيناه زائغتان ينظر في الغرفة كلها، يتبه كل دقائق إلى الأركان ويُدقق فيها، صوت القرآن ينبعث بقوة من الخارج، فكرت كيف أظهر له كثيرًا لكنني لم أهدِ إلى حيلة كسابق عهدنا، قررت أن أظهر وحسب، إنها طبيعتي التي لا أنكرها واختلافنا الذي أتقبله.

كانت المواجهة ضرورية، انتظرت عندما نظر إلى الأرض وأطال قليلاً وهو يفكر، فوقفت عند الباب المغلق، لحنني بطرف عينيه وكأنه تردد أن ينظر لكنه فعل، ارتعشت أصابعه وهو ينظر إلي، ساد الصمت بيننا وظل ينظر إلي بمشاعر مضطربة، نظرات يختلط فيها الخوف مع الحب وكثير من الأسئلة، ابتسمت وقلت:

- السلام عليكم ورحمة الله وبركاته.

تسمر آدم في مكانه ولم يتحرك حركة واحدة لكنه ظل هكذا يتأملني بوجه عجيب فأردفت:

- أنا عارف إنه موقف صعب عليك، بس صدقني أنا لسه نوح صاحبك، نوح اللي عمره ما آذاك أو فكر يتذكرك، نوح اللي كان يقولك على دروس الدين اللي اتعلمها من أمه، نوح اللي خلاك تصلي.. أنا بفكرك أنا مين قبل أنا جنسي إيه علشان تظمن، أنا مش قصدي أخوفك ولا في نيتي ولا أقدر أأذك.

اختلفت نظرات آدم قليلاً وكأنه قد نسي خوفه للحظات

وتذكرني، لكن أطرافه مازالت متصلبة فأردفت وأنا أخاف أن
ينفذ صبره:

- هل تفضل ساكت كده؟ مش فاهم؟ اتكلم يا آدم علشان
متخافش..

أخذ ينظر إلي بتمعن دون حديث، فسرت إلى كرسي المكتب
وجلست، فانتفض آدم والتصق بالحائط وراه في جلسته.. ظل
ينظر إلي تارة في خوف وتارة كصديق وأخيراً سمعت صوته
خائفاً متردداً:

- هو أنا كده ملبوس خلاص؟ أنا قعدت معاك واتكلمت
معاك كثير.. سلام قولاً من رب رحيم.

- ملبوس إيه يا ابني؟ لما ممكن أروح أي حته في العالم في
ثواني أحجم نفسي ليه في جسمك؟ اهدا كده يا آدم.. أنا نوح
صاحبك.. فاكرني؟

- أنا لما اتعرفت بنوح كان على أساس إنه إنس مش بسم الله
الرحمن الرحيم جن.

- جن مسلم.. مسلم يا آدم.

قال بنبرة مرتعشة:

- ودي تفرق إيه بقى ما في الآخر جن؟

ابتسمت وقد تفهمت مشاعره وقُلْتُ:

- المسلم لا يؤذي مخلوقاً، يعني لا بأذى إنس ولا جن ولا حيوان ولا أي حاجة خلقها ربنا، بنعمل بأخلاق وتعاليم الإسلام.. فاهم؟

بدأت نظرات الشك تختلف لكنني لم أجد قراءة عينيه هذه المرة فواصلت ما أريد قوله:

- طيب شوف.. علشان تطمن أنا اللي بقوله مش كلام، أنا أثبتتهولك بالفعل من غير ما تعرف.

- إمتي؟

- آخر يوم لما كنت طالع فوق وأنقذتك على آخر لحظة، مكانش حد ميرحك من «عبدالله».. اتسعت عيناه عن آخرهما وسأل في خوف:
- عبدالله مين؟

- عبدالله ده أبويا، اللي كان بيكلمك من الحيطه وبيرميك من فوق السرير، لكن أمي وقفت له يوم ما ظهر لك في نفس اليوم إنت وحسن، يعني أمي كمان أنقذتك..
- طيب وهو عايز مني إيه؟

- هو مش بيحب النبي آدمين ومش بيأمن لهم، هو بس خايف عليا منك..

- خايف عليك مني أنا إزاي؟

- دي حكاية طويلة هحكيتها لك بعدين.
- ثانية واحدة... إنت قلت إن هو اللي كان بيخوفني
ويعمل فيا كل ده؟
- أيوه.. للأسف هو.
- نظر آدم إلى الغرفة في ذعر وقال:
- ده انتو عيلة بقى وساكنين الفيلا؟
- طبعًا.. من قبل ما انت تيجي الدنيا. من زمان قوي.
- وإيه اللي يضمن لي إنك متدينش؟
- أنا لو عايز أذكك كان سهل جدًا من زمان، لكن العكس
هو اللي حصل.
- ظل آدم ينظر إليّ في بلاهة لم أعهد لها فيه فأردفت:
- إنت قرأت القرآن زي ما قلتك يا آدم؟
- والله أنا هتجنن.. أيوه قرئت..
- من غير جنان ولا حاجة، عارف طبعًا إن ربنا سخر الجن
لسيدنا سليمان..
- عارف.
- لما الهدهد حكى لسيدنا سليمان على ملكة سبأ وقال للملأ
مين يجيبلي عرشها تفتكر مين اللي رد عليه؟ اتنين ولا واحد؟
- اتنين.. ليه؟

- الأول «قال عفريت من الجن أنا آتيك به قبل أن تقوم من مقامك وإني عليه لقوى أمين»، والثاني «قال الذي عنده علم من الكتاب أنا آتيك به قبل أن يرتد إليك طرفك...» عارف يعني إيه؟ كان آدم قد هدأ إلى حد كبير ورأيته كسابق عهده معي، نظر إلي في حيرة وسألني:

- عارف تفسير الآية بس مش فاهم انت عايز تقول إيه.
 - عايز أقول إن ربنا محددش هل اللي عنده علم من الكتاب ده جن ولا إنس علشان يبين لنا إن التفضيل مش بجنسك لكن بالعلم والاتباع، ميزان التفضيل عند ربنا مش بالجنس، ربنا قال: «إن أكرمكم عند الله أتقاكم» وأخفى جنس المخلوق علشان يقولك إنك تقدر توصل للدرجة دي، لأننا مكلفين زيكم تمام، زي ما ربنا قال: «وما خلقت الجن والإنس إلا ليعبدون».
 نظر إلي آدم وقد فارق الحائط ظهره وارتاح في جلسته وقد بدأ يآتمني قليلاً ثم قال:

- أنا أول مرة أستوعب الكلام ده، ولما انتو كويسين كده ياباك عايز يتذيني ليه؟

- علشان هو.. للأسف، ألد من زمان، لكن أنا وأمي مسلمين، ادعيله يا آدم.

رأيت الشفقة والخوف معاً في عينيه وسألني وكأنه يكتشفني

من جديد:

- مين أقوى إحنا ولا أنتم؟

ضحكت وقد انتابني شعور أنه ينوي أذيتي، لكن لن يستطيع

فأنا مع الله رب العالمين، طال سكوتي فارتاب آدم وسألني:

- مبردش ليه؟

- الإنسان أضعف مخلوق على الأرض، ناموسة تقرصك

متعرفش تنام، عقرب يلدغك تموت فيها.. ميكروب ممكن يقلب

حياتك، أبويا لما ظهر لك كان قلبك هيقف، حاجات كثيرة جداً

تؤلمه نفسياً وتجيّب له المرض، الحاجة الوحيدة اللي رينا قواكم

بيها هي العقل، أنتم أقوى من كل المخلوقات بحاجتين: بعقلكم

وقربكم من الخالق.

- بس احنا بنستعيد بالله من الشيطان الرجيم.. مش فاهم

إزاي في منكم ناس... قصدي جن كويس.

- إحنا كمان بنستعيد بالله من الشيطان الرجيم، أصل خلقنا

إننا «جن».. اللي يعصى ربنا ويخرج عن منهجه يبقى شيطان

ويخرج مننا.. ده الموضوع ببساطة، وفي كتاب الله آية في سورة

الجن بتقول: ﴿وَأَنَا مِنَّا الْمُسْلِمُونَ وَمِنَّا الْقَاسِطُونَ فَمَنْ أَسْلَمَ

فَأُولَئِكَ نَحْرَوْا رُشْدًا﴾^(١).

(١) [الجن: ١٤].

- أنا حاسس إني بحلم حلم غريب، مش عارف أنا
المفروض أتعامل معاك ولا أبعد عنك.

- اسع في الخير في حياتك، حاول تفهم أهلك حقيقة الصلة
بالله وقد إيه حلاوتها، هو ده اللي عايزك تعمله، أمي بتحاول
تعمل ده مع أبويا دلوقتي.

عاد الذعر على وجه آدم وبدأ ينظر في كل الاتجاهات ثم نظر
إلي وسألني:

- أبوك؟ هو لسه هنا؟

- أبوه لسه هنا.. هيروح فين؟ ده سكنه، ادعيله بس رينا
يهديه.

- سكنه!! طيب وهيتديني؟

- أنا أوعدك إن مفيش أي أذى ممكن يحصل أنا وأمي
بنحميك يا آدم.

بدا على آدم أنه يستوعب ما أقول، عادت ملاحظه طبيعية مرة
أخرى وقال:

- أنا هصدقك.. بس عندي شوية أسئلة.

- أسأل.

- إنت بتعمل معايا كده ليه؟

كنت أتوقع سؤاله وأنتظره فأجبت:

- أنا بحبك في الله حب غير مشروط بغض النظر عن الاختلاف، مش عايز منك حاجة، الحب فطرة كل مخلوق في الدنيا، أنا بحبك زي ما انت بكل عيوبك، بكل ضعفك وألمك وغلطك، بإخلاص يخليك تقبل اللي قدامك زي ما هو كده على طبيعته، تتقبله وما تحاولش تغيره غير للأحسن لو يناسب تركيبته، لو جربنا هتختني الصراعات وتنتهي الحروب من العالم، لكن إحنا في الأرض وللأسف الشر هيفضل موجود لكن رحمة ربنا إن الخير كمان موجود ليوم الدين.

- كلامك غريب وأول مرة أسمعاه وفي نفس الوقت صعب.

ابتسمت في هدوء وساد الصمت فسألني آدم:

- مين اللي علمك كل ده يا نوح؟

شردت وتذكرت وجه أمي الحبيبة التي علمتني أن الحب هو سر اكتمال الحياة وبقائها، وزواله هو سبب دمارها، لولا الحب لما صبرت أمي على أبي كل هذه السنوات، وترجمت حبه لي بأن علمتني حب الخشوع في الصلاة.. الاستماع إلى القرآن.. الحكمة في قصص السابقين. مواجهة فتن الدنيا، جعلتني أفكر إلى أين نسير؟ وكيف تتولى أفعالنا في الدنيا تحديد نهايتنا؟ أشياء كثيرة تعلمتها منها، أشياء أراحت سريري، حينها اطمأنت لحب الله في قلبي، بعدها شعرت بحبي لكل مخلوق في الكون، أردف «آدم»:

- إنت مر حان كده في إيه؟

- أمي.. هي صاحبة الفضل عليا في كل حاجة وهي اللي

كانت بتديني دروس دين كل يوم من صغري.

- طيب سؤال برضه إنت تعرفني من إمتي؟

- من وانت صغير لكن مكشش يتفع أكلمك أو أقرب لك

علشان هتخاف مني زي ما انت عامل دلوقتي كده.. وكمان ما

كتش عارف أظهر لك ازاي بهييتي.

أخيرًا ابتسم آدم فضحكت وضحك معي ثم سألني وكأنه

قد تذكر شيئًا:

- إنت اللي خوفتنا أنا وحسن لما كُنا بنلعب بلای ستیشن؟

حاولت أن أتذكر ثم صحت في مرج:

- لا ده كان قريبي، إنتو على طول عاملين دوشة، وهو كان

عاجبه قوي البلاي ستیشن وتفسه يلعب معاكم، هو مكشش

قصده يخوفكم، كل الموضوع كان عايز يتفرج، لكن ظهر

للحظات بدون ما يقصد.

- بس ده شكله غيرك.

- ما الجين أشكال كثير.. مش لازم كلنا نبقى شكل واحد،

هل البني آدمين كلهم شكل واحد؟

- اعمممم... طيب ناوي تعمل إيه؟

- مش عارف بصراحة، كان نفسي أروح مكة والمدينة زي جدي وأمي وأتعلم أكثر، لكن أعتقد دلوقتي أهم حاجة عندي أبويا، نفسي يرجع لطريق ربنا تاني. هو بدأ يقرب من فترة خصوصًا بعد محاولات أمي. لكني خايف الموضوع ممكن ياخذ وقت. كمان هو كان بعيد كثير عن طريق ربنا طول عمره.

- وانت بتكلم ساعات بنسى إنك جن.. لما بفتكر بخاف.

- أنا فاهم يا آدم.. لو كنت مكانك كنت هعمل كده، عمومًا

أنا مش هزورك كثير لكن هبقى أتابع أخبارك.

نظر إلي في حزن، أعلم أنه صادق في مشاعره، ابتسمت وقد

علم أنه اللقاء الأخير فأردفت في صوت منخوق:

- أوصيك بالصبر على الدنيا يا آدم وإدامة الصلة بالله لتنجو

منها.

لم يستطع آدم أن يخفي مشاعر الخوف والقلق داخله، لكنه

كان خائفًا من لمسي ولم أحزن لذلك، عندما فتح عينيه لم يجدني في

الغرفة..

...

(١٩)

«آدم»

أواخر صيف ١٩٩٩ م.

استيقظت بعد نوم مُطمئن عميق لم أعهده منذ فترة، نظرت إلى الدماء المعلقة في السقف فابتسمت وقد اعتدتها ولم أعد أبالي، تذكرت ملامح «حسن» منذ أيام وأنا أسرد له كل ما مررت به، فضحكت بالغرفة، كان خائفاً لكنه يحاول الصمود أمامي، لكن عينيه وجفاف حلقه يفضحانه بشدة، أصوات كثيرة بالخارج تعبر البلكونة وتأتي إلي في سريري رغماً عني، صوت «أم محمد» تصرخ وتسب «مروان» بالخارج كعادتها، ثم تهبألي أنني أسمع أصوات صخب لم أميزها بداخل البيت، لكنني لم أعد خائفاً كسابق عهدي؛ لذلك قُمت في شجاعة وفتحت باب الغرفة، ووقفت أمامه في كل الاتجاهات لأرى سبب الأصوات فلم يكن شيء على الإطلاق، رُبها كثرة الأحلام التي تراودني في الآونة الأخيرة، والتي لا أجد لاستمرارها سبباً منطقياً، على أية حال الأمر انتهى وإن بدا كحلم لا أصدقه، لم أنتس قط حديثي مع «نوح» وكأنه

ملايبي استعدادًا للخروج، فأنا على موعد مع حسن لقضاء
اليوم معًا، لم يتبقَّ إلا أن آخذ حمامًا ساخنًا لأزيل ما تعلق بي من
تعب أخير، أحسست بملكيتي الحقيقية للبيت، أنا الآن المسئول
عنه وعن حمايته.. وإن كنت أعلم الآن بوجود عائلة من الجن
تشاركني السكن، تناسيت بكاء راقصة الباليه وأحسست أنني
أستطيع أن أطير وقد انكشف لي أمر قد يبحث عنه كثير من
الشيوخ ولا يهتدون إلى حقيقته.

دخلت الحمام وقُمت بإشعال السخان الذي يعمل بأنبوب
الغاز كما علمني «مروان» في إحدى المرات، الأمر ليس مُعقدًا
كما كانت تُحذرنني أمي دائمًا، استسلمت للماء الدافئ المنهمر فوق
رأسي، أغمضت عيني وأحسست بسلام وهدوء نفسي كبير
للقائق، المشكلة الوحيدة كانت في سخونة الماء المفاجئة والتي

أوشكت أن تحرقني حروقًا كبيرة، لولا أن انتبهت فخرجت من تحت الماء بسرعة، فتحت عيني لأجد السخان أمامي مُشتعلًا والنار تعلو وتزيد، حمدت الله أن مكان البانيو بعيد عن السخان وإلا كنت احترقت، هرولت إلى الخارج والماء يتساقط مني عاريًا، ارتديت ملابسني التي أعددتها للخروج، صرخت بصوت عالٍ وأنا أهول لأستغيث بعم محمد وتركت باب الفيلا مفتوحًا، خرج الرجل مُسرعًا من غرفته وعائلته وراهه يبدو عليهم القلق، فسألني في توتر:

- في إيه يا آدم؟

- الحقني يا عم محمد البيت كله هيلع، أنا سايب النار في

الحمام بتزيد بسرعة.

- من إيه؟

- السخان...

لم يكن رد فعله على مستوى الحدث، نظر الرجل إلى الفيلا نظرة غريبة لم أفهمها، لمحتُ «أم محمد» تلف شالها الأسود الخفيف وتستعد للخروج، أسرعنا نحو الفيلا، لكنني وجدت الباب مُغلقًا! تساءلت بصوت عالٍ.

- الباب كان مفتوح!

جاء رد «أم محمد» بسرعة يجيبني:

- ده أكيد الهوا.. هروح أجيب المفتاح اللي معايا بسرعة.

لكن نظرات «أبو محمد» لم تُرخني أبداً وهو ينظر إلى الفيلا

ويتمتم:

- هوا إيه اللي قفله ده مفيش نسمة واحدة! ثم إن الباب

تقيل صعب هوا يقفله.

عادت «أم محمد» وأعطت المفتاح لزوجها ففتح الباب على

الفور ودخلنا مندفعين تجاه الحمام، وقفنا أمامه صامتين، نظر إلى

الخفير وزوجته في صمت، ثم تكلم «أبو محمد» بعد دقائق قليلة

من الحيرة:

- فين الحريقة يا آدم؟

كانت عيناى معلقتين على السخان وشعلته الخافتة الهادئة،

لا يوجد آثار ولو بسيطة لتيران اشتعلت منذ دقائق قليلة! وكان

شيئاً لم يكن! نظرت إلى «أبو محمد» في دهشة لم أكتمها:

- ساعة ما جريت عليك كانت النار موجودة وطايلة

السقف! هو ممكن النار تنظفي لوحدها؟

لمحت «أم محمد» تنظر إلى السقف والجدران وتقرأ القرآن في

صوت أكاد أسمع، قطع زوجها الصمت:

- متأكد إن كان في حريقة؟ ولا يمكن كنت بتحلم؟ شكلك

لنسه صاحي من النوم..

أردت أن أبقى وحيداً لأفكر فيما حدث، فأردفت:

- يمكن يا عم محمد.. معلىش بتعبك معايا.

نظرات الرجل للبيت ملؤها الخوف والحيرة، أما نظراته لي فكلها شفقة وربما أحاديث مكتومة، خرج الرجل تسبقه زوجته وقد لاح عليها الخوف وأغلقت الباب، نظرتُ إلى الفيلا نظرة شاملة، لم أكن خائفاً هذه المرة بل تملكني التحدي، لا بد أنه «عبدالله»، لكن ألا يعلم أنني لا أقابل «نوح» منذ المرة الأخيرة؟ بدلت ملابسي وقد أصبحت مُبللة، خرجت فرأيت «مروان» عاقداً يديه يتأمل الفيلا في فضول، مررت بجانبه وتلاقت أعيننا دون حديث فوجدته مُريباً.

قابلت حسن في ميعادنا المتفق عليه، رأيت من بعيد مُبتسماً ينتظرني، كُنت قد تحدثت إلى حسن عبر الهاتف البارحة بروح تملؤها الراحة، كان هذا منذ ساعات قليلة، لكنه يراني الآن وقد اختلفت وملاأتني الشكوك من جديد، كلما اقتربت منه تراجعت ابتسامته تدريجياً، صافحته في برود فتفحصني وسأل:

- شكلك ميظمنش.. في حاجة جديدة ولا إيه؟ ده احنا

المقروض هنعحتفل؟

- يعنى..

- مش فاهم يعنى دي!

سردت له ما حدث قبل وقت قصير، بدا عليه القلق والخوف وأردف:

- مش كنا خلصنا من الهم ده يا ابني؟ هو بسم الله الرحمن الرحيم «عبدالله» شكله كده.. لو ليك كلام معاه قوله إنك مابقتش تكلم ابنه واخلص.

- هو إيه يا ابني اللي ليك كلام معاه! هي سهلة كده؟!
- أمال أقولك إيه يعني؟ ما انت بقيت بتكلمهم اللهم احفظنا، أقولك.. ياللا نروح ناكل الأول.
- ماليش نفس.

- ليه النكد يا آدم؟ اتفقنا نخرج ونحتفل إن الهم اللي كنت معيئنا فيه خلص، تقوم تيجي تقولي حريقة وانظفت وباب اتقفل وموال أزرق تاني؟
- وهو بإيدي يعني؟ أعمل إيه؟ قولي إنت.

- ما تخلي «عم محمد» يجيب الشيخ اللي جابهولك قبل كده؟
- والله فكرة.. ما تفكر في حاجة كمان يمكن تنفع؟
- طيب ياللا الأول ناكل علشان هموت من الجوع وبعدين

نبقى نفكر.

لم يُمهلني «حسن» للرد، أمسك يدي ومشينا إلى مطعم صغير لنقضي على أطباق من الفول والطعمية الشهية، أكلنا بنهم

من شدة الجوع وأكلت بنهم أكثر من شدة القلق.

انتهينا وتحدث «حسن» كثيرًا في أمور لا تهمني، رُبما لأنه لا يريد إلا أن يحتفل بتخلصي من الأيام السوداء، كما سبق وأكدت عليه، رُبما لا يريد أن يعترف أنها لم تنته، ولا يريد أن يعرف شيئًا، لكنه أصر على الحديث في أي شيء وكل شيء عدا ما شاركته منذ قليل، أدركت نفسيته ومثلت أنني بخير إلى أن حان وقت الرجوع إلى البيت، فقد أمضيت أغلب النهار أصطنع الراحة، ودعته وذهبت إلى الفيلا لأواجه مصيري من جديد.

من بعيد بدا كل شيء طبيعيًا وهادئًا داخل أسوارها، عبرت البوابة الحديدية التي تعود الخفير أن يتركها مواربة، وأمام باب الفيلا تحسست المفتاح في جيبتي فلم أجده، لا أذكر هل وضعت في جيبتي أم أنني نسيتَه قبل خروجي. سمعت صوت القرآن عاليًا من الداخل، لا بد أن «أم محمد» من أدارته، رجعت إليها فقابلت «مروان» يتحدث إلى صديقه، ولاحظت عليه الوجوم، ألقى التحية عليها وسألت «مروان»:

- كنت عايز مامتك ضروري.

- راحت تعزي وجاية.. عايزها ليه؟

- طيب شوف نسخة مفتاح الفيلا اللي معاكم فين كده؟

عايز أدخل ونسيت مفتاحي جوء.

نظر إلى بثقة وأردف:

- دور في جيبيك.. أنا شايفه في إيدك وانت خارج.

تحسست جيبي مُردفًا: «مش لاقيه.. دورت وشكلي...»

ثم توقفت عما أفعل أو أقول، فقد وجدت المفتاح في جيبي! لا

بد أن ملاحني بدت عليها الدهشة أو رُبا الخوف، فنظر صديق

«مروان» له في ارتياب ثم نظر لي، بينما احتل الفضول نظرات

«مروان» وأردف:

- لقيته؟

نظرت إليهما وجاهدت لرسم ابتسامة وتوجهت نحو الباب

في خطى سريعة وقد غلبني الغضب! فتحت الباب وأغلقتة

بعصبية ووقفت وراءه أنظر إلى كل شيء بالداخل وقد توقف

صوت القرآن! ازددت عصبية وتحدثت في صوت عالٍ:

- بتعمل كده ليه يا عبدالله؟ أنا مش خايف منك.. أنا مقدر

إحساسك وإن في بني آدمين ميتعاشروش، فاهم شكوكك في

الدين، بس أنا مش يشوف ابنك بقالي فترة واطمن مش هشوفه

تاني، وبعدين ماليش ذنب في أي حاجة إنت مریت بيها، بتذيني

ليه؟! أنا راضي إنكم قاعدين في البيت لكن خلونا نعيش في

سلام.

توقفت عن الكلام ولم يحدث شيء، ظللت هكذا لدقائق

أراقب ما حولي دون فائدة، مررت على الحمام في طريقي إلى غرفتي فنظرت إلى شعلة السخان الهادئة ترقص وكأنها تهزأ بي، دخلت الغرفة وأغلقتها ثم بدلت ملابسي، تذكرت أنني لم أصل شيئاً من صلوات اليوم، أردت أن أقوم فأتوضأ لأنني لم أشأ أن أدخل الحمام، استغفرت الله ونويت الصلاة غداً، لم أطفئ النور وشرعت في النوم، قرأت آية الكرسي كما أوصاني «نوح» وغفوت قليلاً.

لكنني بعد فترة من الزمن لا أعلمها استيقظت على صوت باب الفيلا الداخلي يُغلق بقوة، ثم أصوات خلف باب الغرفة كافية لأبقى في حالة مُزرية، أصوات حشرة ولغة لا أتبينها، أصوات رفيعة وأخرى غليظة تتداخل وكأنها في شجار عنيف! انقطع نور الغرفة فجأة وبدأت خبطات عنيفة على الباب من الخارج! وكأن أحداً يريد كسره! أحسست أن قلبي سيتوقف، حنجرتي لا تسعفني بالنداء على أي مخلوق، تمنيت لو يحضر «نوح» وينقذني، أم أنه أتى بالفعل لينقذني من شر «عبدالله»؟

مرت دقائق لا أذكر عددها وخبطات الباب تزداد عنفاً، حتى اعتقدت أن الباب قد انكسر في إحداها، وأنا أجلس مُنكمساً في زاوية السرير لا حول لي ولا قوة أغرق في عرقي، عدا أنني أقرأ آيات متقطعة في سري وأرتجف من الداخل والخارج، فجأة

توقف كل ما يدور، لكن صرير السلم الخشبي أحدث ضجيجًا،
أرجل كثيرة تصعد أو تنزل عليه، فجأة أتاني صوت القرآن عاليًا،
وأضيء نور الغرفة من جديد!

نظرت إلى ساعة الحائط فكانت متوقفة عند الساعة الثانية
عشرة، نظرت إلى ساعتني فوجدتها الثانية عشرة بعد منتصف
الليل، مُستحيل أن تدخل «أم محمد» الفيلا في مثل هذه الساعة،
عائلة الخفير بأكملها غير مُعتادة على السهر، لكن صوت إغلاق
الباب كان واضحًا، هل حضر «نوح» لينقذني من والده فأدار
جهاز التسجيل على شريط سورة البقرة الذي لا يغادره؟ أشكر
يا صديقي، هل احترق «عبدالله»؟ هل يقتل الابن والده من أجل
صديقه؟ صديق من جنس آخر! مازلت أرتعش وأتعرق، لا
أجرؤ على الخروج من إطار السرير.

أردت بشدة الذهاب إلى الحمام لكن دون شجاعة كافية
لأذهب، التحفت بالغطاء ورددت كل ما حفظته من القرآن
الكريم إلى أن غفوت جالسًا، بعد فترة لا أعلمها استيقظت على
يد تضرب كفي بعنف! تلفتُ حولي فلم أجد أحدًا، لكن النور
انقطع مرة أخرى للحظات، ثم عاد نور الغرفة باهتًا وكأنه ضوء
شمعة بالكاد تُنير ما حولها، رأيت خيالًا لكلب ضخم يقف في
الغرفة لكنه تلاشى عندما سمعت صوت نوح مدويًا بالخارج

يقول في حزم:

- إحنا مش هنمشي من البيت ولا سكاانه هيبيعوه.. إحنا
حراس الأثر وأظن الكل عارف.
أخذت أتلفت حولي وقد انكشيت في مكاني أكثر، بعد قليل
وشيتا فشيئا تجسد شخص لا أعرفه يجلس على طرف سريري،
كان ينظر إلى الأرض لكنه بدأ يضحك تدريجياً بصوت عالٍ، ثم
أخذ يتلفت نحوي ببطء، ويا هول ما رأيت! كان أبي! صحت
غير مُصدق مُتلهماً عليه للحظات: «بابا!! إنت فين؟».

كانت ملامح أبي لكنه ليس هو، كان غريباً ومُريباً، نظر إلي
في سُخريّة وقال:

- قتلتك متدخلش حد غريب البيت، متعرفش على حد
غريب، مسمعتش الكلام ليه؟ عاجبك اللي بيحصل في البيت
دلوقتي؟ عاجبك الخناقة اللي دايرة بسببك؟ إنت مش راجل،
يا خسارة مش هعرف أعتد عليك، لكن ممكن أسامحك لو
سمعت كلامي..

هذه كلمات أبي التي أوصاني بها وخالفتها! ثم انتبهت
للخدیعة، وتحجرت عيناى عليه غير مُصدق ما أرى، نظر إلي
نظرات شيطانية مُريبة تقشعرها الأبدان والقلوب، وتحولت
عيناها تدريجياً من حُرة خفيفة إلى حُرة جهرة من الذهب! تحجرت

عيناى على عينيه وأنا أكاد أموت من الخوف ثم نطقت شفتاي
بتلقائية:

- أعود بالله من الشيطان الرجيم..

وعندها رمى الكائن شيئاً على الأرض في غضب فكانت
كتلة من النار اشتعلت وتوهجت ثم انطفأت، ثم نظر إلي في
غضب عارم وأردف في صوت غليظ:
- احرص.

ارتعبت منه واضعاً كفي فوق شفتي كأنما صرخة خوف،
لكن صوت نوح كان عاليًا يرتل آيات قرآنية بعينها تضايق
وتؤذي هذا الكائن أمامي، نزلت دموعي وأنفاسي تكاد تزهق
من الرعب، فأردف في غرور وسُخرية وألم بصوت كاخترير:
- لما انتو بتخافوا قوي كده.. عاملين دوشة ليه؟ بتفاخروا
بياه في الدنيا؟

ثم ضحك ضحكة أرعبتني حد الموت، استجمعت كل
أطرافى المجمدة وصرخت: «الله أكبر.. الله أكبر»، فنظر إلي نظرة
خاطفة غاضبة وبدأت أرى ناراً تشتعل في بعض أجزائه كلما علا
صوت نوح بالخارج، صرخت مرة أخرى: «الله أكبر.. الله أكبر..
الله أكبر» فرأيت يتلاشى وأظلم النور!

لا أعرف كيف انتفضت واقفاً مكاني لأضيء الغرفة

بسرعة، لم يردد لساني إلا قول «الله أكبر» لفترة كبيرة من الوقت لم أحسبها، نظرت في أرجاء الغرفة فوجدت رمادًا أسود كثيرًا يتتشر في الغرفة ويتجه إلى الباب.

كان الهدوء يخيم على البيت، وقفت وراء الباب أستمع لأية أصوات قادمة من خارج الغرفة، فلم أسمع إلا صوت السكون، فتحت الباب بهدوء شديد وطاقات عيناى بالخارج فلم أر شيئًا غريبًا، عدا آثار أقدام كبيرة جدًا غريبة ليست كأقدامنا ملوثة بدماء! الآثار قوية أمام باب غرفتي، تضعف قوة الأثر كلما ابتعدت، اتجهت الأقدام نحو السلم الخشبي، بات جليًا أن صاحب آثار الدماء قد صعد إلى الدور العلوي!

هالتي ما حدث وأنا وحيد، أغلقت الباب مرة أخرى وجلست على سريري أنظر إلى طرفه، وأسترجع صورة أبي في هذا الكائن الذي رأيته! نظرت إلى الساعة مازالت الثانية عشرة، ساعتى تشير إلى الثانية صباحًا، لم أفهم شيئًا حينها لكنى جلست أقرأ القرآن وأنتظر الفجر، أناجى الله: «لا ملجأ منك إلا إليك» إلى أن فُتح الباب دفعة واحدة ورأيت «نوح» يبدو عليه التعب الشديد.

(٢٠)

«عبدالله»

رأيتها من الشرفة يتبادلان شيئًا وينظران بحذر إلى الفيلاء،
تساءلت: ما الشيء الذي يجمعهما في هذه الساعة المتأخرة من
الليل؟ طرت ووقفت بجانبهما وكانت صدمتي عظيمة حين
سمعت «حسن» صديق «آدم» المقرب يتلفت حوله في قلق
مُردفًا:

- عد الفلوس بعدين يا غبي.

نظر إليه مروان وابتسم فأردف بخبث:

- إيه.. خايف؟

- يعني لو آدم صحي وشافنا هقوله إيه؟ جاي دلوقتي ليه

يعني؟

- متقلقش هو مش هيشوفنا.. هو بيفضل قاعد مرعوب في

السرير حتى الحمام بيخاف يروحه.

ثم ضحك ضحكة خافتة سريعة وأردف:

- مظبوطة الفلوس تمام يا صاحبي.

هدأ حسن قليلاً ثم أكد على مروان:

- إنت بترمي اللي بديهولك بانتظام في الفيلا؟

- طبعاً حسب الاتفاق..

- مش هو صيكن بقى.. أول ما الدنيا تتقلب تبلغني أبلغ

أبوي اعلشان هيعمل حاجات من مكانه.

- هو اللي هيعمل؟

- يا ابني الراجل اللي جايبه يعني..

- آآه.. هو المفروض الميعاد النهارده وكلهم جاين..

- وانت هتعرف إزاي إن الدنيا باظت جوه وآدم مش

بيتحرك من مكانه؟

نظر مروان إلى الفيلا في غموض وقال:

- التور بيولع ويظفي وبعدين يرعش كده ويثبت كأنه نور

شمعة ولو قربت شوية من الفيلا هتسمع أصوات غريبة.

دلت نظرات حسن على خوف يحاول أن يخفيه ثم سأله في

فضول:

- وانت بتقرب من الفيلا؟

- لحد معين مقدرش أدخل ساعتها أتذنى.

سادت لحظات صمت ومروان يخفي النقود في ملابسه

مبتسماً يرمقه حسن بملامح ضامضة ويهم أن يسير خارج البوابة

- زي ما انت بتعمل معاه كده بالظبط وهو أعز أصحابك.

تخرج حسن من الرد وقال في تلعثم:

- أنا في الآخر بطبع أبويا يا مروان، أبويا قرا مذكراتي اللي

كنت كاتبها عن اللي شفته في القبلا هنا، اتأكد إنى كنت بكذب

عليه لما كان بيراقبني علشان يعرف أنا و آدم أصحاب فعلاً ولا

لا، بصراحة أهلي لهم الأولوية في حياتي وبعدين يبجي وراهم أي

حاجة تانية، ثم إن أبويا حكى لي عن الأثر اللي في القبلا وإنه أصلاً

بتاعنا إحنا.. يعني مش بنسرقه، هما اللي حاطين أيديهم عليه.

ضحك مروان مرة ثانية وهو يلعب في شعر رأسه ثم أردف

في ثقة:

- إنت عارف وأنا عارف إن الكلام ده مش حقيقي.. خليك

صريح مع نفسك.. إنت لو مع الحق مش هتسمع كلام أبوك،

لكن إنت عايز تعيش المغامرة وتفهم السر حتى لو على حساب صاحبك، أنا بقى عندي الأهم، أخويا اللي مات هدر مين انتقم له؟ أبويا بقى ضعيف وفلوسه راحت، إذا هو كان غشيم أنا لأ..
 عبد الله مطلقشه أو هيتحرق.. وحلال عليكم الأمانة وحلال علي باقي الفلوس

تلقت حسن حوله في خوف وأردف:
 - اللهم احفظنا.. خلاص خلاص.

هكذا حال أغلب الإنس، يدعون الوفاء والفضيلة ثم يخونون بعضهم، تعجبت من خيانة حسن لصديق عمره آدم بحجة طاعة والده، وتعجبت كذلك من خيانة مروان وهو المكلف بحراسته مع والده أيضًا، رغم هذا ويكفل بجاجة يطلبون الحفظ من الله! هممت أن أظهر وألقنها درسًا.. كظمت غيظي وما هي إلا لحظات ورأيت نارا تاكل البيت كله من الداخل دون دخان، ففهمت أن الحرب قد بدأت، تركتها محمقين للفيلا في ذهول وقد هروا حسن إلى الخارج ومروان إلى حيث أبيه الذي خرج من غرفته منتبهًا إلى نور الحريق وقد انتابه الفرع، طرت إلى داخل الفيلا وحمدت الله أن آدم مازال بداخل غرفته لم يخرج.

(٢١)

«نوح»

أصعب الخيانات هي التي تأتي من أقرب الأقربين، والخيانة هذه المرة جاءت من صديق أبي، فور أن رأني وأنا أدخل قال:
- ابن الحارس البار وصل.

قالها وهو يبتسم باستهزاء ونظر إلي في حنق ولكن في خوف أيضاً، وقد فهمت مخاوف أبي الذي علا صوته قائلاً:
- إيه اللي جابك دلوقتي يا «نوح»؟

لم أستطع أن أشاهد أبي القوي ضعيفاً هكذا وقد تجمع ضده أصدقاء أمس وأصبحوا ألد أعدائه بعد عودته لإسلامه، أردفت:

- لازم أكون موجود معاك.. أنا عارف كل حاجة وكنت مراقب حسن ومروان، متقلقش علياً.. إحنا أقوى.

ثم نظرت إلى صديقه الخائن وبدا علي التحدي وقلت:

- إحنا مش هنمشي من البيت ولا سكانه هيبعوه.. إحنا حراس الأثر وكلكم عارفين.

- جميل .. مستنيين من زمن علسان نخلص من العيلة كلها.

هكذا جاءني رد صديق أبي القديم مُستهزئًا بي.. نظرت إليه

في ثقة وأردفت سريعًا:

- ﴿إِنَّ الَّذِينَ كَفَرُوا بِآيَاتِنَا سَوْفَ نُصَلِّبُهُمْ نَارًا كُلَّمَا نَضِجَتْ

جُلُودُهُمْ بَدَّلْنَاهُمْ جُلُودًا غَيْرَهَا لِيَذُوقُوا الْعَذَابَ إِنَّ اللَّهَ كَانَ عَزِيزًا

حَكِيمًا ﴿١﴾.

طار في الهواء وسمعت صوت صرخته مدويًا فنزل علي

والتحمتنا، لكن والذي تدخل وأنقذني فأردفت في سرعة»

- ﴿وَلَوْ تَرَىٰ إِذْ يَسُوفُ الَّذِينَ كَفَرُوا الْمَلَائِكَةَ يَصْرِيحُونَ

وُجُوهَهُمْ وَأَدْبَارَهُمْ وَذُوقُوا عَذَابَ الْحَرِيقِ ﴿٢﴾.

اشتعلت المعركة بينه وبين والذي وقد جرحه جرحًا غائرًا

هذا الذي حسبه صديقًا يومًا ما، رأيت دموع أبي لأول وآخر

مرة وهو ينظر مُندهشًا إلى صديقه، ثم سمعته وكأنه يُحدث نفسه

ويقول همسًا: «سلامًا مُفارقًا لا يلتفت إلى ما قبله» فضحك

صديقه في سخرية واقترَب من أبي فأردفت:

- ﴿وَتِلْكَ الْقُرَىٰ أَهْلَكْنَاهُمْ لَمَّا ظَلَمُوا وَجَعَلْنَا لِمَهْلِكِهِم

مَوْعِدًا ﴿٣﴾.

(١) [النساء: ٥٦].

(٢) [الأنفال: ٢٥٠].

(٣) [الكهف: ٥٩].

توقف عن ملاحقة أبي وبدأ يقترب مني وقد بدا أبي مُنهكًا
فأسرعت في تلاوة الآيات سريعًا واحدة تلو الأخرى، لكنه
طرحني أرضًا فخارت قواي وشعرت بضعف لكنني أصررت
على تلاوة الآية الكريمة بقوة:

- ﴿ هَذَانِ خَصْمَانِ أَخَصَمُوا فِي رَبِّهِمْ ۖ فَالَّذِينَ كَفَرُوا
قُطِعَتْ لَهُمْ نَارٌ يُصَبُّ مِنْ تَلْوَاهِ يُصَبُّ مِنْ تَلْوَاهِ ۖ فَالَّذِينَ كَفَرُوا
يُصَهَّرُ بِهِ مَا فِي بُطُونِهِمْ وَالْجُلُودُ ﴿٤٠﴾ وَلَهُمْ مَقَامِعٌ مِنْ حَدِيدٍ ﴿٤١﴾
كُلَّمَا أَرَادُوا أَنْ يَخْرُجُوا مِنْهَا مِنْ غَمٍّ أُعِيدُوا فِيهَا وَذُوقُوا عَذَابَ
الْحَرِيقِ ﴿٤١﴾ .

تحول صوته إلى حوار غليظ، وأخذ يطوف في أنحاء البيت
ويتخبط وتترف الحروق من جميع جسده دون توقف، ثم هبط
ونظر إلي وإلى والدي مُتوعدًا وأخذ يردد: «مش هسيبك يا
عبدالله. مش هسيبك يا نوح»، ثم خرق باب غرفة آدم، سمعته
وهو يتحدث إلى آدم ويخيفه ولم أستطع أن أنفذ منه فرددت
بصوت عالٍ:

- ﴿ إِنَّ شَجَرَةَ الزَّقْوِمِ ﴿٤٣﴾ طَعَامٌ الْأَشِيمِ ﴿٤٤﴾ كَالْمُهْلِ
يَغْلِي فِي الْبُطُونِ ﴿٤٥﴾ كَغَلِي الْحَمِيمِ ﴿٤٦﴾ خَذُوهُ فاعْتَلُوهُ إِلَى سَوَاءِ
الْجَحِيمِ ﴿٤٧﴾ ثُمَّ صَبُّوا فَوْقَ رَأْسِهِ مِنْ عَذَابِ الْحَمِيمِ ﴿٤٨﴾ ذُقْ

(١) [الحج: ١٩-٢٢].

إِنَّكَ أَنْتَ الْعَزِيزُ الْكَرِيمُ ﴿١﴾.

فإذا بصرخة مدوية تملأ المكان وتهدأ رويدًا رويدًا إلى أن صمت الصوت تمامًا، ذهبت إلى والدي وأسندته إلى أقرب كرسي، ثم ذهبت إلى آدم وفتحت الباب عليه كي لا أخيفه أكثر، طالت نظرات الصمت بيننا وكان قد بدأ يفهم ما يحدث حوله ورأيت عينيه تستغيثان فرددت منهاكًا:

- ﴿وَلَا تَدْعُ مَعَ اللَّهِ إِلَهًا آخَرَ لَا إِلَهَ إِلَّا هُوَ كُلُّ شَيْءٍ هَالِكٌ إِلَّا وَجْهَهُ لَهُ الْحُكْمُ وَإِلَيْهِ تُرْجَعُونَ﴾ (٢) صدق الله العظيم.

نظر آدم وقد إمتلأ رعبًا وسمعت صوته الباكي المرتعش

بهمس:

- هو كده اتحرق؟

تميت هذا لكني أجبته..

- الله أعلم.

(١) [الدخان: ٤٣-٤٩].

(٢) [الفصص: ١٨٨].

(٢٢)

«عبدالله»

سمعت باب الفيلا يُفتح بقوة، ثم أتاني صوت الخفير مُتلهفاً
 يتفقد آدم ويطمئن عليه، لا بد أنه انزعج كثيراً من رؤية الحريق،
 ثم سمعت صوت خطواته إلى الأعلى، يتفقد كل شيء ويُسبح
 ويُكبر، ربما يحدث نفسه بأنه قد رأى الحريق بعينه فكيف لم
 يكن؟! سمعته يتذكر آدم عندما فر هارباً من حريق لم يحدث في
 الحمام. وتذكرت أنا كلمات «آدم» التي رددتها وراءه: «لا ملجأ
 منك إلا إليك» وأنا مُصاب، بالأمس آذيتك واليوم أحملك!
 عجيبة هي الدنيا في تقلباتها!

كانت «سارة» تبكي وتطيب جروحي، لم أكن أبالي بالجروح،
 كنت أفكر في صداقة سنوات طويلة انقلبت إلى عداوة بعدما
 أشهرت إسلامي، دخل «عم محمد» الغرفة يتفحصها وينظر
 إلى جدرانها وأثاثها ويتمتم: «يا ربى! أنا شايف النار بعيني اللي
 هياكلها الدود بتنهش في البيت! رحمتك يا رب»، طلبت من
 زوجتي أن تتركني لأستريح قليلاً ففعلت، نظرت إلى الأب

المكلم منذ سنوات في شفقة وقررت أن أتحدث معه على غير
عادتي مع الإنس فأردفت في صوت خافت:
- السلام عليكم ورحمة الله وبركاته.

وقف الرجل وقد احمرت أذناه في نفس اللحظة وبقي
متصلبًا ينظر إلى كل أركان الغرفة والسقف، فأردفت في هدوء:
- أرجوك متخافش أنااا...

ارتعش الرجل وأخذ يردد بلا توقف:
- «الله أكبر.. الله أكبر» مين.. مين.. لا إله إلا الله..
انتظرت حتى التقط أنفاسه وأردفت:
- «سيدنا محمد رسول الله».

فغر الرجل فاه وجحظت عيناه وهو يتلفت حوله مذعورًا
ولم يعلق، لكنني فعلت:

- أنا الخارس عبدالله يا أبو محمد، أنا مش حابب إنك
تشوفني تاني لأن أول مرة شُفتني كان يوم...
تساقطت دموعه وانهمرت الواحدة تلو الأخرى وانفطر
قلبي معها لكنني أريده أن يستمع إلي فقلت:

- ابنك محمد الله يرحمه أنا ملمستوش.. خوفه مني هو
السبب.. أنا مش بنكر إني كنت سبب وعلشان كده دلوقتي
بطلب منك تسامحي.

توقف الرجل عن الخوف لكنه لم يتوقف عن البكاء
فأكملت:

- أنا عارف إن الموقف صعب على أي بني آدم، لكن أنا قررت
أكلمك علشان حاجتين: الأولى ابنك مروان بيكلم عيلة السعدني
ويساعدهم بانحدوا التعويذة اللي انت عارفها. زالي بيتحججوا
بكتابة الأثر عثمان يوصلوا لها، المشكلة مش في قوة شر التعويذة
بس، المشكلة إن كل اللي يساعدهم هيتادي، يعني ابنك مش همسلم
منهم صدقتي، صاحبي اللي كان هنا إمبراح كمان مع السعدني
وده ملوش عهد، ابعدده عن كل ده وحصنه و...

قاطعتني الرجل في حدة وهو يتلفت في كل الاتجاهات وعلا
صوته:

- لأ.. مروان لأ.. مش هتعرف تئذيه يا عبدالله.. الأعيك
دي أنا فاهمها كويس.. ولعلمك أنا مش خايف منك حتى لو
هموت، لكن مش هسيك تموت عيالي وأبقى جبان تاني.. أعوذ
بالله من الشيطان الرجيم.. بسم الله الرحمن الرحيم..

قاطعته بدوري في هدوء:

- أنا أسلمت يا محمد وسلمت أمري لله.. وزي ما حاربت
الأذى إمبراح محاربه لآخر يوم في عمري، ممكن تتأكد من
ابنك على كل اللي قلته، هو من الناس اللي عايزة تئذيني ومع

تأملت حياتي السابقة وما آلت إليه فقط خلال بضعة أشهر قليلة، ضعفي وقوة إيمان «نوح»، وكيف جعل إنسيًا يلجأ إلى الله، وأوصاني به خيرًا قبل ذهابه إلى مكة المكرمة، وكيف آذيت أنا إنسيًا لحد الموت دون مبالاة، كيف لم أنتبه إلى هراء الحياة وخذعها؟ كيف أغويت نفسي مثلما أغويت كثيرًا من الجن والإنس؟ لكن ذاك الفضل الكريم قد منّ علي بالإيمان بعد كفر دام سنوات كثيرة، منّ علي بزوجة صالحة وابن بار، وها أنا أحاول تصحيح خطيئتي لكن.. هل يغفر لي الله؟

دق الباب ثم فُتح على مهل، كان ابني يستأذن في الدخول فأجبتُه وكنت أعرف أن آدم ينتظره بالخارج يريد أن يشكرني لِمَنّ الله، دخل نوح وأردف:

- الحمد لله على سلامتكَ يا والدي.

ابتسمت له في حنو فجاء وضممني قليلاً فأردفت:

- الحمد لله على كل شيء.. صاحبك نفسه يشوفني دخله..

نظر إلي نوح وابتسم وأشار لآدم بالدخول، دخل آدم بخطى

بطيئة خائفة يهاب الموقف ولا أنكره عليه، رأني وتحجرت عيناه

وارتعشت يداه قليلاً فبدأت الحديث:

- ادخل يا آدم متخافش.. اقعدي..

نظر إلى نوح فطمأنه فجلس، ثم دخلت سارة تحاول أن

تبدو طبيعية وأنا أعلم بحزنها وبكائها، رأها آدم ففرع في يادئ

الأمر، ورأته هي فنظرت لي في تعجب فأشرت عليها بالجلوس

وأردفت:

- آدم دلوقتي مؤهل إنه يشوفنا ويتعامل معنا يا سارة،

صحيح سنه صغير بس أنا واثق إنه راجل.

ابتسم ابتسامة غريبة ولم يعلق فسألته:

- لسه خايف يا آدم؟

نظر إلينا جميعاً ثم إلى الأرض وقال كأنه يتحدث إلى نفسه:

- مش عارف أنا بحلم ولا ده بجد؟ حسن يطلع خاين!

مروان كمان! طيب ليه؟ إنتو اللي تحمونني! مش قصدي بس عقلي

مش قادر يستوعب ليه الناس يتقابل الخير بالشر؟

ساد الصمت لحظات وأكمل:

- عمومًا أنا عرفت من نوح إنك رجعت لربنا وإنك كنت بتحميني مش بتثيني الفترة الأخيرة، أشكرك و....
قاطعته وقد غلبني التعب:

- ساحني على كل اللي عملته معاك في الأول، أنا مكنتش عندي ثقة في أي إنسي لكن إنت ونوح غيرتوا لي الفكرة دي، خليك دايماً قريب من ربنا مفيش مخلوق يقدر يثذك، في حاجة مهمة جدًا لازم تعملها دلوقتي.

- إيه؟

- أنا اللي رباني جدك الكبير - الله يرحمه - بعد ما مات أهلي في الشام، كان يعرف عيلتي كويس لأن أبويا كان حارس التعويذة، وقبل ما يموت وصاني لو حصله حاجة آجي على بيت الخولي، وفعلاً نفذت الوصية وجيت ورباني وأكرمني، فهمت لما كبرت إني لازم أكمل اللي بدأه وأكون الحارس لحد ما الوصية تنتفذ، جدك كان يعرف جن كثير مسلم من كل البلاد وكانوا يبساعدوه في الخير، النهارده لازم أرد له الجميل، جدك وصي أبويا إن التعويذة دي متفتحش إلا على يد نسل صالح، وأنا شارب، ده فيك دلوقتي يا آدم.. مشفتش اللي في عينيك في نسل

قبلك.

- أنا؟ طيب أعمل بيها إيه؟ دي سبب كل البلاوي اللي

حصلت.

- التعويذة كانت مكتوبة على يد كاهن يهودي يُقال إنه من

عيلة السعدني، أُلحد بعد ما درس السحر وسيطرت على دماغه

فكرة السيطرة على كل اللي حواليه، الأرض دي كانت ملك

لعيلة السعدني فعلاً زمان وجدك الكبير اشتراها منهم وبدأ يبني

البيت، لما وقعت في إيده المخطوطة اللي فيها التعويذة دي فهمها

وهو كان رجل صالح، دفنها في أوضة صغيرة تحت البيت، لكنه

استشار ناس من البلد في أمرها.. ولما الموضوع اتعرف عيلة

السعدني طالبت بيها وجدك رفض، وفضل الصراع عليها زمن،

الوصية الشفوية اللي حافظ عليها جدي الحارس ومن بعده أبويا

في حراسة التعويذة ومن بعده العبد لله بتقول الابن الصالح اللي

يمسكها يحرقها فوراً دون النظر إليها وإلا هيتذي، نوح هيكون

معاك لكن لحد باب القبو بس.. ميقدرش يكون متواجد وانت

بتحرقها وإلا الشر ممكن يبجي علينا كلنا.

نظر إلي نوح في دهشة، أعلم ما تخفيه الجرة في القبو بداخلها

من تعويذة شريرة تجلب الكثير من القوة لمن يقتنيها، وأعلم



٢٠٨

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

اعطته لـ «عبدالله»، نظر إلى الاخير وقال بحزم:

- قرب يا آدم.. المفتاح ده بتاع قبو الفيلا، المفتاح ده كنت حارس عليه وكان من قبلي أبويا ومن قبله جدي، المفتاح ده قيمته عالية جداً، كثير ممكن يعملوا أي حاجة علشان يبقى في أيدهم، النهارده أنا وانت لازم ننفذ وصية جدودنا، اللي كان كل همهم إرضاء الله ومحاربة الفساد في الأرض، امسك..

اقتربت منه في وجل ونظرت إلى المفتاح الأثري وأمسكته خائفاً فأكمل «عبدالله»:

- اتوضا وانزل تحت، اقرأ آية الكرسي وانت على يقين إن ربنا هيحملك ويساعدك، افتح الباب، ولو شفت حاجة غريبة متخافش، القبو على شكل مربع، الركن الشمال اللي قدامك هتلاقي عليه قماشة حمراء قديمة فوقها سبع أحجار، احضر تحتها هتلاقي جرة من الفخار.

- وبعد كده..

- سمّ الله واكسرها.. هتلاقي المخطوطة اللي فيها التعويذة،
الوصية بتقول إنك فورًا تحرقها وانت بتقرأ آية الكرسي.
- هحرقها.

- اوعى تبص فيها أو تحاول تقرأ فيها أي حاجة.. احرقها
على طول من غير تردد، خليك قوي، اوعى تخاف مها حصل،
اوعى تضعف يا آدم، كل اللي فات هيروح وكل اللي جاي عليك
وعلى عيلتك هيبكون خير أو شر حسب تنفيذك للوصية دي.
ارتعبت مما سمعت، وسمعت دقات قلبي كأنها طبول، نظر
«عبدالله» إلى نوح وقال:

- خليك معاه يا نوح لحد باب القبور..

أوما نوح بالطاعة فأردف والده:

- توكل على الله يا آدم.. نفذ الوصية وربنا معاك.. خلي
بالك من نفسك.. النفس أمارة بالسوء.

نظرت إليه وأردفت بصوت خائف: «حاضر»، لبرهة من
الوقت نسيت أن هذه العائلة من الجن وأنني من الإنس، فنحن
الآن نتعاون على محاربة شر قديم دُفن بمنزلي وأريد تخليصه منه.
نظرنا إلى بعضنا أنا ونوح وسيطرت علينا روح المهمة التي
اختارنا الله لقضائها، كنت أقاوم الخوف بداخلي، ينطق قلبي

بالاستعاذة والبسملة طول الوقت دن توقف، نزلنا من الطابق العلوي ثم صلاة الاستقبال ثم نزلنا بضع درجات أخرى إلى باب القبو، هذا الباب الصغير القديم الذي لم يأت بخاطري مرة واحدة أن يكون سببًا لكل ما عانته.

وضعت المفتاح الكبير القديم في فتحة الباب العجيبة فانفتح في سلاسة لم أعهد لها من قبل في فتح أي باب، نظرت أنا ونوح إلى بعضنا ذاهلين، كان القبو مظلمًا لدرجة مخيفة، وقف نوح على عتبة القبو وأعطاني شمعة مُشتعلة لم أعرف كيف أتى بها! نظرت إليه مُبهراً ثم شرعت أدخل القبو فأوقفني نوح وقال:

- متنساش كلام الحارس.. اقرأ آية الكرسي الأول وسم الله وادخل برجلك اليمين.. تحفر لحد ما تلاقي الجرة.. تحرق التعويذة من غير ما تقرأ يا آدم. اوعى تستسلم للشيطان.. الموضوع مش هيكون سهل.

شكرته بعيني وأغمضتها لأنفذ ما قاله الحارس.. سميت الله ودخلت، ظلام دامس، قبو صغير مُربع، تجولت بضوء الشمعة الضعيف في أركانه فلم أجد شيئاً سوى بضعة مربعات ونجوم بيضاء قد رُسمت على الجدران وتلاشت بفعل الزمن، أرضية القبو كانت وكأنها رملية، نظرت في الأركان فلم أجد شيئاً! ثم

أحسست بنفس أحدهم ورائي مباشرة! كيف ونوح ممنوع عليه
أن يدخل معي؟!!

ارتجف قلبي للحظات فجاءني صوت «نوح» في أذني يقول:
«القرآن»، فتذكرت ألا أتوقف عن ترديده وأخذت أقرأ ما تيسر
لي، وحينها اختفى ما أخافني، أعدت النظر إلى الأركان فرأيت
طرف القماشة الحمراء كما وصف عبد الله الحارس! أكان هذا
النفس يلهمني عن رؤيتها؟

أمسكت طرفها وجذبتها فطارت الأحجار في الهواء ولم
تقع! أحسست أن يداً تقبض على حنجرتي! كأنني أختنق..
أسرعت دقات قلبي، ثم بدأت الحجارة تهوي على رأسي بقوة
واحدة تلو الأخرى ولا تقع على الأرض! يضرب رأسي ويطير
فيعود إلى ضربتي مرة أخرى!

لم أدر ماذا أفعل فجاء صوت نوح ولكنه كان بعيداً جداً كأنه
من خارج الفيلا وكان يصيح.

- القرآن يا آدم.. ما تسكتش لحظة عن القرآن..

تعجبت من السبب الذي جعلني أتوقف عن ترديد القرآن
فعاودت القراءة وأخذت أردد آية الكرسي وفكاي يرتعشان..
لكن هذه المرة أخذت أقرأ بصوت عالٍ به تحدُّ لمن لا أراه،
فوقعت الحجارة كلها على الأرض، تنفست، سمعت صوت

نوح بأذني مرة أخرى يقول: «الله أكبر»، بدون توقف أخذت أرددها وأنا أحفر الأرض.. وكلما حفرت وجدت الأرضية مستوية وكأنني أبدأ من جديد.. لم أفهم ثم بتلقائية أخذت أردد القرآن وأعيد الحفر حتى رأيت شيئاً من الجرة بدأ يظهر.. كما رأيت أشياء أخرى لا أتبينها بالغرفة تطير! تجري! خيالات سوداء كأنها دخان! صوتي يعلو أكثر فأكثر وتظهر الجرة تدريجياً، أخذت أحفر أسرع إلى أن أمسكت طرفها فسمعت صوت عويل ونحيب كثير..

رأيت رجلاً قبيح المنظر يرتدي سواداً ويطوف في الغرفة ويضرب رأسه بجدرانها، سمعت صوت نوح وهو يبتعد أكثر وأكثر وبعض الأصوات تتداخل معه في صراخ عجيب ومرعب وهو يردد «استعن بالله»، فأخذت أردد آيات قد حفظتها من سورة «البقرة»، لكن الرجل أخذ يضرب رأسه بعنف بالحائط فكادت أقوم لأفر هارباً لكنه بدأ يتلاشى تدريجياً وهو يصرخ، وخفضت نور الشمعة حتى ظننت أنها انطلقت حينها قبضت يدي على الجرة اللعينة كلها فكسرتها في الحائط بقوة وبقيت في الظلام للمحطات!

فجأة استعادت الشمعة ضوءها وسمعت صوت نوح عالياً: «الله أكبر.. الوصية يا آدم»..

وكانت الغرفة مضيئة تمامًا الآن في القبو، وحل ضوء مريح
 بينما ظهرت رسومات لجوارٍ وعروش على الحائط لم أكن قد
 رأيتها منذ دخلت.. وعاد الرجل ذو الزي الأسود في الظهور
 لكنه كان يتسم هذه المرة وهو يمد يده إليّ وصرخات نوح تأتي
 من بعيد: «أيتها الآن يا آدم.. لا تفكر.. كل هذا وهم».. لكنني
 لا أعلم ماذا ترددت الملاحظات في حرقها، اتبعت شعور بالفضول
 لمعرفة السر، كما أنه بعض الجوارى بدأت تخرج من فوق الجدار
 وهي تتمايل في رقص ممتع.. فكرت لو أنني نظرت إلى التعويذة
 للملاحظات وكنت أعلم كما قال الحارس أن العاقبة وخيمة، لكن
 أحققاً هي سبب كل هذه الشرور؟ ماذا لو امتلكتها؟ هل أتحمك
 فيمن حولي؟ أريد أن أعرف ماذا تحويه وهل كان تقييمه صائباً
 كل هذا الزمن؟ تردد قلبي وعقلي، تذكرت جهود جدي الأكبر
 ولم أريد أن أخذه، لكن وقف فضولي عائقاً للملاحظات أخرى.
 وكان عدد الجوارى يزداد من حولي والرجل ذو الزي الأسود
 يتسم أكثر كاشفاً عن أسنان بيضاء ملطخة بالدم..

ثم سمعت صوت «عبدالله» من خلفي لم أدر كيف دخل
 وهو يردد حازماً بصوت قاطع: ﴿وَلَا تَتَّبِعِ الْهَوَىٰ فَيُضِلَّكَ عَنْ سَبِيلِ
 اللَّهِ﴾^(١)، حينها أفقت من وهمي الذي سيطر عليّ، وعاد الرجل

(١) [ص: ٢٦].

يصرخ من جديد ويضرب رأسه بالحائط، وتلاشت الرسومات من على الجدران ومعها اختفت الجوارى الوهمية، وخفت النور مرة أخرى فلم أتردد وقربت الشمعة إلى التعويذة مباشرة، ظلت تحترق في صمت والصراخ والعويل قد ملاً القبور وما حوله، ظللت أنا ونوح نردد «الله أكبر» إلى أن احترقت التعويذة حتى آخرها وتوقفت الأصوات إلا من كلمات «الله أكبر».

جلست لاهثاً في النهاية بعد أن هدأ كل شيء، ثم قمت بعد فترة إلى نوح بالخارج فرحاً، وصعدنا إلى «عبدالله» بالبشرى، دخلنا فوجدناه ينظر إلى سارة نظرة ملؤها الحب، أشار إليها وإلى نوح الذي وجم لما رآه واحتضنه، نظر إلي مُتبسماً وقال: ﴿وَنَطْمَعُ أَنْ يَدْخِلَنَا رَبُّنَا مَعَ الْقَوْمِ الصَّالِحِينَ﴾^(١)، وسأل «نوح» عما حدث فقالت سارة إنه ضحى بنفسه ودخل القبور ليعاون آدم وهنا أسلم «عبدالله» روحه لله في طمأنينة، وكانت آخر كلماته: ﴿وَنَطْمَعُ أَنْ يَدْخِلَنَا رَبُّنَا مَعَ الْقَوْمِ الصَّالِحِينَ﴾^(٢).

بكى نوح في صمت وهو يردد: «إنا لله وإنا إليه راجعون»، تركنا زوجته معه خارج الغرفة، بقيت معه لبرهة من الوقت ثم أردت أن أبقى مع نوح لكنه لم يوافق، تحدث وقد غلبته دموعه الكثيرة:

(١) [المائدة: ٨٤].

(٢) [المائدة: ٨٤].

- معلى يا آدم مش هينفع تكون موجود دلوقتي .

- أنا مش عايز أسيبك في يوم زى ده ..

- صدقني فوق طاقتك .. اسمع كلامي يا آدم .

لبت رغبته وبقيت في غرفتي بعد أن توضأت، بعد دقائق سمعت جلبة كبيرة في البيت، صوت أقدام كثيرة، أعتقد أنني سمعت نحيبًا وبكاءً، خرجت إلى الشرفة فرأيت عم محمد واقفًا في الحديقة ينظر إلى الفيلا عاقدًا ذراعيه، هل علم بموت «عبدالله»؟

لم أنس تلك اللحظات التي توقف فيها الزمن قليلًا عندما توقف «عبدالله» عن الحياة، لم أنس حزن زوجته المخلصة عليه وتسليم ابنه لقضاء الله، لكن الغريب أن الأصوات والأقدام ظلت بالمنزل لفترة طويلة ولم تتعد! جلست أصلي لله شكرًا على نجاتي من كل هذا، وبقيت أقرأ القرآن بتدبر ما استطعت، بعد مرور وقت لم أحسبه ظهر نوح في أحد أركان غرفتي يبدو عليه أثر الحزن، لم أعرف ماذا أفعل، أغلقت كتاب الله وقمت من مكاني لأطمئن عليه:

- أنا مش هعرف أواسيك .. لكن الحاجة اللي تخليك مطمئن

إنه مات مؤمن بالله .

ابشسم نوح في صمت فظرت إليه وقد تماكني الشغف، فلما

رأني بهذه الحالة استرسل في حديثه:

- حقا تعرف هو مدفون فين يا آدم.

أثارني حديثه للغاية، لكنني أحترم قدسية الموت، لكنني

سألته في فضول:

- فين؟

- في جنينة الفيلا.

جحظت عياني للحظات لكنني تماكنت أعصابي، نظرت

إليه حينها هممت أن أعلق فأردف هو:

- وصية الحارس مع أمي بتقول إنه حابب يندفن في المكان

اللي قضى فيه عمره كله تقريبا، في البيت اللي اتربى فيه، علشان

كده الأصوات اللي سمعتها كانت موجودة لفترة فعلا، كلنا

اتفاجئنا بالكلام ده، لكن انت عارف إن الوصية واجبة النفاذ.

- أكيد... الله يرحمه.

- الله يرحمه.. أنا جاي علشان أشكرك على كل اللي انت

عملته وتحملته وقدرت تفهمه، رغم كل الاختلافات اللي

بيننا، أمي كمان بتشكرك وبتطلب منك تسامح «عبدالله» لو كان

ضايقتك في يوم.

ابتسمت وأردفت في صدق:

- أنا مسامحه من زمان.. لكن انت هتعمل إيه؟

- هرجع مكة لكن هاخذ أمي معايا.. وعائز أطلب منك طلب..

- طبعًا يا نوح.

- من فترة للتانية هنيجي نزور والدي، محدش هيحس بينا.. مش هنزعج حد، لكن انت فاهم الموقف.

- أنا مقدرش أقول أي حاجة يا نوح.. إنت عارف.

- أوصيك بالصبر والصلاة في الدنيا يا آدم.. السلام عليكم ورحمة الله وبركاته.

فأردفت مودعًا

- وعليكم السلام ورحمة الله وبركاته.

كانت المرة الأخيرة التي أرى فيها «نوح»، بقيت وحيدًا في المنزل، أعلم الآن أنني وحيد، أتجول في الحديقة وفي الدور العلوي في أي وقت دون خوف، دون النظر إلى أركانه أو إلى سقفه، أتأمل غرفة أبي وأمي التي رأيت فيها «عبدالله» و«سارة» لأول وآخر مرة، هل من السهل أن أتجاوز كل ما مررت به وأمضي في حياتي؟ لم أجروء على الحديث عن أي شيء، لن يصدقني أبي الذي لا مني كثيرًا عند عودته إلى باسورس على ما ألحقت بالمنزل من ضرر، كما تعجبت أمي من رؤية الدماء فأقنعتها أنها بقايا سائل أحمر من لعبة طائشة كنت أجربها، لم يتحدث الخفير أو زوجته عن شيء،

لكن لم ينطقوا الخقد في صدر مروان الذي أراد دومًا العيش في
 مستوى أفضل، لم يعد الخائن حسن صديقي بعد ذلك اليوم.
 عندما كنت أحتفل بعيد ميلادي الحادي والثلاثين، سردت
 بعضًا من هذه الوقائع لزوجتي فلم تصدق..
 لكنني كلما قلقت في الليل ظننته «نوح» أيقظني وقد قرر
 زيارتي.. لا أعرف هل سأرى «نوح» مرة أخرى أم لا، لكنني
 أتمنى له كل الخير في الحياة. وأنتظر كل ليلة ربما يقرر أن يأتي فيها
 ليزورني كما كنا نعمل في الماضي.

تمت



آدم الشلقاني

أحمد سلامة

حسن الجندي

محمد صادق

محمد عصمت

أحمد عبدالمجيد

أحمد الريدي



للمزيد من الروايات والكتب الحصرية
انضموا لجروب ساهر الكتب

sa7eralkutub.com

او زيارة موقعنا

فهرس الموضوعات

٥٥	إهداء
٧٧	(١) «آدم»
١٤	(٢) «نوح»
١٩	(٣) «آدم»
٢٨	(٤) «نوح»
٣٣	(٥) «آدم»
٥٣	(٦) «حسن»
٦٤	(٧) «آدم»
٧٤	(٨) «حسن»
٨٢	(٩) «آدم»
٨٩	(١٠) «نوح»
١٠٠	(١١) «آدم»

- ١١٢ «حسن» (١٢)
- ١٢٢ «آدم» (١٣)
- ١٣٦ «نوح» (١٤)
- ١٤٠ «عم محمد» (١٥)
- ١٥١ «عبد الله» (١٦)
- ١٥٩ «سارة» (١٧)
- ١٦٦ «نوح» (١٨)
- ١٨٠ «آدم» (١٩)
- ١٩٣ «عبد الله» (٢٠)
- ١٩٧ «نوح» (٢١)
- ٢٠١ «عبد الله» (٢٢)
- ٢٠٩ «آدم» (٢٣)
- ٢٢١ شكر خاص